

SIGISMUNDI STORCHENAU,

I N

ACADEMIA VINDOBONENSI

LOGIC. ET METAPH.

PROFESSORIS PUB. ORD.

INSTITUTIONES

METAPHYSICÆ

IN IV. LIBROS DISTRIBUTÆ.

LIBER II.

EDITIO ALTERA

AB AUCTORE EMENDATA.



V E N E T I I S,


APUD FRANCISCUM PITTERI.



MDCCLXXIV.

SUPERIORUM PERMISSU, AC PRIVIL.





PROLEGOMENON

I N

COSMOLOGIAM.

§. I.




Cosmologia notiones generales; quæ ^{Quid} huic, aliisque mundis possibilibus ^{cosmo-} competunt, examinat (ont. §. 2.): ^{logia?} recte igitur scientia mundi in genere appellatur. Notiones porro has ab mundo hoc præfente abstrahendas esse per se manifestum est.

II. Quæ huic mundo conveniunt, ac in ^{Quæ il-} metaphysica attentionem merentur, vel ad ^{lius par-} illius existentiam, vel ad perfectionem, vel ^{tes?} ad naturam, ejusque leges pertinent. In tres igitur sectiones tota hæc pertractatio congrue distribuitur.

SCHOL. Primus doctrinam de mundo in artis formam redegit, & systemati metaphysico inseruit Christianus VVolfius: quam ob rem ipse se se in sua ad cosmologiam præfatione satis dilaudat. Quod autem ad utilitatem hac ex disciplina hauriendam attinet, ea omnium facile princeps est, quod per illam in claram

potentissimi juxta, ac sapientissimi Conditoris cognitionem deducamur, qui omnis philosophiæ finis est nobilissimus.



SECTIO I.

DE

MUNDI EXSISTENTIA.

§. III.

Quæ hu-
jus se-
ctionis
summa?



UM de exsistentia mundi differen-
dum est, res ipsa postulat, ut pri-
mum, nonnullis de ejus notione
generatim præmissis, inquiremus,
quam ipse ratione exsistentiam obtinuerit;
tum utrum fato cuidam subjiciatur cum ipse,
tum res mundanæ: denique cum præcipuas
mundi, de quo agimus, partes corpora con-
stituant, generales eorum proprietates, &
ex quibus eadem coalescunt, elementa inve-
stiganda veniunt. En totius sectionis sum-
mam.

SCHOL. De mundo nempe corporeo solum, sive
materiali in hac metaphysices parte tractan-
dum est: quod ad substantias spirituales, quæ
mundum, ut ajunt, *intelligibilem* constituunt,
attinet, earum pertractatio proprium in psy-
cologia locum habet.

CAPUT I.

— De Notione Mundi Generativæ .

IV. Si a contineat rationem, cur b ipsi ^{Quid} vel coexistat, vel succedat, b continet de- ^{nexus} terminationem sine a non possibilem: igitur ^{ratione} a, & b connexa sunt (ont. §. 60.). Priori ^{spatii, &} in casu nexum dicunt esse *ratione spatii*; est ^{tempo-} enim spatium ordo simultaneorum coexistentium in serie physice continua (ont. §. 201.); in posteriori vero *ratione temporis*, cum tempus sit ordo successivorum (ont. §. 211.). Si porro b contineat rationem, cur c ipsi vel coexistat, vel succedat, erit similis nexus inter b, & c, & sic deinceps. Ex hoc autem sequitur a quoque cum c connexum esse; quæ enim cum uno tertio connexa sunt, inter se quoque connecti manifestum est. (conf. ont. §. 75.).

V. Ponamus existere seriem entium connexorum, a. b. c. d. e. f. erit a cum b, cum c, cum d, cum e, cum f, & b cum c, cum d, cum e, cum f; item d cum e, cum f connexum. In serie igitur entium connexorum quodlibet ens cum quovis alio in eadem serie connectitur.

COROLL. 1. Igitur & plures series, quæ ex entibus inter se connexis constant, connexæ esse possunt, si modo aliquod ens ex una serie cum aliquo ente alterius seriei connectatur.

COROLL. 2. Possibilis proinde est series, quæ ex pluribus seriebus entium connexorum inter se connexis componatur.

Quid
nexus
percaus-
sas fina-
les, &
efficientes?

VI. Si, quæ ratione spatii inter se connectuntur, ita constituta sint, ut unum sit propter alterum, sive si ens intelligentia instructum unum ordinet ad alterum, ea connectuntur per *causas finales*; est enim finis, propter quod causa efficiens agit (ont. §. 158.). Si connexorum ratione temporis alterum in actione præcedentis rationem suæ existentiae agnoscat, ea connectuntur per *causas efficientes*; est enim causa efficiens, cujus causalitas in actione consistit (ont. §. 144.).

Quid
mundus?

VII. *Mundus*, seu *universum* est series composita ex pluribus seriebus entium per causas tum finales, tum efficientes connexorum, quæ alterius seriei pars non est.

COROLL. Omnia igitur hujus mundi entia inter se connectuntur, itaque inter se locantur, ut unum contineat rationem, cur alterum eidem vel coexistat, vel succedat.

SCHOL. Definitio hæc communis est, convenitque tam mundo huic existenti, ac sensibus nostris obvio, quem propterea *aspetabilem* dicimus, quam omnibus aliis possibilibus, quod dari certum est, cum id genus series connectæ nequaquam repugnent. Conformatur autem abstractione proprietatum maxime generalium, quæ nemini tantillam attentionem adhibenti non possunt non esse notæ. Profecto contemplantes universam hanc mundi machinam uno prope intuitu detegimus quam plurima entia simultanea, solem, terram, reliquosque planetas, ac stellas fixas, eaque inter se ita constituta, ut unum alteri inserviat, quemadmodum id elucet ex iis, quæ sol telluri nostræ præstat tam illuminando, calorem impertiendo, arcendo frigus &c. Idem in telluris nostræ partibus non minus conspicuum est, ut adeo de nexu per causas finales dubitari nequeat.

DE NOTIONE MUNDI GENERATIM: 9

queat. Continua deinde entium successio, cui ignota esse potest? nonne series est haud interrupta generationum in plantis, belluis, hominibus? nonne experientia quotidiana docet, res omnes mutabiles, ac contingentes esse, quæ propterea causa effectrice egeant (ont. §. 155.)? igitur nec minus palam est dari in mundo nexum per causas efficientes. Quare non est, cur allatam mundi definitionem probare quis renuat: neque vero ultima verba otiose adjecta sunt; ea enim notant seriem hic intelligi, quæ ex entibus omnibus tam præteritis, quam præsentibus, & futuris, quatenus nimirum illorum connexio pertinet, coalescat, quo ea, quæ Langius VVolfio objecerat, refutantur. Vide Baumeisterum.

Phil. definit. de fin. 567.

VIII. *Mundus est ens compositum.* Cum mundus sit series composita ex pluribus seriebus entium connexorum (§. præc.), evidens est, mundum esse ens, quod in plura entia, ex quibus certa quadam ratione conjunctis coalescit, resolvi potest; sed quod ejusmodi est, est ens compositum (ont. §. 170.): ergo mundus est ens compositum.

Mundus est ens compositum.

COROLL. 1. Essentia igitur mundi consistit in certo nexu certarum partium, id est, in modo, quo omnia entia simultanea, & successiva inter se consociantur (ont. §. 171.).

COROLL. 2. Omnes mutationes, quæ in mundo aspectabili eveniunt, motu perficiuntur (ont. §. 216.).

IX. *Saltus* fit, cum ab uno extremo ad alterum devenitur non transeundo per media. *Casus purus*, aut *fortuna* est rationatum sine ratione sufficiente, aut effectus absque sua causa effectrice.

Quid saltus, & casus?

SCHOL. Data saltus definitio generalis est, duasque sub se species complectitur. Primam con-

*Cosm.
transf.
c. 1. §.
520. sch.*

stituit transitus a ratione sufficiente remota ad rationatum omiſſa proxima, quod Boehmius exemplo hominis super terra nive recta gressu ordinario progredientis, tum saltuatim redeuntis illustrat: altera est mutatio quantitatis continuæ ab una magnitudine ad aliam non tranſeundo per omnes medias ejusdem generis magnitudines, qualis contingeret, si celeritas octo graduum in corpore moto uno momento individuo mutaretur in celeritatem duodecim graduum.

*Saltus &
casus
non da-
tur in
mundo.*

X. *Saltus, & casus in mundo non dantur.* Evidens quippe est, utrumque pugnare cum nexu, quo omnia hujus mundi entia copulantur (§. 7. cor.). Deinde quod ad priorem saltus speciem: ratio remota non est ratio sufficiens rationati, nisi ope interpositæ rationis proximæ: rationatum proinde ejusmodi foret absque ratione sufficiente, quod universim repugnat (ont. §. 21.). Posterior autem excluditur per legem continuitatis, quam in rerum natura exſtare gravissimis argumentis palam fecit Boscovichius.

*Diff. de
leg. cont.
& theor.
phil. p. 2.*

COROLL. Sublato igitur nexu res in mundo casu, & per saltum evenire possent, atque sic mundus realis transiret in fabulosum, & phantasticum, qualis in somnio apparere solet.

SCHOL. Qui tamen sit, quærunt hoc loco aliqui, ut permulta casu, & fortuito evenire dicamus? ii norint, oportet, *fortunam* vulgofonare concursum causarum minime prævisum: „propter obscuritatem, ait Tullius, ignorantemque causarum fortuna efficit multa „improvisa, nec opinata. „Ea nimirum in familiari sermone casus, aut fortunæ tribuimus, quæ, cum minime a nobis expectabantur, accidunt, quorumque ratio, aut causa efficiens nobis ignota est; re tamen ipsa nihil est, quod ratione sua, aut causa destituatur:

vide

*Q. acad.
1. 2.*

vide Buffierum . Unde patet nomen *fortuna* Trait. des pré-
mi. vér.
p. 2. ch.
24. n.
354.
in se spectatum , aut relatum ad ens infinita
intelligentia præditum omnino inane esse , &
ab nostra solum ignoratione significationem
quampiam sortiri , quod Juvenalis innuit :
„ sed te nos facimus fortuna deam, cæloque
„ locamus. „ Atque inde fit , ut quo quis
plura ignorat, eo ipsi plura casu, & fortuito
accidant, ex quo ortum est illud , quod in
proverbio dicitur: *ubi parum ingenii, ibi plus
fortuna*. Quia porro homines ita fere compa-
rati sunt, ut mirari soleant, cum ipsis quid-
piam casu accidit, frequens in rebus quibuscumque
admiratio insignem testatur ignorantiam , &
quo quis sapientior est , eo pauciora admira-
tur.

XI. *E nexu entium mundanorum universalis quidam ordo enascitur.* E nexu
Cum omnia entia entium
ordo un-
iversalis,
mundana & per causas finales , & per effe-
ctrices connexa sint (§. 7. cor.), datur quæ-
dam similitudo tam in collocatione, quam in
successione entium mundanorum conspicua, ac
proinde ordo quispian (ont. §. 77.), qui,
cum ad omnia entia pertineat, universalis
quoque est (ont. §. 81.): igitur e nexu en-
tium mundanorum universalem quemdam or-
dinem nasci in aperto est.

XII. *E nexu entium mundanorum summa
Conditoris sapientia elucet.* E nexu entium & sapē-
entia
condi-
toris e-
lucet.
mundanorum perfectissima quædam subordi-
natio mediorum ad obtinendos fines a Condi-
tore præstitutos elucet, ut attendenti per-
spicuum est; sed perfectissima subordinatio
mediorum ad fines opus est summæ sapien-
tiæ: igitur e nexu entium mundanorum sum-
ma Conditoris sapientia elucet.

SCHOL. Præsentis theorematis veritas clariori in
luce constituetur, cum de mundi perfectione
sermo fuerit.

CAPUT II.

De Existentia, & Origine Mundi.

Mundus existit.

XIII. *Mundus corporeus existit*. Sensus enim de corporum existentia nos nequaquam fallunt (log. §. 177.). Et profecto, si sensationes nostræ a nulla causa externa pendeant, qui sit, ut imaginationes nostræ a sensationibus tanto claritatis intervallo recedant? quid enim? an vis illa cogitandi jam minuitur? jam augetur? an vero, si ipsa quidem immutata perseveret, modo ipsa sese quasi adstringit, & cohibet? modo relaxat, & solvit? ut ait VVinklerus. Hoc alterum certo fieri nequit: secus enim posset ea, cum liberet, imaginationibus quoque suis eum claritatis gradum tribuere, quem constanter impertit sensationibus, quod cum experientia pugnat: pendent igitur sensationes nostræ a causa externa; quæ vero illa? nonne corpora, ipseque adeo mundus corporeus.

cosm. §. 493.

Quid idealismus, & egoismus?

SCHOL. Qui mundi corporei existentiam inficiantur, solasque substantias spirituales existere putant, *Idealistarum* nomenclationem sortiti sunt: horum aliqui longius progressi omnia prorsus entia præter se ipsos, id est, suum spiritum tollunt, *Egoistæ* propterea dicti, quorum in numero ad tempus saltem fuisse Cartesium suspicantur nonnulli, quod in meditationibus de prima philosophia de omnibus rebus a sua mente distinctis dubitare voluit; verum hi injuriam facere viro doctissimo mihi quidem videntur. Minus a vero abhorret, quod Plassius docet: Egoistas speciem esse quamdam

Orat. de egoismo
p. 24.

co.

DE EXSISTENTIA, ET ORIGINE MUNDI. II

eorum, qui ceteroquin Malebranchio adherent, suaque dogmata non libris, sed privatis solum *Mémoire de Trévouze de* instructionibus propagare student: referunt Tri- *ann.* voltienfes in novellis litterariis sub finem adje- *1713. au mois du* ctis, Malebranchii discipulorum unum aliquem *May.* disputationem bene longam cum socio quodam Parisiis habuisse, seriaeque mente affirmasse, se solum esse spiritum creatum, ac nihil omnino nec ex spirituum, nec ex corporum genere præter se exstare.

Quod ad *Idealistas* attinet, viam ipsis ad absurdam hanc opinionem Malebranchium stravisse indubitatum est; quamquam & Leibnitii, VVolfique harmonia præstabilita eo sine ambagibus deducat, quemadmodum alias demonstrabo. Primus quidem, qui aperte idealismum professus est, videtur fuisse Michael Angelus Fardella Siculus; in ipsius enim logica, quæ priori sæculo Venetiis lucem aspexit, existentia corporum aperte negatur. Hujus vestigia pressit Gregorius Berkeley Hybernus edito primum Dublini anno 1710. libro *de principiis cognitionis humanae*; tum triennio post dialogis aliquot Londinensibus typis vulgatis inter Hyllam, & Philonoum, in quibus id unum egit, ut nulla exstare, nec exstare posse corpora extra spirituum ideas commonstraret. Idem subinde docuit Arthurus Collier Anglus in *clavi universali, sive inquisitione veritatis* Londini annum circiter 1733. edita. Sed vana hæc sunt delirantium somnia, nec refutatione digna: quare missis his ad argumentum philosopho dignius transeamus, ac sedulo inquiramus, quam ratione mundus hic aspectabilis ad existentiam pervenerit.

XIV. *Mundus eget causa effetrice.* Cum *Mundus* mundus sit ens compositum (§. 8.), necesse est pro quoque est, ut sit ens contingens (ont. §. *ductus.* 173. cor.); sed omne ens contingens eget

caussa effectrice (ont. §. 155.) : igitur & mundus.

COROLL. Non est ergo mundus ens improdum, ac proinde exstat ens aliquod ab ipso diversum.

SCHOL. Nullum profecto vestigium alicujus necessitatis absolutæ in hoc mundo elucet; imprimis enim potest is absque contradictione cogitari ut non existens, quemadmodum tot alios possibiles, nec tamen existentes concipimus; deinde sive totius universi conformationem, sive singulas ejus partes majores, minoresve, sive denique singularum partium formas, aut figuras contemplemur, omnia videmus arbitraria, neque ulla apparet contradictio in eo, ut ponatur hæc vel illa pars deesse, ut cogitentur plures, vel pauciores, majores, vel minores, remotiores, vel viciniore planetæ; stellæque inerrantes: mundus igitur hic ita existit, ut hypothesis de illius non existentia nequaquam repugnet; quod autem tale est, prorsus contingenter existit, necessitas siquidem absoluta, & possibilitas non existendi contradictorie sibi opponuntur. Atque sic evincitur impia Aristotelis de mundi æternitate opinatio; docuit quippe Aristoteles totum hunc, quantus quantus est, mundum ab nulla causa pendere, sed æternum esse, ipsoque Deo ab æterno coexistisse, uno fere hoc nixus principio: *motum non posse esse nisi æternum*: huic alia subinde adjecit argumenta Proclus magnum peripateticæ scholæ lumen; sed hunc cum magistro suo egregie refutavit Benedictus Pererius S. I. Videatur Genuensis. Fuerunt quidem non pauci, qui cum Trapezuntino græco sæculi quinti decimi scriptore Aristotelis causam suscepērunt, quorum alii ejus sententiam ita mitigarunt, ut confidenter assererent, ex Aristotelis mente mundum a Deo ex naturæ necessitate,

Quæ opinio Aristotelis de ortu mundi?

Elem.
metaph.
P. 3.
P. 37.

DE EXISTENTIA, ET ORIGINE MUNDI. 13

tate, atque hinc ab æterno productum fuisse; alii omnem prorsus erroris suspensionem hac in re ab ipso remove conati sunt: verum actum egerunt utrique; res enim est nimis quam manifesta, ac doctrina hæc præcipuum totius philosophiæ Aristotelicæ caput constituit. Ceterum uti impium hoc dogma avide arripuerunt illi, qui se in atheis profitebantur, ita nullo non tempore ab aliis mentis sanioris philosophis acerrime impugnatum est; quapropter putidissimi mendacii reus est nuperus auctor, qui velut ex tripode pronunciat, potiore philosophorum Christianorum æque, ac gentilium partem omni ætate agnovisse necessariam, ac independentem mundi existentiam, illique eam tribuisse naturam, quæ per sese omne initium, ac finem excludat. Ut porro omne atheis telum extorqueamus, necesse est, ut hoc loco progressum causarum seu essentialiter, seu accidentaliter subordinatarum in infinitum, in quem, tamquam munitissimam arcem, ipsi se conjiciunt, expugnemus. (vid. ont. §§. 151. 108. sch.)

*Histoire
nat. de
l'ame
p. 8.*

XV. *Progressus in infinitum non habet causam primam*: est enim vi definitionis series causarum subordinatarum absque causa prima (ont. §. 151.).

*Progressus in
infin. vi
def. non
habet*

XVI. *Progressus in infinitum est ens contingens*. Omne ens contingens est sibi insufficienti ad existendum (ont. §. 104. cor. 3.): ergo series infinitorum entium contingentium, quorum unum alterum ad existendum determinat, non est aliud, quam collectio infinitarum insufficientiarum ad existendum; atqui collectio infinitarum insufficientiarum ad existendum non efficit unam sufficientiam, sicut infiniti zeri non efficiunt unitatem: ergo series infinitorum entium contingentium, quorum unum alterum ad existendum determinat,

*causam
primam
est ta-
men ens
contingens*

nat, est ens sibi ad existendum minime sufficiens, ac proinde ens contingens; sed progressus in infinitum est reapse series infinitorum entium contingentium; quorum unum alterum ad existendum determinat: igitur progressus in infinitum est ens contingens.

XVII. Progressus in infinitum habet causam primam. Omne ens contingens habet causam efficientem, eaque est ipsum ens necessarium (ont. §. 155. cor.) : sed progressus in infinitum est ens contingens (§. præc.) : igitur progressus in infinitum habet causam efficientem, quæ est ipsum ens necessarium; atqui ens necessarium, cum a nulla amplius causa pendeat (ont. §. 105.), est causa omnium omnino prima: ergo progressus in infinitum habet causam primam.

XVIII. Progressus in infinitum secum ipso pugnat. Pugnat aperte secum ipso habere, & non habere causam primam; sed progressus in infinitum habet causam primam (§. præc.), & non habet causam primam (§. 15.): ergo progressus in infinitum secum ipso pugnat.

SCHOL. I. Deinde nonne, qui ponit progressum in infinitum, ponit causas subordinatas? jam quæso, causæ hæ subordinatæ habentne causam primam, vel non? si illud: tum habent, & simul non habent causam primam, ipseque progressus procedit in infinitum, & simul non; si hoc: tum causæ subordinatæ nulli causæ, id est, nihilo subordinantur, proindeque sunt simul subordinatæ, & simul non. Probe tamen notandum est, hic solum agi de eo in infinitum progressu, quem athei statuunt, quorum opinione excluditur omnis causa prima, quocumque sensu, vel modo ipsa accipiat, seu extra, seu intra seriem, seu tempore, seu natura prior; alium siquidem

dem progressum in infinitum admittunt ii, qui putant potuisse mundum ab æterno creari: docent nimirum posse dari seriem causarum infinitam absque prima, quæ sit intra seriem, vel ad eam pertineat, non tamen absque prima, quæ sit extra seriem, & hac non quidem tempore, sed tamen natura prior; hi alio ex capite infra impugnabuntur: nunc atheorum objectis satisfaciendum est.

r.) Ex eo, inquiunt, quod quivis miles non sit sufficiens cædendo hosti, non sequitur nec totum exercitum ad id sufficere; item tamen ens simplex extensum non sit, est tamen compositum ex simplicibus coalescens extensum: igitur neque ex eo, quod singula entia seriei infinitæ sint contingentia, sequitur totam seriem infinitam esse contingentem. Ratio paritatis in eo sita est, quod a sensu, ut ajunt, distributivo ad collectivum, a partibus ad totum argumentari non liceat; atqui huc totum argumentum §. 16. recidit.

Satisfit
objectis

3c. Quidquid sit de casibus specialibus, id certissimum est argumentationem a casu distributivo ad collectivum esse legitimam, cum de toto negatur aliquod prædicatum, quod singulis partibus seorsum acceptis nec adæquate, nec inadæquate convenit; cum enim totum sit idem cum omnibus partibus simul sumtis, & quævis pars sit inadæquate eadem cum toto (ont. §. 66. sch.), fieri nequit, ut prædicatum toti conveniat, quod singulis partibus nulla ratione, nec inadæquate, vel ut dici posset, *inchoative* convenit: ita quia quivis globus ligneus caret principio vitæ, collectio etiam infinita globorum eodem destituetur; vel si ponas infinitam collectionem hominum cæcorum, non deprehendes in ea potentiam videndi vel hoc ipso, quod singuli homines ejus collectionis seorsum accepti eadem privati sint. Idem prorsus evenit in casu præsentem: quod.

quodvis ens ponitur contingens, seu insufficientiens ad existendum; contingentia autem, seu insufficientia ad existendum nulla ratione, nec *inadequate* quidem, aut *inchoative* est necessitas, aut sufficientia ad existendum, quia ipsi potius contradictorie opponitur: nullo igitur pacto fieri potest, ut in collectione etiam infinita entium contingentium contineatur necessitas, aut sufficientia ad existendum; immo cum collectio essentiam, & naturam entium non mutet, sicut ex duobus entibus contingentibus non fit unum necessarium, ita nec ex infinitis necessitas aliqua extunditur; & ratio est, quia collectio insufficientiarum est collectio negationum sufficientiæ; sed infinitæ negationes sufficientiæ nequaquam constituunt unam sufficientiam, sicut nec unam affirmationem. Certe, ut præclare monuit Buffierius: qui ex collectione infinita entium contingentium arguit ipsam esse necessariam, & sibi ad existendum sufficientem, nec causam effectrice egentem, non minus inepte ratiocinatur, ac qui videns catenæ cujuscumque ex alto pendentis extremum inferius, negaret alterum catenæ ejusdem extremum egere, quo retineatur, quod poneret annulos infinitos, quorum alter alterum sustineat. Quod autem ad exempla allata attinet: imprimis tamen quivis miles seorsum non habeat vires sufficientes ad cædendum hostem, habet tamen jam aliquas vires, atque adeo sufficientiam aliquam *inadequatam*, seu *inchoatam*; jam vero manifestum est multas vires de se insufficientes constituisse posse unam vim sufficientem: deinde cum extensio aliud non sit, quam positio partium extra partes, ac multitudinem partium involvat, facile concipi potest, quomodo ex pluribus inextensis juxta se positis, & certo quodam modo coherentibus unum extensum exsurgat, quemadmodum ex collectione unitatum

DE EXSISTENTIA, ET ORIGINE MUNDI. 17

numerus efficitur, ut nempe unitas, etsi non sit numerus, est tamen initium numeri, ac proinde plures simul numerum constituere possunt; ita ens simplex, licet non sit extensum, est tamen aliquod extensionis initium, ac ea propter una cum aliis extensum constituit. Denique generatim, cum argumentum ducitur a partibus ad totum, rite attendendum est, de quo prædicato sermo sit: alia sunt essentialiter relativa, & a ratione totius, seu partium multitudine pendent; alia singulis duntaxat, quæ partibus conveniunt; alia denique singulis interne, ac essentialiter sine omni respectu ad totum, seu partes competunt. Quæ primi sunt generis, affirmantur de toto, & nequaquam de singulis partibus seorsum, ut *esse extensum*; quæ alterius: affirmantur de partibus, quamdiu ratio partis attenditur, non vero de toto ut toto, ubi amplius ratio partis non habetur, ut *esse unum*: quæ ultimi: affirmantur de toto, & singulis partibus, ut *esse contingens*.

2.) Posita serie causarum infinita, seu, quod idem est, æterna, tota series foret æterna, tamen si quodvis ens seorsum non esset æternum: ergo etiam posita serie causarum infinita tota series posset esse necessaria, licet quodvis ens seorsum non esset necessarium, sed contingens.

✱. *Transf. a. n. conf.* Qui ponit seriem causarum infinitam, ac proinde æternam, ille in ipsa hypothese clare, & explicite ipsius æternitatem ponit: eadem contra hypothesis nec explicite, nec implicite involvit necessitatem ad existendum, sed id ipsum in questione versatur; queritur nempe, utrum, si fingamus seriem æternam, ac infinitam entium contingentium, eo ipso etiam series hæc necessitatem ad existendum habitura sit. Atque hæc questio non per hypotesin aliquam, sed validis argumentis decidenda est; est autem validissimum

mum hanc in rem argumentum in eo positum; quod infinitæ etiam insufficientiæ collectæ reapse sint infinita nihila, quæ unam adæquatam, & plenam sufficientiam neutiquam efficere possunt. *Transmissi* vero antecedens, quia hypothesis ea secum ipsa omni ex parte pugnat; unde series reapse foret simul æterna, & simul non; primum: quatenus id explicite asseritur; alterum: quia sicut quodvis ens haberet initium existendi; ita tota entium collectio simul initio carere non posset.

- 3.) Series causarum efficientium sibi subordinatarum absque causa ultimæ non repugnat: igitur neque series causarum efficientium sibi subordinatarum absque prima: *c. p.* ideo primum: quia in illa serie cujuslibet effectus potest assignari sua causa sufficiens; sed etiam in hac serie posset assignari cujuslibet effectus sua causa sufficiens: ergo si illud, etiam hoc.
- R. c. ant. n. conf. ad prob. d. M.* Quia in illa serie potest assignari cujuslibet effectus causa plena, & adæquate sufficiens *c. M.* inadæquate sufficiens *n. M.* & sic *d. m. n. conf.* Dispar nimirum ratio est: series causarum absque ultimæ est ejusmodi series, in qua quævis causa suum effectum producit ita, ut effectus rursus in causam abeat, novumque effectum edat, idque sine fine, quæ in re nulla prorsus est repugnantia; cum enim prima causa ab ente a tota serie distincto existentiam obtinuerit, potest ipsa ut jam existens causa esse plene, & adæquate sufficiens sui effectus, & sic porro. Ab opposito vero cum in serie infinita regredimur, quævis causa, quæ assignatur, non est adæquate sufficiens, nisi ut jam existens; existentiam autem a causa proxime antecedente habet, & hæc rursus ab altera, & sic porro in infinitum: quia igitur hoc de quavis causa in serie tali infinita affirmatur, evidens est in ipsa serie nullam esse causam ultimam, & adæ-

& adæquate sufficientem. Sit series a, b, c, d, e, f, &c. in infinitum; sit a productum ab b, b ab c, c ab d, &c. certum est b non produxisse ipsum a nisi, ut jam existens, sed b non sit existens, nisi cum producitur ab c jam ante existente; igitur ratio plene sufficiens ipsius a non continetur in b, sed partim in b, partim in c existente; atqui ut c existat, necesse rursus est, ut antea existat d: ergo ratio ultimo sufficiens ipsius a, & in b, & in c, & in d continetur. Quod cum semper redeat, tametsi entia infinita accumules, luculente patet in tota serie causarum contingentium etiam infinita non deprehendi vel unius effectus causam plene, & ultimo sufficientem; sed redeundum tandem esse ad ens necessarium a tota serie distinctum. (conf. ont. §. 150. cor. 1. 2.).

SCHOL. 2. Qui e veteribus ab refutata nunc Aristorelis sententia discesserunt, mundumque a Deo factum esse docuerunt, in alium scopulum impegerant, putantes, materiam saltem, ex qua corpora mundana coaluerunt, a se ipsa æternum existisse. Teste Justo Lipsio (a) certum obtinuit apud omnes Stoicos dogma, materiam æque æternam, omnisque initii expertem esse, ac ipsum Deum. „ Dicunt, ait „ Seneca (b), ut scis, Stoici nostri, duo esse in rerum natura, ex quibus omnia fiant: „ causam, & materiam: materia jacet iners, „ res ad omnia parata, cessatura, si nemo moveat. „ Nec defuerunt aliarum sectarum philosophi, qui hanc opinionem amplecterentur; verum illud in acrem ab ipsis disceptionem vocabatur: utrum materia ab æterno informis, atque ab omni qualitate, & pulchritudine vacua jacuerit, antequam Deus ad eam disponendam, ac exornandam accesserit; utrum vero qualitates, rerumque formæ in ea jam reconditæ latuerint, ut divina solum sollicitia

Quæ opinio Stoicorum, & Platonis de mundi ortu? (a) *Physiol. Stoic. l. 1. differt. 4.*

(b) *Ep. 65.*

opus fuerit ad eas rite distribuendas ; ac in ordinem rationi convenientem redigendas. Hoc alterum Stoici fere cum nonnullis aliis arripuerunt ; illud Platoni, & Academiae placuit :

Time. c.
14.

„ Deus, inquit ille, quidquid erat, quod in
„ cernendi sensum caderet, sibi assumpsit, non
„ tranquillum, & quietum, sed immoderate
„ agitatum, ac fluctuans, idque ex inordinato
„ ad ordinem reduxit. „ Addit deinde, materiae malitiam, ac pervicaciam obstitisse voluminati supremi Numinis, ne talem ex ea faceret mundum, qualem cuperet, mali videlicet omnis, ac vitii expertem. Ex mente igitur Platonis Deus est quidem mundi auctor, non item materiae effector, triaque statuenda sunt rerum omnium principia : Deus, materia, idea ; quemadmodum docet Alcinoüs accuratissimus platoniorum dogmatum interpret.

Introd.
in doct.
Plat. c.
12.

Materia
mundi
non est
impro-
ducta ;

XIX. *Materia, ex qua mundus corporeus coaluit, non est ens improductum, & necessarium.* Vel enim hæc materia est ens compositum, vel ens simplex (ont. §. 170. cor. 1.) ; si primum : redit superior demonstratio (§. 14. cor.) ; si alterum : foret materia ens absolute perfectissimum (ont. §. 113. cor.), immutabile (ibid. §. 120.), & denique infinitum (ibid. §. 231.) ; atqui hæc evidenter absurda sunt ; manifestum siquidem est, multas materiae realitates deesse, & has, quas habet, admodum esse limitatas : ergo materia, ex qua mundus corporeus coaluit, non est improducta, seu necessaria.

& si foret, non potuisset a Deo in ordinem redigi. Si materia esset improducta, & hoc ipso necessaria, ea foret absolute ab omni alio ente, atque adeo etiam a Deo independens (ont. §. 106.) ; atqui ens a Deo absolute independens nequit

XX. *Si materia foret improducta, ea non potuisset a Deo in ordinem redigi.* Si materia esset improducta, & hoc ipso necessaria, ea foret absolute ab omni alio ente, atque adeo etiam a Deo independens (ont. §. 106.) ; atqui ens a Deo absolute independens nequit

ab eo in ordinem redigi; qui enim hoc fiat, si nullum Deus in eam dominium habeat, neque istud in se dominium concedere possit ens perfectissimum? atque hoc adeo verum est, ut ipse Plato illud ex parte agnoverit, quæ ratio est, cur materiæ pertinaciam Deo restituisse asseruerit: igitur si materia munda- na a se ipsa exstitisset, ea nequaquam a Deo in ordinem redigi potuisset.

SCHOLI. Venio ad profanam Democriti, ac Epi- Quid de ortu mundi Democritus & Epicurus?
 curi de mundi origine doctrinam. Duo sunt rerum omnium principia, *plenum*, id est, atomi, & *inane*, seu vacuum: illæ numero; hoc extensione, ac magnitudine infinitum. Atomorum proprietates duæ: *figura*, & *ma- gnitudo*; tertiam addidit Epicurus *pondus*, seu impetum internum, quo illæ ab æterno mo- verentur; quamquam & Democritus antea, observante Aristotele, atomum atomo gravio- rem dixerit, pro ratione nimirum molis, quæ altera alteram exsuperet. Figura infinite va- De ge- ner. & corrupt. l. 1. c. 2.
 riat; magnitudo adeo exigua, ut oculis non pateat; soliditas tanta, ut & individuae sint, & pati, aut mutari nequeant. Ita Tullius. A- De fin. l. 1. c. 16.
 tomi hæc a se ipsis ab æterno existunt, & in vacuo infinito perpetuo moventur: motus se- Lucret. de nat. rer. l. 2. v. 216. &c.
 cundum Democritum unius tantum est gene- ris, *obliquus* videlicet; verum Epicurus præ- Syst. in- tell. c. 5. fin. §. 24.
 terea & *directum*, & *declinatorium* statuit, huncque duplicem esse voluit; alterum in va- cuo, cum secus atomi in corpuscula coire num- quam possent: alterum in corpore animali, ac præcipue humano, unde hominum libertas o- riretur, quemadmodum docet Moshemius in Cudvorthum. Atomique æterno motu in infinito vacuo agitatae in se mutuo impin- gunt; tumque vel resiliunt, vel conjungun- tur, ac coherant, atque hoc collisionum, & agitationum genere totus mundus, omnesque
 in

29. 4.
cad. 1. 4.
6. 38.

in eo res efformantur: ita quidquid est, aut sit, naturalibus sit, aut factum est ponderibus, & motibus, ut ait Cicero. Si jam ex Epicuro quæras, quid negotii mundus Diis aut olim facessiverit, aut nunc facessat? reponet: nihil; Deos in otio residere, & nisi ab omni cura vacuos beatos esse non posse; atomos æternas fortuito concursu initium dedisse mundo, huncque perituum, & alium rursus oriturum, pro- ut ex aliter fuerint motæ. Impium hoc syste- ma iis arridet hodie, quibus divina providen- tia grave nimium onus videtur.

Atomi
Epicu-
rez non
exsi-
stunt;

XXI. *Atomi aeterna, & improducta non ex-
sistunt.* Imprimis enim contra pugnant argu-
menta supra adducta (§. 19.). Deinde sic
quoque argumentari licet: vel atomi existunt
numero infinitæ, vel finitæ; at neutrum di-
ci potest; non primum, quod quidem Epicu-
ro placuit; præterquam enim quod numerus
actu infinitus, & extensio realis infinita re-
pugnent (ont. §. 219. 221.), atomi numero
infinitæ prorsus replevissent spatium actu in-
finitum: in spatio autem infinito perfecte
pleno fieri nequit motus, qui ad effectiorem
corporum mundanorum requiritur. Sed neque
atomi possunt esse numero finitæ; cum enim
quævis atomus absoluta necessitate, quæ uni-
versalis est, nullamque exceptionem admit-
tit, existeret, nulla omnino ratio sufficiens
esse posset, cur ea necessitas in numero hoc
determinato atomorum, & non potius in quo-
vis alio deprehendatur; absolute certe im-
possibile est, ut necessitas absoluta ad deter-
minatum quemdam numerum restringatur (ont.
§. 114. sch. fin.).

nec, si
exsiste-
rent,
mundus
ex iis o-
riri po-
tisset.

XXII. *Tametsi exsisterent atomi improducti,
ex fortuita tamen earum concursione mundus
oriri non potuisset.* Vel enim omnium atomo-
rum motus, directio, celeritas æqualis esset,
vel

vel inæqualis; sed hoc alterum fieri omnino nequit; cum enim motum haberent ex eadem naturæ necessitate, vi cujus exsisterent, consequens foret, ut, quemadmodum necessitas in omnibus esset eadem, ita in omnibus quoque idem, seu æqualis sit motus, ac proinde etiam celeritas, & directio, quæ sola in motu discerni possunt: igitur primum sit, oportet. Jam vero si in omnibus idem esset motus, eadem directio, eademque celeritas, omnes perpetuo eadem celeritate moverentur per lineas rectas, eandemque inter se distantiam constanter retinerent, quo posito nulla concursio, nulla cohæsiō, nullumque corpusculum inde coalescens possibile foret. Quare tametsi Epicuro atomos improductas demus, nequit tamen ex fortuita earum concursione mundus oriri.

SCHOL. Ridicula est, quam comminifcebatuŕ Epicurus, declinatio minima atomorum ex linea recta; rursus enim quæri potest, utrum ea in omnibus atomis, omnique tempore æqualis sit, an non? si æqualem statuatur, numquam in se incurrent; si inæqualem, ratio huius inæqualitatis assignari nulla poterit. „ Quæ
 „ ergo, inquit Tullius, nova causŕa in natura
 „ est, quæ declinet atomum? aut num fortijun-
 „ tur inter se, quæ declinet, quæ non? aut
 „ cur minimo declinent intervallo, majore
 „ non? aut cur declinent uno minimo, non
 „ declinent duobus, aut tribus? optare hoc
 „ quidem est, non disputare. Nam neque ex-
 „ trinsecus impulsam atomum loco moveri, &
 „ declinare dicis: neque in illo inani, per
 „ quod feratur atomus, quidquam fuisse causŕ-
 „ sŕe, cur ea non e regione ferretur: nec in
 „ ipsa atomo mutationis aliquid factum est;
 „ quam ob rem naturalem sui ponderis mo-
 „ tum non teneret. Ita cum attulisset nullam
 „ causŕ-

D: fato
c. 10.

„causam, quæ istam declinationem efficeret,
 „tamen aliquid sibi dicere videtur: cum id
 „dicat, quod omnium mentes aspernentur, &
 „respuant. „Veritas hæc majore in luce po-
 nitur, cum animum advertimus ad elegantissi-
 mam mundi totius conformationem, ad statas,
 universalesque naturæ leges, quibus machina
 hæc universa tot jam sæculis regitur; quis sa-
 næ mentis sibi persuadeat, casu, & fortuna
 effici posse, ut eadem leges tot sæculorum
 decursu in conflictu corporum, in generatione
 animalium, in nidificatione avium, aliisque na-
 turalibus belluarum artificiis & constanter, &
 accuratissime observentur? unde deinde mens,
 intelligentia, ratio, quæ in quibusdam hujus
 universi entibus deprehenduntur? rursus ex for-
 tuito atomorum concursu? at vero secundum
 Epicurum ex ipsæ intellectu, & ratione ca-
 rent; quomodo ergo dabunt, quod ipsæ non
 habent? nullum in mundo posse esse motum,
 nisi atomi ex natura sua eum haberent, fate-
 tur ipse: quomodo ergo in mundo sensus,
 intelligentia, ratio, cum his illæ destituan-
 tur? Vide quoque Denesle. Denique qui fit,
 ut præsens atomorum confociatio tanto perdu-
 ret tempore, cum infinitæ aliæ brevissimum
 intra tempus rursus dissolutæ fuerint? Brevi
 quidem, & casu interituram prædixerat Lu-
 cretius; sed, bonis superis, vaticinationi even-
 tus nondum respondit. Profecto, si commu-
 nem naturæ sensum, firmissimum veritatis ar-
 gumentum (log. §. 172.), consulamus, faci-
 le sentimus nos tacito naturæ ductu impelli,
 ut judicemus, fieri nequaquam posse, ut opus
 quoddam, quod constantes, æquabilesque mo-
 tus longo tempore edat, casui originem suam
 debeat. Audiamus rursus Tullium: „Hic ego
 „non mirer esse quemquam, qui sibi persua-
 „deat, corpora quædam solida, atque indi-
 „vidua vi, & gravitate ferri, mundumque
 „effi-

*Exam.
 du^m ma-
 terialis-
 me to. I.
 c. 5. 6.
 De nato-
 rer. I 5.
 W. 195.*

*De nat.
 Deor. I,
 2, c. 374*

„ effici ornatissimum, & pulcherrimum ex eo-
 „ rum corporum concursione fortuita? Hoc qui
 „ existimat fieri potuisse, non intelligo, cur
 „ non idem putet; si innumerabiles unius &
 „ viginti quatuor litterarum vel aureæ, vel
 „ quales libet, aliquo conjiciantur, posse ex his
 „ in terram excussis annales Ennii, ut dein-
 „ cept legi possent, effici; quod nescio an-
 „ ne in uno quidem versu possit tantum valere
 „ fortuna. Isti autem quemadmodum asseve-
 „ rant, ex corpusculis non colore, non qua-
 „ litate aliqua, quam *ποικιλντα* græci vocant,
 „ non sensu præditi, sed concurrentibus re-
 „ mere, atque cæsa mundum esse perfectum,
 „ vel innumerabiles potius in omni puncto
 „ temporis alios nasci, alios interire? Quod
 „ si mundum efficere potest concursus atomo-
 „ rum, cur porticum, cur templum, cur do-
 „ mum, cur urbem non potest, quæ sunt mi-
 „ nus operosa, & multo quidem faciliora?
 „ certe ita temere de mundo effutiant, ut
 „ mihi quidem numquam hunc admirabilem
 „ cæli ornatum, qui locus est proximus, sus-
 „ pexisse videantur.

Verum præsens rerum conformatio, clamitant *Pensées*
 profani homines, continetur in infinitis con- *philos.*
 formationibus possibilibus: igitur æque possibi- *Po. 66.*
 lis est, ac probabilis, ut quævis alia, immo *Item*
 in infinitate sæculorum etiam necessaria; om- *Lettre*
 nes enim conformationes exhaurire æternitas *des an-*
 debet. Sed futile est omne, quod asseritur; *veugles.*
 imprimis enim ne unam quidem conformatio-
 nem fortuito atomorum concursu confieri pos-
 se supra demonstratum est, ob æqualem nimi-
 rum omnium motum, velocitatem, & dire-
 ctionem. Deinde missis his, conformatio or-
 dinata, qualis præsens est, generalibus adstri-
 cta legibus, tantoque sæculorum spatio suo in
 ordine persistens nequaquam in infinitis con-
 formationibus cæcis, ac inordinatis contine-

tur : quare posito id genus temerario atomorum concursu in infinitis conformationibus cæcis , & inordinatis numquam ad finem perventum fuisset , atque ideo etiam numquam initium dari potuisset conformationi cuidam ordinatæ , sapientissimisque instructæ legibus . Hinc lata est disparitas , cum ajunt : si infinitæ alex per infinitum tempus infinities projicerentur , omnes numerorum compositiones prodituras ; ex nimirum numerorum compositiones prodirent , quæ per casum sunt possibiles ; at hujus universi conformatio per casum possibilis non est ; longe enim est admirabilior , majoremque requirit sapientiam , quam omnes doctorum lucubrationes , quæ sine intelligentiæ cujuscpiam directione fieri absolute nequeunt .

Nec plus promovent ii , qui , cum finitum ponant atomorum numerum , finitas quoque esse earum confociationes contendunt , indeque colligunt , ob infinitatem temporis jam infinities redire debuisse præsentem hanc atomorum confociationem . His respondet Boscovichius :

„ Falsissimum est , numerum combinationum
 „ esse finitum in terminis numero finitis ; si
 „ omnia , quæ ad mundi constitutionem necessaria sunt , perpendantur . Est quidem finitus numerus combinationum , si nomine
 „ combinationis assumatur tantummodo ordo
 „ quidam , quo alii termini post alios jacent :
 „ hinc ultro agnosco illud : si omnes litteræ ,
 „ quæ Virgilii poema componunt , versentur
 „ temere in sacco aliquo , tum extrahantur ,
 „ & ordinentur omnes litteræ , aliæ post alias , atque ejusmodi operatio continuetur in
 „ infinitum , redituram & ipsam combinationem Virgilianam numero vicium quemvis
 „ determinatum numerum superante . At ad
 „ mundi constitutionem habetur imprimis dispositio punctorum materiæ in spatio paten-

„ te

*Theor.
 phi. nat.
 append.
 de anima,
 &
 Deo §.
 54. seq.*

„ re in longum, latum, & profundum: por-
 „ ro rectæ in uno plano sunt infinitæ, plana
 „ in spatio sunt infinita, & pro quavis recta
 „ in quovis plano infinita sunt curvarum ge-
 „ nera. — — Quam ob rem numerus disposi-
 „ tionum possibilium pro quovis puncto ma-
 „ teriæ adhuc ceteris manentibus est infinitus,
 „ adeoque is numerus ex omnibus mutationi-
 „ bus possibilibus est infinitus ordinis expositi
 „ a numero punctorum aucto saltem ternario.
 „ Iterum velocitas, quam habet dato tempore
 „ punctum quodvis, potest variari in infini-
 „ tum, & directio motus, potest variari in
 „ infinitum ordinis secundi ob directiones in-
 „ finitas in eodem plano, & plana infinita in
 „ spatio. Quare cum constitutio mundi, &
 „ sequentium phenomenorum series pendeat
 „ ab ipsa velocitate, & directione motus; nu-
 „ merus, qui exprimit gradum infiniti, ad
 „ quem assurgit numerus casuum diversorum,
 „ debet multiplicari ter per numerum puncto-
 „ rum materiæ. — — — Quam ob rem nu-
 „ merus combinationum relativarum ad mun-
 „ di constitutionem non est finitus pro dato
 „ quovis momento temporis, sed infinitus or-
 „ dinis altissimi, respectu infiniti ejus gene-
 „ ris, cujus generis est infinitum numeri pun-
 „ ctorum spatii in recta quapiam, quæ concipiatur utrinque in infinitum producta. At
 „ huic infinito est analogum infinitum momen-
 „ torum temporis in tota utraque æternitate,
 „ cum unicam dimensionem habeat tempus.
 „ Igitur numerus combinationum est infinitus
 „ ordinis in immensum altioris ordine infiniti
 „ momentorum temporis, adeoque non solum
 „ non omnes combinationes non debent redi-
 „ re infinities; sed ratio numeri earum, quæ
 „ non redeunt, est infinita ordinis altissimi,
 „ quam nimirum exponit quarta potentia nu-
 „ meri punctorum aucta saltem binario. — —

„ Quam ob rem ruit futile ejusmodi , atque
 „ inane argumentum . Sed inde etiam illud
 „ eruitur , in immenso isto combinationum nu-
 „ mero infinities esse plures pro quovis gene-
 „ re combinationes inordinatas , quæ exhibeant
 „ incertum chaos , & massam temere volitan-
 „ tium punctorum , quam quæ exhibeant mun-
 „ dum ordinatum , & certis constantem per-
 „ petuis legibus . „

Materia
mundi
non e-
manavit
ex divi-
na sub-
stantia.

XXIII. *Materia mundana non est orta per emanationem ex ipsa substantia divina.* Si materia mundana emanasset ex ipsa substantia divina , tum materia mundi vel esset formaliter ipsa substantia divina , vel quædam ejus particula , vel denique ex ipsa quocumque modo orta ; atqui omnia hæc evidenter absurda sunt : primum , quod iis placet , qui exemplo aranei telæ materiam e sinu educuntis hac in re utuntur , nec non & alterum pugnat cum simplicitate , & unitate , quæ competit enti necessario , & infinito (ont. §. 114. 174. 234. 238.) , quod Deus est ; materiam enim mundanam non una , sed plures substantiæ constituent , cum mundus sit ens compositum (§. 8.) . Ultimum vero falsum esse inde patet , quod nec unum quidem ens simplex ex alio ente simplice oriri possit (ont. §. 184.) ; inde quippe clarum est , ens compositum , quod ex multis entibus simplicibus coalescit (ont. §. 177.) , ex ente simplici multo minus oriri posse : igitur materia mundana non est ex Deo per emanationem orta.

*Dissert.
de creat.
ex nihilo.*

SCHOL. Impia hæc opinio non multum remota videtur a Pantheismo , quem infra refutabo : in ejus defensoribus numerat Moshemius Orpheum , Hesiodum , & Pythagoræorum plurimos ; his ex schola juniorum Platoniorum ad-

jun-

jungit Plotinum, Porphyrium, Jamblychum; qui propalam docuisse feruntur, mundum ex ipsa divina natura ab æterno fluxisse, ac divinæ idcirco essentiæ partem quamdam esse. Idem de Origine, quem vanis horum philo-
 sophorum commentis nimium abreptum fuisse constat, testantur Methodius apud Photium, & Huetius.

Bibl. cod. 235. p. 934. In Origin. gen. l. 2. q. 12. 9. 14. Mundus est creatus.

XXIV. *Mundus hic ortus est per creationem.* Nec mundus, ut series entium connexorum (§. 14. 18.); nec materia mundana a se, & absque causa sufficiente æternum existit (§. 19.); nec denique ista ex divina substantia emanavit (§. præc.): igitur quidquid ad mundum pertinet, ita nunc existit, ut ante sui productionem nihil prorsus illius exstiterit; sed quod tale est, oritur ex nihilo, idque fit per creationem (ont. §. 180.): ergo mundus hic ortus est per creationem.

COROLL. Cum, ut in theologia docebitur, vis creandi aliquid soli Deo competat, patet mundum a Deo creatum esse, & ab ipso solo ut effectore pendere, atque inde tam certam esse Dei, quam mundi existentiam.

SCHOL. 1. Nec quemquam moveat, quod modum actionis creativæ finito nostro intellectu distincte concipere nequeamus; non enim factum, quod aliunde certo constat, propterea negari potest, quod modus, & ratio illius ignoretur (conf. ont. §. 148. sch. 2. n. 4. fin.). Id si animadvertisset auctor pestiferi libri Tellamed inscripti, vero nomine D. de Maillet, non tam audacter creationem materiæ negasset eo potissimum ex capite, quod illa captum humanum exsuperet. Sed quod addit, mirandum amplius: præstantissimos, rerumque physicarum insigniter peritos fuisse, qui abso-

Tom. 2. p. 69.

lute demonstraverint, materiam in nihilum redigi nequaquam posse, luculento sane argumento, eam creari quoque nequivisse, mirandum inquam; in re siquidem tanti momenti & rationes eas invictas, & præclarorum virorum nomina singulatim edicere oportuisset. Sed neque majus nobis facessit negotium estatim illud ab omni retro antiquitate usurpatum: *ex nihilo nihil*. Ansam equidem turpissimi hac in re erroris scitum istud omnibus Ethnicorum philosophis præbuit; dici enim vere potest, omnes universim illo alienum in sensum detorto impulsos creationem ex nihilo sustulisse, si unus dematur Hierocles cum paucis affectis ex Platoniorum juniorum familia, qui sæculo tertio veram sententiam a Christianis, quibuscum frequentius congressus fuerat, acceptam suæ inferuit philosophiæ. Nec quidquam momenti habent ea, quæ Cudworthus ad purgandos ab hac labe philosophos veteres attulit, ut in accuratissimis adnotationibus palam fecit Mosheimius; & aliunde evolventi opus laudatum facile patet, nimio veterum præcepta cum veræ religionis dogmatibus conciliandi studio abreptum fuisse virum doctissimum, indeque evenisse, ut non raro eorum sententiis alienam plane significationem subjecerit. Verus porro sensus dicti enunciati: *ex nihilo nihil fit*, est omnino multiplex, ut eodem in loco Cudworthus monet; 1.) nihil est sine causa efficiente; 2.) nihil se ipsum producit; 3.) nihil per vires naturales ex nihilo educi, aut in nihilum redigi potest; 4.) ex nihilo tamquam materia nihil fit, quo non efficitur, ut nihilum nequeat esse terminus a quo; 5.) nihilorum additione nihil obtinetur. Atque omnes hi sensus, ut per se clarum est, adeo creationem ex nihilo non impugnant, ut eam etiam quam maxime stabiliant; certe qui vel mundum ipsum, vel ejus materiam improductam statuunt, hoc axioma-

mate

Syst. in-
tell. c. 5.
sect. 20.

mate refutantur; in priore enim opinione series infinita entium contingentium absque causa efficiente; in posteriore mens, intelligentia, ratio ex nihilo prodixisset.

SCHOL. 2. At nondum tota de mundi ortu controversia hic terminatur; quærent nonnulli, ^{Quæ controversia de tempore creationis?} utrum mundo, tametsi creato, æternitas quædam communicata competere possit, aut fortasse reapse competat? seu ut clarius loquamur, utrum Deus creaverit mundum ab æterno, aut saltem creare potuerit? qua quidem in questione quod ad priorem partem attinet, philosophis Christianis ob sacrarum litterarum auctoritatem nullus dubitandi locus relinquitur; in altera vero definienda sententiæ non congruunt: multi tum ex peripateticis, tum ex recentioribus, ut Suavius, Darjesius, VVinklerus omnino arbitrantur potuisse mundum ab æterno creari, neque pugnare æternitatem cum creatione entis; alii contra & longe plures id fieri haud quaquam posse definite pronunciant: horum opinio ad veritatem propensior videtur.

XXV. Si mundus creatus est, aliquando non existit. Si mundus creatus est, tunc productus est ex nihilo, & translatus de non esse ad esse (ont. §. 180.); sed quod ex nihilo productum, & de non esse ad esse translatus est, aliquando non habuit esse, seu aliquando non existit: ergo si mundus creatus est, aliquando non existit. ^{Quod creatur, aliquando non fuit:}

XXVI. Si mundus æternus est, semper existit. Si mundus æternus est, tunc mundus nec initium, nec finem existendi habere potest; est quippe æternitas duratio utrinque infinita (ont. §. 212.); sed quod nullum initium, nec finem existendi admittit, semper existit, si nimirum vel aliquando existat: ergo si mundus æternus est, semper existit. ^{quod æternum est, semper fuit:}

inde re-
pugnat
inun-
dum
creari
ab æter-
no.

XXVII. *Mundum creari ab æterno absolute repugnat.* Absolute repugnat, ut mundus semper existerit, & aliquando non existerit (ont. §. 37.); sed si mundus creatus fuisset, aliquando non exstitisset (§. 25.), & si simul esset æternus, semper exstitisset (§. præc.): ergo mundum creatum, & æternum esse, seu mundum creari ab æterno absolute repugnat.

COROLL. Cum igitur mundus productus est; initium existendi habuit; eaque propter dicimus mundum creatum esse & in tempore, & cum tempore: in tempore nimirum imaginario; cum tempore reali. (conf. ont. §. 211. sch.).

SCHOL. Miro prorsus argumento utitur. VVinklerus, quo opinionem contrariam stabilit: fieri posse ait, ut aliquid creetur ab æterno, propterea, quod ortus ex nihilo omnino temporis expers est; quasi vero id in quæstione versaretur, utrum creatio tempore indigeat? nemo sane eam momento individuo absolvi negaverit. Verum per hoc quærenti, an mundus creatus æternus esse possit? minime satisfaciet: hoc nempe loco ostendendum erat, æternitatem cum creatione entis non pugnare, posseque ens, quod per creationem existentiam adipiscitur, initio existendi carere. Sed & alia sunt, quæ adversæ partis patroni proferunt; his jam respondebo.

Cosmol.
1. 510.

Respon-
derus
object o-
nibus.

1.) Ajunt Deum absoluta naturæ suæ necessitate voluisse existentiam mundi, unde consequens esset, ut mundus æque, ac ille, æternus sit; assertum probant: Deus absoluta naturæ suæ necessitate cognovit possibilitatem mundi: ergo eadem necessitate ejus existentiam voluit, conf. p. Ideo primum: quia intellectus divinus est potentia necessaria; sed etiam voluntas est similiter necessaria: igitur si illud, etiam hoc.

B, Af.

2. Assertum veritati nequaquam consentaneum est; unde ad prob. c. ant. n. con. Deinde d. M. quia intellectus est potentia necessaria quoad omnes suos actus, c. M. quoad aliquos tantum, n. M. sic d. m. voluntas Dei est necessaria quoad actus internos, c. m. quoad actus externos, n. m. & con. Cum Deus sit ens infinitum, nequit aliud objectum necessarium suarum operationum habere, nisi pariter infinitum, id est, se ipsum. Se ipsum igitur necessario cognoscit, ac in se necessario videt suam omnipotentiam, quæ cum possibilitate omnium entium tamquam cum suo termino connectitur; unde in sua omnipotentia eadem necessitate cognoscit omnia possibilia. Deinde se ipsum, utpote bonum infinitum, necessario amat, quod ad voluntatem pertinet, quatenus illa agit *ad intra*, ut ajunt theologi. Quod autem ad ea, quæ Deus extra se agit, spectat, non eodem modo se habet ejus voluntas; est enim liberissima, ut aliquid, vel nihil, hoc vel illo tempore procreare decernat. Et ratio est: quia 1. Deus se ipso beatissimus, ac perfectissimus est; nec ulla re extra se existente eget; 2. res extraneæ non continent bonitatem infinitam, quæ ipsum in sui amorem necessario raperent; 3. nec denique ex rerum procreatione, aut existentia quidpiam felicitatis, voluptatis, commodi, aut gloriæ internæ eidem accrescit. Accedit, quod si Deus non cognosceret omnia possibilia, non polleret intellectu infinite perfecto, cum ad hoc requiratur, ut actu cognoscat, quidquid cognosci potest; possibilitas autem entium sit quoque objectum cognoscibile. Contra habet Deus potentiam infinite perfectam, si modo possit efficere, quidquid est possibile; neque enim ad conceptum omnipotentia pertinet actu omnia possibilia efficere; ut alias dictum est (ont. §. 36. cor. 2.).
- 2.) Deus ab æterno habuit potentiam creandæ

Theolog.
nat. f. 2.
c. 2. §.
123.

mundum; mundus item ab æterno fuit habilis ad existendum: ergo nulla est repugnantia in eo, ut mundus creetur ab æterno. Huc fere recidit argumentum Dariessii. Addunt alii: potuit mundus a Deo creari ante omne temporis, imaginarii nimirum, momentum distributive sumtum: igitur etiam potuit creari ante omne temporis imaginarii momentum collective sumtum, quo casu æternus foret.

Q. d. ant. ac id utrumque cum initio existendi, c. ant. sine initio existendi, n. an. & con.
Cum creatio sit productio rei ex nihilo, seu ejus translatio de non esse ad esse, ac proinde necessario exigit, ut res, quæ creatur, ante non existeret, tumque, cum creatur, existere incipiat, Deus a tota æternitate non habuit aliam potentiam creandi mundum, quam eam, quæ efficere possit, ut mundus per creationem initium existendi obtineat; neque mundus a tota æternitate aliter habilis fuit ad existendum, quam cum aliquo existentia initio: Nihil igitur seu ex potentia Dei, seu ex habilitate mundi, licet utraque æterna, colligi potest pro æternitate mundi. Quod autem ad alterum, manifesta est dispar ratio: in priori siquidem casu nulla prorsus contradictio latet; nam potuisse mundum ante quodvis temporis momentum distributive sumtum conditi aliud non sonat, quam in tempore imaginario infinito nullum momentum assignari posse, ante quod non potuisset mundus a Deo effici, ita nempe, ut in illo habuisset initium existendi, quod adhuc infinita momenta antecessissent. At vero in posteriori aperta est repugnantia; qui enim ponit mundum potuisse ante omne temporis momentum collective sumtum creari, hoc ipso mundum creatum expoliat initio existendi, quemadmodum omne temporis momentum collective sumtum, id est, totum tempus imaginarium, quod infinitum est, initio destituitur.

tur. Neque obest, quod mundus creatus possit durare in æternum; ad creationem enim, & ad naturam effectus creati nihil refert, diu ne, an brevi duret, sed tamdiu durat, quamdiu conservatur: verum creatio, cum siteductio rei ex nihilo, absolute requirit, ut effectus creatus habeat initium existendi; unde mundus creatus non potuit similiter durare ab æterno.

- 3.) Causa efficiens nequaquam tempore, sed natura solum præcedit suum effectum (ont. §§. 139. 140.): igitur si causa efficiens est æterna, etiam effectus poterit esse æternus; atqui Deus est causa efficiens æterna: ergo & mundus poterit esse æternus.

Re. d. ant. Causa efficiens formaliter sumpta non tempore, sed natura solum præcedit effectum, *c. ant.* Causa efficiens materialiter sumpta, saltem semper, *n. ant.* (vid. §§. trad.) . Tum *d. conf.* ergo si causa efficiens materialiter sumpta est æterna, etiam effectus potest esse æternus, *n. conf.* ergo si causa efficiens formaliter sumpta est æterna, potest etiam effectus esse æternus, *subd.* hanc partem: si ea causa æterna sit simul efficiens *pro æterno*, *con.* si sit solum efficiens *pro tempore*, *neg.* hanc partem; denique sic *d. m. subs. n. conf.* Causam in se & materialiter spectatam posse tempore prius existere, quam effectum, dictum est in ontologia; quin id imprimis in omnibus causis creatis necessario evenire mihi certum videtur; quomodo enim causa eo ipso momento individuo, quo ipsa producit, jam agere possit? profecto actio causæ productæ concepi nequit, nisi ut reapse consequens actionem, qua ipsa producit: quod si vero ita; jam adest successio, ac proinde tempus. Deinde de causa increata, sive Deo efficiente effectum a se distinctum res est multo magis manifesta; cum enim Deus nullum existendi initium habere possit,

id vero, quod ipsius voluntate de nihilo ad aliquid, de non esse ad esse transfertur, necessario initium existendi habere debeat, necesse quoque est, ut ipse revera ante omnes effectus a se creatos existat. Quod addidi, Deum esse causam efficientem æternam quidem, sed non pro æterno, paullo post illustrabo. Interea hic probe notari velim, me impossibilitatem creationis ab æterno immediate, & per se nec ex notione causæ efficientis, nec ex notione effectus, nec ex notione dependentiæ effectus ac causæ; sed ex sola notione creationis, quæ productio rei ex nihilo est, collegisse: unde, quid quid de his sit, nihil omnino efficient adversarii, donec palam fecerint, in notione creationis initium existendi non includi. At. at jam proferunt quidpiam.

4.) Creatio, inquiunt, sensum disjunctivum continet: ita ut vero sensu creatum dicatur omne illud, quod aliquando vel reipsa fuit nihil, vel tantum fuisset nihil, si non fuisset creatum; hoc autem posito jam necesse non est, ut, quidquid creatur, initium existendi actu habeat. Et quid vetat, adjungunt alii, ut creatio definiatur per *productionem entis per se non existentis*?

5. Quia ita ratiocinantur, duas res maxime diversas imperite confundunt, creationem nimirum, & conservationem, quæ tamen communis philosophorum suffragio discernenda sunt. Nimirum actio Dei, quæ existentiam entis a se distincti efficit, vel tendit in ens existens; vel in ens non existens: medium certe non datur: hæc *creationis*; illa *conservationis* nomine venit. *Creare* itaque est efficere, ut id, quod nondum existit, existentiam acquirat; *conservare* est efficere, ut id, quod jam existit, existentiam porro continuet; ex quo simul patet, conservationem alicujus entis præexigere creationem illius, quam ob rem definiatur

nitur

nitur esse *continuata creatio*. Si igitur mundus numquam reapse fuisset nihil, numquam fuisset creatus, sed perpetuo conservatus a Deo, & vel hoc ipso simul non conservatus, quia nulla præcessisset creatio, quod novam repugnantiam involvit. Quod vero ad definitionem creationis supra allatam attinet, puto eam omnino vitiosam esse; primum quidem, quod non solum ultima verba otiose adjecta sunt (quis enim ignorat ens per se existens non produci?): verum etiam, quod eadem verba sensum valde dubium continent; videntur certe innuere, productionem generatim acceptam induas species (in productionem videlicet entis per se existentis, & in productionem entis per se non existentis) legitime tribui posse. Ita exempli causa, cum dico: *generatio est actio; per quam ens compositum oritur*: utique tacite innuo dari quoque aliam speciem actionis, per quam ens simplex oriatur. Atque hujus rei ratio est, quod omnis legitima definitio generis proximum postulat (§ 87. sch. 2. l. 3. log.). Deinde ea definitio latior est suo definito contra (§ cit l. 2.); convenit enim eadem plane ratione etiam generationi. Profecto quoties aliquid generatur, toties producitur ens per se non existens. Pone ab artifice ex partibus ante fabricatis per earundem nexum datum horologium confieri: nonne ajes horologium (ens utique per se non existens) produci? Denique missis his sic arguo. Productio entis (adde, si placet, per se non existentis) vel est productio entis jam antea existentis, vel non existentis? Si primum: non est productio; nam productio est actio, per quam ens oritur: quod vero jam existit, non oritur. Si alterum: tum rursus productio ista vel est productio entis prorsus non existentis, vel est productio entis solum quoad se (non tamen quoad partes) non existentis; si istud: hæc

pro-

productio dicetur generatio; si illud: creatio. Atque inde manifestum fit, unicam legitimam definitionem creationis esse hanc: *productio entis ex nihilo*: nec cogitari posse aliam.

5.) Deus ab æterno voluit mundum: ergo mundus est æternus. Et certe posita ratione sufficiente ponitur rationatum; sed voluntas Dei, quæ est ratio sufficiens mundi existentis, posita est ab æterno: ergo etiam mundus positus est ab æterno.

3c. d. ant. Deus ab æterno voluit mundum *pro tempore*, *c. ant. pro æterno*, *n. ant. & conf.* Ad alterum rursus *d. M.* posita ratione sufficiente ponitur rationatum, eo nempe momento, pro quo ejus existentiam ratio sufficiens exigit, *c. M.* statim eo momento; quo ipsa existit, *subd.* si illa ratio non respiciat aliud determinatum momentum, *c. M.* si respiciat, *n. M.* sic *d. m. n. conf.* Deus ab æterno decrevit mundum condere; at ita, ut ille certo temporis momento initium existendi capiat: primum: quia, quidquid vult, ob suam immutabilitatem ab æterno vult: alterum: quia nequit velle contradictoria; est autem contradictorium, ut res creata initio existendi careat. Atque ideo dicimus Deum ab æterno, verum non pro æterno, sed pro tempore voluisse mundi existentiam. Idem accomodandum est ad id, quod additum fuit: nempe voluntas Dei non est aliter ratio sufficiens existentia mundi, quam quatenus ea ab æterno respexit determinatum temporis momentum, quo mundus existere incipiat, atque ideo is nec antea existere, nec æternus esse debuit. Nihil igitur contra stabilitatem alias de principio rationis sufficientis doctrinam admittimus. Ceterum argumentum ab æterna Dei voluntate petatum nimium, adeoque secundum pervulgatum axioma, nihil probat; sequeretur enim omnem rem successionem absolute repugnare, ac omnia,

nia, quæ Deus ab æterno voluit, simul coexistere debere.

6.) Si Deus voluisset mundum in tempore, fuisset mutatus: igitur etiam mutatus est, cum creavit mundum in tempore; id autem pugnat cum infinita ejus perfectione. Sicut nimirum in priori casu ex non volente factus fuisset volens, ita in posteriori ex non creante factus est creans.

De c. ant. n. conf. Si Deus in tempore aliquid veller, quod ante non voluit, mutaretur ipse status internus; istud enim in ipso argueret aliquam ignorantiam vel rerum ipsarum, vel motorum, aut inconstantiam, & quamdam animi levitatem, quæ omnia de infinita illius perfectione plurimum detraherent. Contra cum Deus in tempore mundum creavit, nihil illi ad statum internum pertinens aut accessit, aut decessit; cum enim id ab æterno jam constituerit, solum relationem quæpiam, & externam *creatoris* denominationem per novam mundi in tempore existentiam obtinuit. Omnis igitur vera mutatio, quæ hic contingit, se tenet ex parte rei creatæ, quæ existere incipit; ipsum autem illud voluntatis imperium, quo hoc efficitur, jam ab æterno in Deo inerat: nondum tamen dici poterat creator, quia ad relationem completam necesse est, ut non modo ejus subjectum, sed & terminus realiter existat. Nec obest, quod denominatio creantis referatur aliqua ratione ad operationem omnipotentia, quæ est perfectio Deo interna; nam ipsa hæc operatio omnipotentia involvit terminum externum, rem nempe creandam, estque de ea, sicut de voluntate Dei ratiocinandum. Quidquid in hac operatione ex parte omnipotentia, atque ipsius Dei se tenet, id perpetuo erat in Deo, quod vero pertinet ad terminum, id in tempore contingit, id est, terminus, seu mundus ab omnipotentia effectus
in

in tempore existere incepit. Sicut igitur Deus ab æterno voluit mundum pro tempore per suam voluntatem; ita eundem ab æterno pro tempore per suam omnipotentiam operatus est; & sicut nec ob æternam Dei voluntatem mundus æternus esse debuit, nec per novam in tempore mundi existentiam illius voluntas mutata est; ita nec ob æternam omnipotentiam operationem mundus æternus esse debuit, nec per novam mundi existentiam omnipotentia mutationem passa est. At, inquis, quis inusitatus hic operandi modus? verum cogita, Deum non fore Deum, si tu intelligentia tua arctis nimium constricta limitibus infinitas ejus perfectiones, & perfectissimum agendi modum comprehendere posses. Atque inde patet, quid respondendum sit captiose quærentibus, utrum Deus ab æterno reipsa, & actu fuerit mundi opifex, an solum in potentia? Utrumque nempe fuit, sed diversa plane ratione: *actus* fuit mundi opifex spectata ratione interna, quæ in æterno voluntatis decreto, & in æterna pariter omnipotentiam operatione consistit: *in potentia* vero spectata ratione externa, ob quam est, & dicitur mundi opifex, quæque aliud non est, quam ipse mundus ob æternum voluntatis decretum, ac æternam omnipotentiam operationem ex nihilo prodicens. Non tamen propterea revera mutatus est; non enim alio sensu *ex potentia in actum* transivisse dicendus est, quam quod relatio realis ad res creatas per realem mundi existentiam completa fuerit.

Ad extremum ajunt cum Epicuro: cur igitur Deus tanto tempore seriatu est? Cur non citius mundum condidit? vel non potuit antea, arguatur profanus auctor, vel non voluit? Si non potuit: numquam potuisset postea; si non voluit, eccur deinde voluit? Et si aliquando voluit, semper voluit, cum in ipso volitionum successio nulla detur. Verum nugæ

hæ

hæ sunt : voluit certe Deus semper , sed non pro semper ; at cur pro hoc potius , quam alio tempore ? Quia id a liberrimo ipsius arbitrio pendebat . Certe quodcumque statuas tempus , statuendum autem necessario est aliquid , cum creatio ab æterno repugnet , semper redibit eadem quæstio , quam non enodabis nisi recurrendo ad summam Dei libertatem . Hac de tempore imaginario mundi ortum antecedente : quod si de reali quæras , respondebo cum Moshemio : „ Nullus cum sit temporum „ ordo in æternitate , stultum , & ineptum „ est sciscitari , cur hoc potius , quam alio „ tempore supremum Numen hanc rerum uni- „ versitatem construxerit ? Quod qui sibi vult „ explicari , is proprie rationem sibi reddi cu- „ pit , quamobrem tempus non fuit , antequam „ esset tempus : quod merito absurdum , & in- „ fictum dixeris . „

In:
Cudvvorth
Syst. in-
tell. c. 5.
f. 5. 6.
22. not.

C A P U T III.

De Fato.

XXVIII. *Fatum* proprie dictum est necessitas absoluta , & immutabilis , quæ omnium rerum contingentia , ac libertati adversatur . Quid fatum?

SCHOL. Nihil fato pervulgatum magis apud veteres ; sed nihil etiam obscurius : multi eo ad libertatem cum humanam , tum divinam protus tollendam abusi sunt ; alii id cum utraque optime conciliari posse arbitrabantur . Vide Gassendum (a) . Cudvvorthus (b) omnes facti assertores in tres potissimum classes distribuit : primam illi tenent , qui Deum res omnes , nulla motuum voluntariorum ratione habita ,

Quam diversa de eo veterum opinio?
(a) *Ethic. l. 3. c. 2.*
(b) *Syst. intell. c. 1. §. 2.*

bita, æterna, ac immutabili lege sanxisse docent, unde consequens foret. nihil a nobis libere suscipi posse; alteram ii, qui Deum fataliter, ac necessario agentem res hujus universi omnes generatim disposuisse, ac descripsisse opinantur, qua generali constitutione facta omnia, quæ in orbe eveniunt, ex concatenata quadam causarum serie profiscerentur; tertiam denique: qui sublato Deo physicam quamdam rerum omnium necessitatem statuunt, quam Epicurus τῆς τῶν φυσικῶν ἀναγκῆς, *physicorum fatum* appellabat, rectius dixisset τῶν ἀδύτων. Tum in altera harum classium reponit Stoicos, ac præcipue Zenonem, & Chrysippum; sed fugisse videtur virum doctissimum, quod de Chrysippo tum Tullius (a), tum Aulus Gellius (b) testantur: eum ex fato excipisse voluntates humanas, easque docuisse & liberas esse, & præmium, poenamque propterea mereri posse. Idem de Platone Plutarchus memoriæ prodidit (c): „ Plato, inquit, fatum quidem in hominum vitas, & actiones introducit, sed & voluntatis libertatem cum eo conjungit. „ Id quod Alcinoüs uberius declarat (d): „ Omnia in fato sunt, ait Platon, sed non omnia fato decreta sunt; fatum enim cum sit legis instar, non tamen ita agit, ut verbi gratia dicat hunc hoc futurum, illi rursus hoc eventurum esse; sed sic potius: quæcumque anima talem vitam elegerit, & ejusmodi egerit, hæc consequetur. „ Interea tamen, observante Mosheimio in Cudworthum multa Plato alias statuit, quæ ægerrime cum libertate humana conciliari possunt: quod nobis documento esse potest, veteres illos philosophos non semper coheræntia inter se protulisse, & frequenter dogmatum suorum confectaria laud pervidisse; quod fit, ut raro, quid vere senserint, ad liquidum deduci possit. Restat & alia fati acceptio

& Pla-

(a) De
fato c.

27. seqq.

(b) Noct.

attic. l.

6. c. 2.

(c) De

plac

phil. l. 2.

6. 27.

(d) In-

rod. in

doctrin.

Plat.

Loc. cit.

& Platoni, & aliis pluribus usitata; Deum nimirum supremum hoc vocabulo denotare ipsis solenne fuit. „ Interdum Deum, ait Cicero, ^{22. 46.}
 „ necessitatem appellant: quia nihil aliter pos- ^{1. 6. 7.}
 „ sit, quam ab eo constitutum sit, inter quasi
 „ fatalem, & immutabilem continuationem
 „ ordinis sempiterni. „ Auctor libri de mun-
 do alias Aristoteli adscripti diserte ait: „ Deum
 „ ἀνάγκην vocari, ut qui sit res immutabilis, ^{C. 7.}
 „ συμπλεκόμενον vero, ut qui conjungere omnia,
 „ & continere nullo impediēte valeat. „
 Res hæc in Stoicorum scriptis vel mediocriter
 versato ignota esse non potest; nominatim de
 Panætio, & Posidonio Plutarchus, & Stobæus;
 de Platone Proclus; de Heraclito, quem alii
 atheis adnumerant, Livius Galantes testantur;
 consuli quoque possunt dux eruditissimæ dis-
 sertationes Gothofredi Olearii *de rerum gene-
 si*, & *de igne rerum omnium principio ex
 mente Heracliti*, quæ in versione latina hi-
 storiz philosophicæ a Stanlejo adornatæ ex-
 stant. Sed quamquam fatum adeo universe,
 licet non eodem sensu, a philosophis fuerit
 adoptatum, nonnulli tamen illud cum risu ex-
 ploferunt: horum agmen duxit Anaxagoras a-
 cerbe propterea ab Alexandro Aphrodisæo re-
 prehensus: „ nihil eorum, agebat, quæ sunt, ^{L. de}
 „ fato fieri, sed hoc inane vocabulum esse, ^{fato.}
 Jam præcipua fatorum genera nominatim per-
 sequar, ubi rursus occasio se offeret de diversa
 fati significatione differendi.

XXIX. *Fatum Democriti* est ἀνάγκη ὅλων, ^{Quid}
 necessitas materiæ, qua fit, ut omnia cum ^{fatum}
 absoluta necessitate existant: quæ necessitas ^{Demo-}
 ex profano atomorum systemate supra (S. ^{criti?}
 20. sch.) exposito per sese consequitur. Est
 enim rapidissimus ille atomorum motus, quem
 ἀνάγκη, id est, necessitatem Democritus com-
 pellat, causa ortus omnium rerum; hæc ne-
 cess-

(a) De necessitate ipsi fatum est, & iustitia, & providentia, quæ mundum condidit æque, ac gubernat, quæque aliud non est quam *resistentia*, latitudo, & percussio materiæ. Vid. Laertius (a), item Stobeus (b).

elog.

phys. c. 2.

Quid

fatum

Epicuri?

Hist.

phil. l.

2. c. 6.

SCHOL. Et si Epicurus idem atomorum systema adoptavit, istud tamen fatum probare noluit; ipsi enim fatum, quod ex Laertio, Cicerone, & Gassendo apud Stanlejum discimus, aliud non fuit, quam nexus quidam causarum posteriorum cum prioribus, quem tamen ea necessitas, quam physici inducere volebant, haudquaquam comitaretur: id genus quippe necessitatem abruptendam opinabat, a motu declinationis atomorum, qui nec certo tempore, nec certa loci regione eveniret. „ Hanc rationem (declinationem nimirum atomorum). „ Epicurus induxit ob eam rem, ne si semper atomus gravitate ferretur naturali, ac „ necessaria, nihil liberum nobis esset, cum „ ita moveretur animus, ut atomorum motu „ cogeretur. „ Injuria igitur in libertatis hostibus a quibusdam numeratur Epicurus; quia & apertius alias liberum arbitrium, seu eligendi facultatem tum experientia, tum sensu communi, tum vel maxime propterea, quod homo secus nec laude, nec vituperatione dignus esse queat, ab eo stabilitum fuisse auctor est Stanlejus.

Cic. de
fate. c.
10.

Lec.
laud.

Factum
Democriti
non potest
sustineri.

XXX. *Fatum Democriti nulla ratione sustineri potest.* Imprimis enim ponuntur atomi improductæ, & æternæ, atque ex fortuita earum concursione exorta fuisse corpora mundana, quæ omnia a veritate abhorrent (§§. 21. 22.). Deinde evertitur libertas voluntatis humanæ, quam gravissimis argumentis inpsychologia constabiliemus.

Quid
fatum
Stoicorum?

XXXI. *Fatum Stoicorum est necessaria quædam,*

dam, ac non interrupta caussarum, effectuumque series constituta a voluntate Dei necessaria, ac immutabili sine ulla ad propensiones, voluntatesque humanas accommodatione.

SCHOL. De hoc Stoicorum fato mirum quantum eruditorum opiniones discrepant, quod *varium* ego quidem partim solitæ scholæ hujus dissensionem (§. 21. log.), partim dubiis, & præcis eorum locutionibus tribuendum arbitror. Qui concatenatam illam caussarum seriem a Stoicis propugnatam fuisse docent, testimonio Senecæ nituntur: „ Eadem necessitas, inquit ille, & Deum alligat; irrevocabilis divina pariter, & humana cursus vehit: ille ipse omnium conditor, ac rector scripsit quidem facta, sed sequitur; semper paret, semel justus. „ Horum igitur opinione Stoici fatum quoddam extra Deum statuerunt, cui ipsa quoque illius voluntas subiceretur. His vetustissimus poeta facem prætulisse videtur, cujus effectum ita vertit Cicero; „ quod fore paratum *De diva l. 2. c. 10.* „ est, id summum exsuperat Jovem; „ cui consonat oraculum Cræsi legatis a Pythia editum, ut refert Herodotus: „ ne ipse quidem *Hist. l. 2. c. 91.* „ Deus, quæ fato decreta sunt, effugere possit. „ Verum merito creditur, absurdam hanc doctrinam, quæ ex antiquissima de Paræcis, Diis leges scribentibus, fabula ortum duxit, oppido paucorum fuisse; certe abhorruit ab ea Balbus apud Tullium: „ Non est natura *De natura sur. De or. l. 2. c. 3.* „ Dei præpotens, & excellens, si quidem ea subjecta est ei vel necessitati, vel naturæ, quæ cælum, maria, terræque reguntur; nihil autem est præstantius Deo: nulli igitur naturæ obediens, aut subjectus est Deus: „ Abhorruerunt quoque Zeno, qui fatum aliud non esse docuit, quam vim naturæ secundum eadem motricem, non multum a providentia

distantem; Panætius, qui fati nomine Deum;
 Chrysippus, qui vim spirituales hoc univer-
 sum gubernantem intellexit, de quibus consu-
 latur Aulus Gellius. Atque inde eruditorum
 nonnulli in eam ivierunt sententiam, ut puta-
 rent Stoicorum fatum, quod sæpius *προνοία* ap-
 pellarunt, reapse a Christianorum providentia
 non discrepare, nec quidquam ab iis libertati
 aut divinæ, aut humanæ adversum traditum
 fuisse: hæc opinio ut in Justo Lipsio (a) præ-
 clarum defensorum, ita in Thomasio (b) acrem
 adversarium nacta est; hic enim omnes uni-
 versim Stoicos atheismi condemnat, quod qui-
 dem iudicium non potest non esse iniquissi-
 mum. Sunt denique, qui putent Stoicos om-
 nem fati vim in eo reposuisse, ut nihil fiat
 sine causa, utque omnia, quæ eveniunt, ex
 causis antegressis sequantur, quod alii liberta-
 ti obesse, alii optime cum ipsa conciliari, quo-
 rum caput Chrysippus erat, autumabant: vid.
 Stanslejus.

Not. at-
 tac. l. 2.
 c. 6.

(a) *Phy-
 sol. Sto-
 ic. l. 1.
 diff. 2.
 (b) De
 existent.
 mundi
 Stoic.
 diff. 13.*

*Histor.
 phil. t. 2.
 p. 640.*

Fatum XXXII. *Fatum Stoicorum* (S. præc.) *defi-
 nitum defendi nequit.* Hoc quippe non modo
 Stoicum cum libertate humana, quam alias vindicabi-
 mus, verum etiam cum libertate divina; tum
 & cum infinita illius perfectione, ac absoluta
 ab omni alio independentia pugnat.

Quæ
 huic si-
 milia
 fata?

*De fato
 s. 12.*

SCHOL. Dum de Stoicorum fato sermo est, eos
 præterire non possum, qui inter Christianos e
 divina prænotione fatum simillimum exscul-
 punt. Utuntur hi ignava illa Stoicorum ratio-
 ne, ut ait Cicero, substituta solum in fati do-
 cum æterna prænotione: „ appellatur enim ,
 „ ait ille, quidam a philosophis *ἀπὸ τοῦ λόγου* ,
 „ cui si pareamus, nihil est omnino, quod
 „ agamus in vita; sic enim interrogant: si fa-
 „ tum tibi est ex hoc morbo convalescere; si-
 „ ve tu medicum adhibueris, sive non adhi-
 „ bue-

si bueris, convalesces. Item, si fatum tibi est
 „ ex hoc morbo non convalescere; sive tu me-
 „ dicum adhibueris, sive non adhibueris, non
 „ convalesces. Et alterutrum fatum est: medi-
 „ cum ergo adhibere nihil attinet. „ Ita hi
 similiter argumentum concludunt: si Deus, in-
 quunt, ex omni æternitate prænovit fore, ut
 ex hoc morbo convalescas, sive medicum ad-
 hibueris, sive non: convalesces, & sic porro.
 Ad hos quam proxime accedere Leibnitium
 cum suis jam pridem contendunt Nevvtoniani,
 neque istud temere; quid enim vetat ex Leib-
 nitii principiis ita argumentari: si in se me-
 lius est, ut convalescas, Deus id ab æterno &
 cognovit, & elegit: igitur convalesces, sive
 medicum adhibueris, sive non; item si melius
 in se est, ut non convalescas, Deus id ab æter-
 no novit, & elegit: igitur non convalesces,
 sive medicum adhibueris, sive non. At alteru-
 trum in se melius est. medicum ergo adhibere
 nihil attinet. Jam vero de determinatione Dei
 ad optimum eligendum infra viderimus; nunc
 nodus perdifficilis olim Ciceroni visus expli-
 candus est, claraque in luce constituendum, ex
 æterna Dei prævisione nihil sequi, quod cum
 voluntatum nostrarum libertate pugnet, ut adeo
 necesse non sit vel cum Tullio, & qui cum
 recentioribus temporibus secutus est, Socino
 Dei prænotationem; vel cum Calvino humanam
 libertatem tollere. Id tamen probe adverten-
 dum, non quæri hic, utrum in Deo futuro-
 rum scientia, aut in nobis libertas insit: pro-
 priis in locis ista demonstrabuntur. Prævisio-
 nem solum Dei in se spectatam cum libertate
 humana optime conciliari posse ostendendum
 est: in se spectatam ajo, quo ipso innuere vo-
 lo, neque de decretis voluntatis divinæ sermo-
 nem haberi: hæc quippe ad sanctiorem theo-
 logiam pertinent.

Quis
 status
 questio-
 nis?

XXXIII. *Si actus a Deo prævisus pendet a libera determinatione voluntatis humanæ, prævisio Dei libertatem humanam minime lædit.* Si actus a Deo prævisus pendet a libera determinatione voluntatis humanæ, tum Dei prævisio relinquit homini potestatem sese libere determinandi ad actum ponendum; sed si prævisio Dei relinquit homini potestatem sese libere determinandi ad actum ponendum, tum prævisio Dei minime lædit libertatem humanam, utpote quæ in ea potestate consistit: ergo si actus a Deo prævisus pendet a libera determinatione voluntatis humanæ, prævisio Dei libertatem humanam minime lædit.

XXXIV. *Si non ideo actus ponitur in tempore, quia Deus illum ab æterno prævidit; sed si potius ideo Deus actum ab æterno prævidit, quia is in tempore ponetur, tum actus a Deo prævisus pendet a libera determinatione voluntatis humanæ.* Si non ideo actus ponitur in in tempore, quia Deus illum ab æterno prævidit, sed si potius ideo Deus actum ab æterno prævidit, quia is in tempore ponetur, tum prævisio Dei ad positionem actus nullo pacto requiritur, sed actus ita prorsus poneretur, tametsi per impossibile nulla esset in Deo prævisio; sed si prævisio Dei ad positionem actus nullo pacto requiritur, & si actus ita prorsus poneretur, tametsi nulla in Deo esset prævisio, actus a Deo prævisus pendet a libera determinatione voluntatis humanæ: ergo si non ideo actus ponitur in tempore, quia Deus illum ab æterno prævidit, & si potius ideo Deus actum ab æterno prævidit, quia is in tempore ponetur, actus a Deo prævisus pendet a libera determinatione voluntatis humanæ.

XXXV. *Non ideo actus ponitur in tempore, quia illum Deus prævidit ab æterno; sed ideo*

ideo Deus prævidit actum ab æterno; quia is ponetur in tempore. Cum nihili nulla sit scientia, omnis scientia aliquod objectum exigit, atque inde non objectum propter scientiam, sed scientia propter objectum est; sed si ideo actus ponitur in tempore, quia Deus illum prævidit ab æterno, tunc objectum foret propter scientiam; contra si ideo Deus prævidit actum ab æterno, quia is in tempore ponetur; tum scientia est propter objectum: ergo non ideo actus in tempore ponitur, quia illum Deus prævidit ab æterno, sed ideo Deus prævidit actum ab æterno, quia is ponetur in tempore. Evidens hoc est in scientia præteritorum, & præsentium: igitur eodem plane modo de futurorum scientia discurrendum. Vid. Boethius.

*De con-
sol. phil.
lib 5.
prof. 40*

XXXVI. *Actus a Deo prævisus pendet a libera determinatione voluntatis humanæ. Si non ideo actus in tempore ponitur, quia Deus illum ab æterno prævidit, sed si potius ideo Deus actum ab æterno prævidit, quia is in tempore ponetur, tum actus a Deo prævisus pendet a libera determinatione voluntatis humanæ (§. 34.); sed non ideo actus in tempore ponitur, quia illum Deus prævidit ab æterno, sed potius ideo Deus prævidit actum ab æterno, quia is in tempore ponetur (§. præc.): ergo actus a Deo prævisus pendet a libera determinatione voluntatis humanæ.*

XXXVII. *Prævisio Dei libertatem humanam minime lædit. Si actus a Deo prævisus pendet a libera determinatione voluntatis humanæ, tum prævisio Dei libertatem humanam minime lædit (§. 33.); sed actus a Deo prævisus pendet a libera determinatione voluntatis humanæ (§. præc.): ergo prævisio Dei libertatem humanam minime lædit.*

*Prævisio
Dei li-
bertati
nostræ
non of-
fendit.*

SCHOL. Sunt tamen, quæ incautis dubitationem Explic-
Storchenau Metaph. L. II. C in.

can'tur
dubia.

inijcere possent; sed non difficiles habent explicatus.

Ajunt 1. Actus, qui a Deo prævisi sunt, necessario ponuntur: ergo prævisio Dei libertatem nostram tollit; *ant. pr.* Actus a Deo prævisi non possunt a nobis omitti: igitur necessario ponuntur.

R. d. ant. Actus a Deo prævisi necessario *necessitate consequente* ponuntur, *c. ant. necessitate antecedente, n. ant. & conf.* Rursus ad probationem *d. ant.* actus a Deo prævisi non possunt a nobis omitti *potentia consequente, c. ant. potentia antecedente, n. ant. & conf.* Duplex in causis liberis agendi necessitas dari potest; una, quæ liberam ipsarum determinationem antecedit, ut cum quis vinculis constringitur, aut ab equo raptatur: altera, quæ eam liberam determinationem consequitur; ita qui se determinat ad ambulandum, necesse est, ut pedes moveat, domoque egrediatur. Illa libertati officit, hæc minime. Cum igitur actus a Deo prævisus nihilo minus a libera hominis determinatione pendeat, manifestum est, necessitatem, quæ ex æterna Dei prævisione profluit, esse solum consequentem; immo eam non tam prævisioni Dei, quam hominis determinationi tribuendam esse, cum fieri nequeat, ut id homo non agat, ad quod ipse se libere determinat. Atque inde quoque patet ratio alterius distinctionis: nempe potentia similiter *antecedens* alia, alia *consequens* cogitari potest; illam habeo ante meam liberam determinationem, & ope illius libere me determino ad hunc, vel illum actum ponendum, vel non ponendum: hanc haberem, si possem omittere actum, ad quem me libere determinavi, seu, reapse, si possem actum cum non actu componere; quod cum absolute fieri nequeat, patet potentiam hanc consequentem ad libertatem nequaquam requiri. Jam vero prævisio Dei pon-

ten-

rentiam antecedentem nobis non adimit; cum enim ipsa sit propter meam determinationem liberam, seu ab ea pendeat, ea non modo hanc determinationem, sed & potentiam, quæ hanc antecedit, intactam relinquit. Quod igitur actus a Deo prævisus omitti nequeat, id inde proficiscitur, quod nequeamus actus simul ponere, & omittere; unde, si prævisio Dei aliquam nobis potentiam aufert, ea consequens est, non antecedens. Neque vero obest, *ea certo, & determinate* futura esse, quæ Deus prænovit; magnum enim discrimen intercedit inter veritatem determinatam, & necessariam. Quod *necessario* futurum est, id ita est futurum, ut absque contradictione non possit non esse futurum; quod autem *determinate* solum futurum est, id ita est futurum, ut in se non repugnet, quo minus non futurum sit.

2.) Si actus a Deo prævisus aliqua posset ratione omitti, ipsa Dei prævisio falli posset; atqui hoc vehementer absurdum est: igitur nulla ratione actus a Deo prævisus omitti potest. *M. p.* Si actus a Deo prævisus actu omitteretur, actu falleretur prævisio Dei: igitur etiam si actus a Deo prævisus aliqua ratione omitti posset, prævisio Dei falli posset.

Ex. d. M. Si actus a Deo prævisus aliqua posset ratione omitti *pro sensu composito* prævisionis divinæ, ipsa Dei prævisio falli posset, *c. M. pro sensu diviso* prævisionis divinæ, *n. M. c. m.* & eodem modo *d. conf.* Prævisio tum solum fallitur, quando conjungitur cum omissione actus, quem prævidisse dicitur. Jam vero cum prævisio Dei de actu sequatur liberam hominis determinationem, numquam eveniet, ut ipsa cum omissione actus confocietur. Poterit equidem homo potentia antecedente actum omittere; at eo ipso aliter se determinabit, & aliter se determinando efficiet, ut prævisio de omissione actus in Deo sit. Si homo posset

potentia consequente actum omittere, posset omnino prævīſio Dei falli; at, cum non exſtet potentia ad actum ſimul, & ejus omiſſionem, hoc absolute fieri nequit. Poſteſt igitur homo omittere actum, non quidem *pro ſenſu compoſito* prævīſionis divinæ, id eſt, prout iſ jam a Deo prævīſus ponitur; ſed tamen *pro ſenſu diſiſo* ejusdem prævīſionis, id eſt, poſteſt prævīſionem Dei impedire, ac efficere, ut hæc prævīſio numquam in Deo fuerit. Accipe exemplum ab homine, quem ambulanti coram intueris: nonne fieri nequit, ut non ambulet, cum tu ambulanti vides? at eſtne propterea minus liber? nonne ambulationem intermittere poſteſt, eaque intermiſſa efficere, ne a te ambulans conſpiciatur? inde prona ſuit ad alterum reſponſio. Si actus prævīſus actu omitteretur, id fieret potentia conſequenti determinationem hominis ad actum, & prævīſionem Dei inde pendentem, ac proinde hæc prævīſio de actu ponendo conjungeretur cum illius actus omiſſione, quo ipſo falleretur: ab oppoſito, cum dicimus actum prævīſum omitti poſſe, id intelligimus de potentia antecedente, quemadmodum ſupra dictum eſt, quod ſit, ut prævīſio Dei non fallatur, ſed impediatur. Verum contra urgent.

3.) Prævīſio Dei per actus omiſſionem impediri nequaquam poſteſt; eſt enim ea hac omiſſione prior.

4. Negato aſſerto; rationem adjectam *d.* prævīſio Dei eſt prior *tempore* ipſa actus omiſſione, vel ipſo actu, & ſimul ab hoc pendens, *c.* prior *natura*, *n.* Prævīſio Dei non eſt natura prior, quia non eſt cauſa actus, nec ad illum efficiendum ulla ratione concurrat (ont. S. 145. ſch. 2.) Eſt tamen prior *tempore*, cum ob ſummam Dei perfectionem, ac immutabilitatem ab æterno in Deo inſit; verum hoc non obſtat, quo minus per ipſam actus omiſ-

omissionem impediri queat. Et ratio est: quia ipsa hæc Dei prævisio, licet tota æternitate prior actu, ab eo tamen velut suo objecto pendet, quare sublato objecto ipsa quoque tollitur. Immo cum non tam actus quoad suum *esse* physicum, quam quoad suum *esse* logicum prævisionis divinæ objectum, & quidem æque æternum, ac ipsa, sit, facile patet, quomodo subsidio hujus status logici æterna Dei prævisio impediri possit. Adverte igitur; Titius nunc disputet; hæc disputatio ab æterno erat futura, seu, ut ajunt, ab æterno habuit suam *futuretionem* formalem, quatenus hæc propositio: *Titius hoc tempore disputabit*, in se semper vera fuit, & ab intellectu divino a tota æternitate cognosci & potuit, & debuit. Jam vero si Titius nunc non disputaret, efficeret utique, ut hæc veritas ab æterno data non fuisset, (ideo quippe solum dabatur, quia actus in tempore certo, tamen si libere ponendus erat), immo ut data fuisset opposita, atque adeo efficeret ille simul, ut pendens ab hac veritate prævisio in Deo non exstiteret, sed potius opposita de omissione nimirum actus. Universim igitur prævisio Dei per actualem actus omissionem non quidem *immediate*, sed tamen *mediate*, mediante nimirum statu logico impediri potest.

4.) Quod futurum est ex hypothesi antecedente determinationem voluntatis humanæ, illud non est libere futurum; sed quod futurum est ex hypothesi prævisionis divinæ, illud futurum est ex hypothesi antecedente determinationem voluntatis humanæ; ergo.

3. d. M. Quod futurum est ex hypothesi antecedente determinationem voluntatis humanæ tam *ut existentem*, quam *ut futuram*, illud non est libere futurum, c. M. tantum *ut existentem*, & non simul *ut futuram*, n. M. sic d. m. n. conf. Licet determinatio voluntatis

tatis humanæ non ab æterno existerit, fuit ea tamen ab æterno futura, habuitque suum esse logicum, atque ideo etiam fuit illa objectum æternum prævisionis divinæ nostro cogitandi modo ipsa prius. Hinc autem conficitur hanc Dei prævisionem præcedere determinationem voluntatis humanæ re ipsa *existentem* tempore, non natura; determinationem vero eandem *ut futuram*, sive *logicam* neque tempore, cum ambæ simul æternæ sint.

Quid
fatum
Astrolo-
gicum?

XXXVIII. Fatum *Astrologicum*, sive *Genethliachum* est absoluta rerum omnium, ac eventuum necessitas ex cæli, siderumque situ, & immutabili eorundem actione oriunda.

Quæ e-
jus ori-
go?
De div.
l. 1, c. 1.

SCHOL. Fati hujus originem ita depinxit Tullius: „ Principio Assyrii, ut ab ultimis au-
„ storitatem repetam, propter planitiem, ma-
„ gnitudinemque regionum, quas incolebant,
„ cum cælum ex omni parte patens, atque
„ apertum intuerentur, trajectiones, motusque
„ stellarum observaverunt, quibus notatis,
„ quid cuique significaretur, memoriæ prodi-
„ derunt. Quæ in natione Chaldæi, non ex
„ artis, sed ex gentis vocabulo nominati, diu-
„ turna observatione siderum, scientiam pu-
„ tantur effecisse, ut prædici posset, quid cui-
„ que eventurum, & quo quisque fato natus
„ esset. „ Idem subinde a nonnullis ex Stoi-
corum, tum & Platoniorum juniorum familia
adoptatum, & præcipue a Plotino, Simplicio,
ac Origene exornatum fuisse Cudworthus au-
ctor est: verum hi postremi moderatione qua-
dam usi docuerunt, non quidem cælestia signa
vim quamdam hominibus inferre; ac Deum,
qui futura omnia prænoverit, ita ad ea side-
rum cursus, ac motus multiplices accommodas-
se, ut ex his de illis certæ divinationum
conjecturæ fieriqueant. Animadversionem me-

Syst. in-
tell. c. 1.
§. 2.

moratu dignissimam hoc loco adfert Moshe-
mius : notat imprimis vetustissimis populis per-
suasum fuisse, Dæmones, sive Deos inferiores
in sideribus habitare, eorumque cursus mode-
rari, quam opinionem Pythagoræ temporibus
ad Italos pervenisse putat, cum eorum aliqui
philosophum hunc velut unum ex iis, qui lu-
nam incolunt, Dæmonibus venerati sint, quod
Jamblychus testatur; tum iisdem nationibus
non minus certam fuisse sententiam, res hu-
manas Diis curæ esse. Atque ex his ita con-
cludit: „ Junge hæc duo: Dii rebus humanis
„ provident, & astra sedes sunt Deorum; nec
„ quæres, ut arbitror, amplius, unde ad in-
„ sanam hanc opinionem antiquissimæ gentes
„ delapsæ sint: astrorum lege, ac virtute,
„ quæ fiunt, universa fieri. „

Vis. Py-
thag.

XXXIX. *Fatum Astrologicum fatuum; & Fatum commentitium est.* Vel enim eventus ii solum, Astrolo-
qui ab arbitrio nostro non pendent, vel ii gicum
quoque, qui liberis voluntatibus subjiciuntur, nullum
ab astrorum actione, certaue positione pro- est.
fluere: hoc alterum esse nequit; læderetur
enim libertas nostra tot argumentis demon-
strata; neque ulla omnino inter voluntatis
nostræ determinationem, & astrorum situm
connexio cogitari potest. Sed neque primum:
novimus enim omnium eorum, quæ in tellu-
re nostra eveniunt, rationes sufficientes, &
causas efficientes in eadem reperiri, unde
non est, cur ad siderum aspectus confugia-
mus: turpe certe est philosopho relictis cer-
tis dubias causas comminisci. Fatuum igitur
est ex certa siderum positione de futuris re-
rum eventis, de virtutibus, vitiis, honori-
bus, dignitatibus, ipso denique vitæ, mortis-
que genere, & tempore divinare velle.

SCHOL. Ineptam hanc delirantium animorum *De div.*
persuasionem egregie refutavit Tullius Panætii *l. 2. c.*
43. seqq.

Stoicorum principis nomine : „ O deliratio:
 „ nem incredibilem ! non enim omnis error
 „ stultitia est dicenda . — — — Etenim
 „ cum , ut ipsi dicunt , ortus nascentium luna
 „ moderetur , eaque animadvertant , & notent
 „ sidera natalitia Chaldæi , quæcumque lunæ
 „ juncta videantur , oculorum fallacissimo sen-
 „ su judicant ea , quæ ratione , atque animo
 „ videre debebant . Docet enim ratio mathe-
 „ maticorum , quam istis notam esse oportet-
 „ bat , quanta humilitate feratur luna terram
 „ pæne contingens ; quantum absit a proxi-
 „ ma Mercurii stella , multo autem longius
 „ a Veneris . Reliqua vero tria intervalla in-
 „ finita , & immensa a Sole ad Martis , inde
 „ ad Jovis , ab eo ad Saturni stellam , inde ad
 „ cælum ipsum , quod extremum , atque ulti-
 „ mum mundi est . Quæ potest igitur conta-
 „ gio ex infinito pæne intervallo pertinere
 „ ad lunam , vel potius ad terram ? - - -
 „ Quid ? quod uno , & eodem temporis pun-
 „ cto nati dissimiles & naturas , & vitas ;
 „ & casus habent : parumne declarant , nihil
 „ ad agendam vitam nascendi tempus perti-
 „ nere ? - - - Quid ? illudne dubium est , quin
 „ multi , cum ita nati essent , ut quædam contra
 „ naturam depravata haberent , restituerentur ,
 „ & corrigerentur ab natura , cum se ipsa re-
 „ vocasset , aut arte , atque medicina ? Aut
 „ quorum linguæ sic inhærent , ut loqui
 „ non possent , ex scalpello resectæ liberaren-
 „ tur ? Multi etiam naturæ vitium meditatio-
 „ ne , atque exercitatione fastulerant , ut De-
 „ mosthenem scribit Phalereus , cum pⁱ dicere
 „ requireret , exercitatione fecisse , ut planissi-
 „ me diceret . Quod si hæc astro ingenerata ,
 „ & tradita essent , nulla res ea mutare pos-
 „ set . Quid ? dissimilitudo locorum nonne
 „ dissimiles hominum procreationes habet ? Quas
 „ quidem percurrere oratione facile est ; quid
 „ in .

„ inter Indos, & Persas, Æthiopes, & Sy-
 „ ros differat corporibus, animis; ut incredi-
 „ bilis varietas, dissimilitudoque sit: Ex quo
 „ intelligitur, plus terrarum situs, quam lunæ
 „ tractus ad nascendum valere. „

XL. *Fatum Pantheisticum* est necessitas ab-
 soluta omnium rerum promanans ex ipsa na-
 tura substantiæ divinæ, quæ eadem est cum
 substantia totius universi; ita enim Spinoza
 Pantheistarum facile princeps: „ Ex necessi-
 „ tate divinæ naturæ infinita infinitis mo-
 „ dis, hoc est, omnia, quæ sub intellectum
 „ infinitum cadere possunt, sequi debent. „

Quid
 fatum
 Panthei-
 sticum?

Ethic. c.
 1. prop.
 16.

SCHOL. Opinio nimirum absurdissima eorum,
 qui totum hoc universum Deum esse statuunt,
Pantheismus vocatur: est ea pervetusta, &
 vulgo Xenophani Eleaticæ sectæ principi tam-
 quam auctori tribuitur; cum enim ex nihilo
 nihil fieri posse arbitraretur, eo tandem dela-
 psum est, ut unicam diceret substantiam esse;
 eamque increatam, infinitam, mundum deni-
 que simul, & Deum. Neque cum parente suo
 monstruosus hic fetus interit, sed a successo-
 ribus quoque Parmenide, quem tamen alii ab
 hac labe purum pronunciant (vid. §. 25. log.),
 Melisso, & Zenone Eleate enutritum; quin &
 ad Pythagoræ, & Stoicos transivisse feribit
 Buddeus (a), Stoicus certe fuit Seneca (b),
 cujus hæc est doctrina: „ Est, ex quo nata
 „ sunt omnia, cujus spiritus vivimus: vis il-
 „ lum vocare mundum, non falleris; ipse e-
 „ nim est totum, quod vides: totus suis par-
 „ tibus inditus: & se sustinens vi sua. „ Stoi-
 cus fuit Cato, qui ita apud Lucanum (c) ex-
 clamat: „ Jupiter est, quodcumque vides,
 „ quocumque moveris. „ His quidem Linus
 poetarum vetustissimus prælusisse videtur no-
 tissimo illo versu: ἅπαντες καὶ πάντα, καὶ

(a) Diff.
 de Spi-
 noza, ante
 te Spi-
 noza. In-
 tem de
 Atheis-
 mo, &
 supersto-
 c. 1.

(b) 22.
 nat. l. 2.

(c) Dea
 clam. l. 7.

ἐκ παντὶ παν ἐστίν: ex universo omnia ; & ex omnibus universum est. Sed nemo impio Spinoza magis pestiferam hanc doctrinam exornavit, quem secutus est Joannes Tolandus Hybernus edito anno 1720. libro, quem *Pantheisticon* inscripsit. Benigna tamen Numinis providentia contigit, ut neuter aut multos, aut nominis alicujus sectatores, sed adversarios potius longe plurimos, & doctrina præstantes nactus sit. Spinozam præter alios refutarunt Henricus Morus in *subversione columnarum atheismi Spinoziani*; Huetius in *demonstratione Evangelica*, Jaquelotus *dissertations sur l'existence de Dieu*; VVitichius in *Anti Spinoza*; Franciscus Lamy *le nouvel atheisme renversé*; Denique omnium maxime aperta dogmatum repugnantia, & absurditate se ipsum Spinoza confutavit. Tolandi ineptias refellerunt Elias Benoist, Clarkius, Stillingfleetus; & multo accuratissime Laurentius Mosheimius in *vindiciis antiqua Christianorum disciplina contra Tolandum*.

Fatum
Panthe-
isticum
impium
est.

XLI. *Fatum Pantheisticum impium est.* Imprimis enim Deus, qui verbis ponitur, reapse tollitur; statuitur quippe Deus materialis, ex partibus realibus compositus, ac diversarum modificationum capax, quo ipso negatur esse ens infinitum, necessarium, immutabile, ut ex ontologia patet; quæ tamen omnia essentialia sunt Dei attributa, quemadmodum in theologia demonstrabitur. Deinde si res omnes per emanationem ex Deo profluunt, illiusque modificationes sunt, tum homo scelestissimus, & quodcumque corpus aliud non est, quam Deus certo modo se habens; quæ quam absurda sint, nemo non videt. Denique tollitur hoc in systemate omnis rerum contingentia, omnisque hominum libertas: sublata enim causæ primæ libertate

te

te fieri nequit, ut ulla causa secunda libera sit (conf. §. 23.).

SCHOL. Juvat aliquas propositiones, in quibus tamquam fulcris totum systema spinozianum innititur, seorsum in examen vocare, ut per-
specta earum infirmitate appareat, quam male materiata ipsum ædificium sit.

Examen
proposi-
tionum,
que fun-
damen-
tum

Ethicæ p. 1. def. 3. *Per substantiam intelligo id, quod in se est, & per se concipitur: hoc est, cujus conceptus non indiget conceptu alterius rei, a quo formari debeat.*

sunt sy-
stematis
spino-
ziani.

Si illud in se est, significet per se existere, & non egere ad existendum subjecto inhærentis, verissimum est enunciatum; at si notet a se existere, falsissimum; quis enim dabit sine probatione, & contra omnium philosophorum doctrinam sumentis, substantiam rite definiri per ens a se. Jam vero hoc alterum voluisse Spinozam pater ex propositionibus 7ma, & 8va, quas inde deducit: *ad naturam substantia pertinet existere: omnis substantia est necessario infinita.* Rursus, si illud, *cujus conceptus non indiget conceptu alterius rei, a quo formari debeat,* denotaret solum: substantiam in se spectatam, quatenus est substantia, ad aliud non referri, & excludere ideam relativam, nihil a veritate alienum dixisset; at non hoc voluit, verum istud: substantiam, quod demum cumque modo spectetur, non referri ad alterum, nec quasi ad subjectum, nec quasi ad causam; inde enim fuit propositio 6ta: *una substantia non potest produci ab alia substantia.* Hoc vero iterum precario sumitur; nam etsi substantia sub uno respectu per ideam absolutam repræsentetur, nihil tamen obstat, ut non etiam sub alio respectu per ideam relativam conspiciatur, quemadmodum quodvis artefactum in se ens est absolutum, & comparate ad artificem relativum, nec ullo modo ratio

effectus cum ratione substantiæ pugnat. En argumentum firmissimum, super quo ipse totum systema extruxit, quemadmodum Euclides super definitione puncti suam geometriam. Pergamus porro.

Prop. 51a. In rerum natura non possunt dari dua, aut plures substantia ejusdem natura sive attributi: quare? Quia eadem attributa, cum essentiam substantia efficiant, eandem efficiunt substantiam.

Diff. hinc Est, inquit Baylius, hic Spinozæ Achilles, „ totiusque ædificii fundamentum; idem tamē „ men. perridiculum sophisma, ut pudeat logicæ tirones eo capi. Quicumque philosophiæ rudimenta tradunt, inter prima præcepta suos docent: quid hæc sibi velint, „ genus, species, individuum. „ Distinctione igitur ejusdem *speciei*, & ejusdem *numero* attributi nodus solvitur. Nec est, cur hanc responsionem risu excipiat Spinoza; necesse certe est, ut & ipse, cum de modificationibus suis agit, eadem utatur. Homo, ut ipse philosophatur, est modificationum divinz substantiæ una aliqua; Socrates, Plato ejus sunt individua: an non eadem attributa in Socrate, & Platone? Anne propterea Socrates, & Plato unus, idemque homo? Audiamus jam ex falsis principiis adhuc allatis deductum theorema verissimum scilicet. *Propositio 14ta ita sonat: Præter Deum nulla dari, aut concipi potest substantia. Eam sic demonstrat: Cum Deus sit ens absolute infinitum, isque necessario existat, si aliqua substantia præter Deum daretur, ea explicari deberet per aliquod attributum Dei, cum nempe substantia infinita infinita habeat attributa, sicque dua substantia ejusdem attributi existerent, quod (per prop. 3.) absurdum est: adeoque nulla substantia extra Deum dari potest, & consequenter non etiam concipi; nam si posset concipi, deberet*

ne-

necessario concipi, ut existens (prop. 7.); at qui hoc per primam partem hujus demonstrationis absurdum est: ergo extra Deum nulla dari, neque concipi potest substantia. Verum imprimis contra pugnant ea, quæ supra contra propositionem 5^{am} adducta sunt. Deinde cum propositio 7^{ma} hic laudata, utpote fluens ex perversa definitione substantiæ, itidem falsa sit, verum esse nequit id, quod ex illa concluditur, nullam nempe præter Deum substantiam concipi posse: igitur absolute a vero abhorret, præter Deum nullam substantiam nec existere, nec concipi posse, quod systematis caput est.

Sequitur propositio 14^{ta}. Quidquid est, in Deo est, & nihil sine Deo est, neque concipi potest. Hac pertinet definitio 5^{ta}. Per modum intelligo substantia affectiones, sive id, quod in alio est, per quod etiam concipitur. Demonstratio. Præter Deum nulla datur, neque concipi potest substantia (per prop. 14.), hoc est, res, quæ in se est, & per se concipitur (def. 3.). Modi autem (per def. 5.) sine substantia nec esse, nec concipi possunt. Atque præter substantias, & modos nihil datur: ergo nihil sine Deo esse, neque concipi potest. Imprimis desideratur veritas majoris enunciationis; est enim ipsa propositio 14^{ta}, quam falsam esse supra ostendi. Tum definitio modi ab homine cato statuta merito suspecta esse potest. Est quidem modus illud, quod in alio est, ita nempe, ut sit alterius determinatio, & ab eo velut subjecto inhesionis in existendo pendeat. Verum in alio esse alios quoque sensus admittit. Cum Deus ob suam immensitatem omnibus rebus intime præsens sit, omnes res in Deo esse aliqua ratione dici possunt: propterea tamen modi substantiæ divinæ nequaquam sunt, quod Spinoza vult; neque enim sunt determinationes Dei, neque ab eo

velut subjecto inhæſionis in exiſtendo pendet, ſed in eo ſolum ſunt, quatenus ipſi intime præſentes ſunt, ſicut ipſe illis.

Tranſeamus ad partem 2dam Ethices. Propoſitio 1ma. *Cogitatio attributum Dei eſt, ſive Deus eſt res cogitans.* Propoſitio 2da. *Extenſio attributum Dei eſt, ſive Deus eſt res extenſa.*

En tandem præclarum Spinozæ Deum, quem rectius monſtrum dixeris. Deus eſt ſubſtantia unica, æterna, individua (per prop. 13. p. 1.), cujus attributa ſunt infinita cogitatio, & infinita extenſio: res omnes aliæ nihil ſunt aliud, quam infinitæ hujus cogitationis, & extenſionis modi, qui ex naturæ neceſſitate hujus ſubſtantiz ſecundum neceſſarias pariter leges efficiuntur. Id vel retuliſſe reſutaſſe eſt; conceptus enim hic aliud non eſt, ac collectio idearum confuſarum, indeterminatarum, precario conſiſtarum, ac denique ſecum pugnantium. Pugnat certe extenſio realis infinita (ont. §. 221.); pugnat extenſio cum indiviſibilitate (ont. §. 188.); pugnat extenſio cum infinitate (ont. §. 234.), & æternitate (ont. §. 181. cor. 3.); pugnat extenſio cum nozione ſubſtantiz (ont. §. 178.); pugnat extenſio cum cogitatione, ut in psychologia demonſtrabitur; pugnat naturæ neceſſitas cum libertate, quæ, utpote vera realitas, eſt attributum entis infiniti. Sed nolo in re aperta eſſe longior. Neque vero quemquam moveat methodus geometrica, qua impius hic, & philoſophi nomine indignus abuſus eſt; ſi enim quis primo definiat circulum conſtare quatuor lateribus, facile inde formabit ſystema elegantiffime connexum, cujus tamen omnes propoſitiones longiſſime a veritate diſtabunt. (conf. §. 149. ſch. log.)

CAPUT IV.

De Corporibus, eorumque Elementis.

XLII. *Corpus* voco omne ens compositum, quod partem hujus mundi aspectabilis constituit. Quid corpus?

COROLL. Quæ ergo cumque de ente composito in ontologia disperse dicta sunt, corporibus quoque conveniunt.

SCHOL. Plura quidem ad notionem corporis requirunt physici, qui fere illud per enumerationem proprietatum cum a priori, tum a posteriori cognitarum non tam definiunt, quam describunt; intima enim eorum indoles perquam obscura est. Sed hæc quoque illis relinquenda censeo.

XLIII. *Elementa* voco illa corporum initia, ex quibus ea primo coalescunt, & ad quæ in eorundem resolutione ultimo demum cogitando pervenitur. Quid corporum elementa?

SCHOL. Ajo *cogitando*; etsi enim stupenda sit corporum divisibilitas, ut physici norunt, certum tamen est, nos ad eorum initia tum ob instrumentorum inopiam, nostrorumque sensuum infirmitatem; tum fortassis etiam propter obstantem quamdam naturæ legem reapse pervenire non posse. Investigatio igitur elementorum non ad experientiam, sed ad rationem pertinet; perperam vero agunt ii, qui aut nos de iis nihil scire posse, aut totam hanc pertractationem omni carere utilitate more suo velut ex tripode pronunciant.

SCHOL.

In cor-
poribus
sunt
substan-
tiæ;

XLIV. *In quovis corpore insunt substantia.* Cum quidquid existit, substantia sit, vel accidens (ont. §. 125. cor. 1.), necesse est, ut si in corpore nulla insit substantia, omnia in accidentium numero habeantur, ac proinde, ut corpus sit collectio accidentium sine substantia; atqui hoc aperte repugnat (ibid. cor. 3.): igitur in quovis corpore insunt substantiæ.

ac pro-
inde en-
tia sim-
plicia,

XLV. *In quovis corpore insunt entia simpli-*cia. In quovis corpore insunt substantiæ (§. præc.); sed omnis substantia est ens simplex (ont. §. 178.): ergo in quovis corpore insunt entia simplicia.

SCHOL. Poterat idem theorema ex notione quoque entis compositi, quæ cuivis corpori convenit (§. 42.), adjuvante (§. 177. ont.), demonstrari.

que sunt
ipsa ele-
menta.

XLVI. *Elementa corporum sunt entia simpli-*cia. Cum in quovis corpore existent entia simplicia (§. præc.), necesse est, ut, cum in ejus resolutione ad ea perventum fuerit, omnis ulterior progressio sistatur: igitur entia simplicia sunt illud in corporibus, ad quod ultimo in eorundem resolutione cogitando saltem perveniri potest; atqui istud proprium est elementorum attributum (§. 43.): ergo entia simplicia sunt corporum elementa.

COROLL. Quæ igitur de ente simplice generatim in ontologia dicta sunt, elementis quoque corporum conveniunt.

Quæ de
his phi-
losopho-
rum o-
pinio-
nes?

SCHOL. Diverse sunt de elementis corporum philosophorum opiniones: nonnulli cum Democrito, Epicuro, & Gassendo *atomos inflexiles* varia magnitudine, & figura præditas statuunt. At vero atomus ea vel constat ex partibus realibus, vel non? Si illud: elementa

ti nomen non meretur ; non enim erit primum corporis initium, nec ultimum, ad quod in resolutione corporum cogitando devenitur si quidem ipsa in suas adhuc partes resolveri poterit ; si hoc : nequit gaudere extensione, magnitudine, figura (ont. §§. 188. coroll. 2. 189. coroll. 3.). Atomos id genus simplices quidem, at extensas simul, & figuratas olim *puncta inflata* vocarunt. Aristotelici non alia agnoscunt elementa, quam proclamatam suam materiam primam, quam massam quamdam informem, continuam, ac in infinitum divisibilem esse putant ; sed de hac rursus quaestio reddit, unde ipsa confletur ? Taceo de divisibilitate in infinitum, quam repugnare infra ostendam. Alii cum Zenone ad puncta simplicia, sed mathematica, quæ ab auctore suo *Zenonistica* dicta sunt, confugerunt ; verum risum movit hæc opinio sapientioribus, puncta enim mathematica poterunt fortasse initia esse corporis mathematici ; physici certe non. Leibnitius, cum omne ens simplex *monadem* vocet, idem nomen corporum elementis imposuit. Erat olim vocabulum hoc Pythagoræ in frequenti usu, notatque unitatem ; postulat enim Leibnitius, ut nobis corpus repræsentemus velut numerum valde compositum, quod, quemadmodum omnis numerus ultimo in monades, seu unitates ; ita corpus quoque in monades, seu entia simplicia resolvatur. Verum in natura, ac proprietatibus monadum definiendis singularis est Leibnitii opinatio, quæ paucos admodum defensores, plurimos contra hostes in ipsa Leibnitianorum familia invenit ; neque enim VVolfius ipse hoc suum esse dogma voluit, tamen reliqua illius fere omnia adoptaverit. Quæ jam vero ista sit, apud Baumei. *Cosmos.* 9. 454. *schol.* sterum accuratissime adnotatum invenio : audiamus.

Postquam de vocabulo *monas* pluribus disseruis-

sec.

ser, addit: „ Ex his colligi nunc potest, cut
 „ Leibnitius quatuor monadum constituat clas-
 „ ses. In prima classe ex ipsius sententia col-
 „ locatur Deus, qui ab ipso ob simplicitatem,
 „ seu immaterialitatem suam vocatur monas,
 „ quique distinctissima omnium rerum cogni-
 „ tione gaudet. Ad alteram monadum classem
 „ refert Leibnitius animas hominum rationa-
 „ les, quæ non clara modo, sed distincta
 „ quoque rerum gaudent repræsentatione. Ad
 „ tertiam classem pertinent animæ brutorum,
 „ quæ claris quidem, sed confusis ideis sint
 „ instructæ. Quartam denique & ultimam clas-
 „ sem constituunt ultima, & simplicissima cor-
 „ porum elementa, quæ, ut dixi, Leibnitio sunt
 „ monades stricte, & *κατ' ἐξοχὴν* sic dictæ,
 „ quæque ex Leibnitii sententia hoc universum
 „ sibi obscure repræsentant. — — Speciatim
 „ illis monadibus, quæ ad ultimam pertinent
 „ classem, quæque ipsa sunt corporum ele-
 „ menta, Leibnitius tribuit quædam, quæ,
 „ nescio, an firmo satis nitantur fundamento
 „ quæque adeo dici non potest, quam vehe-
 „ menter sint impugnata. 1.) Existimat Leib-
 „ nitius has monades, sive entia simplicia, ex
 „ quibus entia composita consistunt, gaudere vi
 „ repræsentativa, atque ipsum hoc universum
 „ sibi repræsentare obscure. 2.) Hinc illa vo-
 „ cat *viva specula hujus universi*. 3.) Af-
 „ firmat Leibnitius, in monadem creatam fo-
 „ rinfecus nec substantiam, nec accidens in-
 „ gredi posse. Adeoque 4.) existimat omnes
 „ mutationes in monadibus creatis obvias a
 „ principio interno, & vi intrinseca profici-
 „ sci. Hinc 5.) appellat monades *Enthele-*
 „ *chias*, propterea quod in se habent certam
 „ quamdam perfectionem, *ἐχούσι τὸ ἐντελές*,
 „ & detur quædam in iis sufficientia, vi cu-
 „ jus sint actionum suarum internarum fontes,
 „ adeoque automata incorporea, 6.) Unde
 „ por-

„ porro concludit Leibnitius , nullam mona-
 „ dem creatam , sive derivativam physice in-
 „ fluere posse in interius alterius monadis crea-
 „ tæ. 7.) Opinatur Leibnitius , omnes mona-
 „ des creatas gaudere determinationibus , &
 „ qualitibus intrinsicis , quibus a se invicem
 „ distingui possint . 8.) Nullam item mona-
 „ dem creatam in rerum universitate alteri-
 „ monadi creatæ per omnia similem existere
 „ autumat. 9.) Affirmat monades , quæ sunt
 „ corporum elementa , nullam quidem habere
 „ apperceptionem cum perceptione conjunctam ,
 „ sed eam tamen perceptionem , licet sit ob-
 „ scura , & careat apperceptione , sive con-
 „ scientia sui , perpetuo tendere ad novam
 „ perceptionem , adeoque gaudere illas monades
 „ appetitu . 10.) Ut Leibnitius , quales sint
 „ repræsentationes entium illorum simplicium ,
 „ sive monadum , quæ constituunt entia com-
 „ posita , luculentius ostendat , vocat statum
 „ perceptionum illarum stuporem . Qualis sta-
 „ tus animæ nostræ est , cum vel deliquio a-
 „ nimi laboramus , vel somno profundo absque
 „ somnio oppressi sumus. „

XLVII. *Corporum essentia sua est in certo, ac determinato modo, quo elementa inter se copulantur.* Etenim universe entis compositi essentia sita est in certo, ac determinato parti-
 tium nexu (ont. §. 171.); sed corpora sunt entia composita ex elementis tamquam parti-
 tibus ultimis (§. 43.) : ergo corporum quo-
 que essentia in certo, ac determinato modo, quo elementa inter se copulantur, sita est.

COROLL. I. Cum in essentia entis fundentur, quæcumque enti vel conveniunt, vel conve-
 nire possunt, consequens est, ut in elemen-
 tis, eorumque nexu ratio contineatur omnium
 eorum, quæ in corpore vel insunt, vel inesse
 possunt.

COROLL. 2. Nos neque nexum, neque intimam elementorum constitutionem perspicere possumus: igitur neque essentiam, & veram corporum indolem perfecte intelligere licet.

Quid
corpus-
scula
primiti-
va, &
deriva-
tiva?

XLVIII. *Corpuscula* sunt composita adeo exigua, ut sensus etiam armatos effugiant, quæ si immediate ex elementis coalescant, atque in eadem resolvantur, *primitiva*; si autem ex his ipsis conflentur, *derivativa* dicuntur. Ex derivativis porro vario modo inter se cohærentibus corpus tandem *sensibile* oritur.

COROLL. 1. Species igitur, ac diversitas corporum sensibilium jam in corpusculis primitivis determinata est, pendetque a determinato elementorum nexu, & certa virium ipsis insitarum conspiratione inde oriunda.

COROLL. 2. Si plura corpuscula primitiva ejusdem speciei in unum corpus coalescant, erit illud *homogeneum*; *heterogeneum* contra, si ea sint diversarum specierum, ut in corpore humano contingit.

Nexus
elemen-
torum
non fit
per con-
tactum.

XLIX. *Nexus elementorum non fit per immediatum contactum*. Cum enim elementa sint entia simplicia (§. 46.), necesse est, ut loco congruant, & compenetrentur, quamprimum ad contactum pervenerint (§. 192.); sed ex elementis, quocumque ea sint, compenetratis nec unicum corpusculum primitivum, utpote compositum extensum, effici potest: ergo nexus elementorum, ex quibus corpusculum primitivum coalescit, per immediatum contactum fieri nequit.

COROLL. Necesse igitur est, ut elementa, dum corpusculum quoddam primitivum constituunt, singula a singulis distent, & tamen inter se cohæreant.

SCHOL.

SCHOL. Hac una certe ratione, quam Boscovichio debemus, quæstioni de corporum compositione tot sæculis agitatæ, numquam tamen enodatæ & planissime, & abundanter satisfacit; quidquid enim adhuc allatum fuit, id erat ejusmodi, ut non modo nodum non solveret, sed novos potius, ac insolubiles progeneraret. Fuerunt, qui ad atomos simplices, & extensas, aut ad infinitam materiarum divisibilitatem recurrerent; at extensio simplex, numerus partium infinitus, quanta absurda! hæc tamen devorare oportebat. Fuerunt, qui in diversis respectibus ejusdem puncti simplicis, ad cardines mundi salutem quærerent; at dicere punctum simplex tangi ab alio simplice secundum respectum ad orientem, non vero secundum respectum ad occidentem, ac propterea eadem non competrari est omnino nihil dicere; quid enim? respectus, qui puncto externus est, competrationem impediat? nonne totum simplex simul & orientem, & occidentem, & meridiem, & septentrionem respicit? Novissime Boehmius contactui summam *propinquitatem* elementorum substituit, falsus tamen se ignorare, quid ea sit, vel in quo consistat; at hoc est ignotum per ignotum illustrare, & difficultatem ab uno ad aliud transferre. Illud denique, quod Leibnitiani ab substantiarum impenetrabilitate essentiali petunt, quale sit, vidimus (ont. §. 192. sch. fin.), & rursus infra discutiemus.

Cosmol.
l. 2. §.
545. n. 1.

L. *Elementa vi quadam pollent.* Elementa, Elementum corpusculum primitivum constituunt, a se distant, & tamen cohærent (§. præc. coroll.): ergo vis quædam adsit, oportet, quæ eam cohæsiōem in certis distantiiis efficiat; sed vis hæc esse, nisi in ipsis elementis nequit; cum enim agitur de corpusculo primitivo, præter elementa, & spatium vacuum nihil
ad-

Elementa
ta vim
habent.

adeſt, niſi quis vel ad naturam univerſalem genitricem infra refutandam, vel ad immediatam Dei actionem, quod non eſt philoſophari, recurrere velit: ergo elementa vi quādam pollent.

COROLL. Elementa igitur non ſunt puncta mathematica, ſeu zenoniſtica; ſed phyſica, & realia.

eamque
motri-
cem.

LI. *Vis elementorum eſt tantum vis motrix.*
Non habemus alterius viſideam, niſi vis cogitandi, & vis motricis (ont. §. 176. ſch.): alterutra igitur, vel utraque elementis tribuenda eſt, cum tribuenda ſit aliqua (§. præc.): atqui nulla prorsus ratio ſuadet inſeſſe in elementis vim cogitandi, ſed potius plures rationes in contrariam partem pugnant. Nam 1.) ſola vis motrix apta eſt efficiendæ cohæſioni elementorum neceſſariæ ad conſtituendum corpusculum, vis autem cogitandi id nequaquam præſtare poteſt; cum enim vis cogitandi ſit vis ſibi repræſentandi, vires cogitandi diverſorum entium nullo pacto conſpirare, ac proinde nec cohæſionem efficere poſſunt: cui igitur uſui ea vis foret in elementis? eſt autem certa philoſophandi lex: nec entia, nec qualitates entium multiplicandas eſſe ſine neceſſitate, nec cauſas ſtatuendas, quarum effectus in natura nulli appareant. 2.) Nullum omnino veſtigium cogitationis umquam in corporibus detegere licet, quin potius, quæ in, & de illis experimur, ſolo motu perficiuntur; aut enim corpus motui alterius reſiſtit, eumque infringit, aut ipſum movetur, vel mutationem quampiam aliam ſubit, quæ rursus motu efficitur, cum corpus ſit ens compositum (ont. §. 216.): verbo denique omnes corporum proprietates per motum, vel per niſum, & conatum ad eum-

eundem exponi possunt, ut physici norunt : igitur vis elementorum est tantum vis motrix.

COROLL. 1. Elementa igitur sunt entia simplicia materialia, & ideo recte a Boscovichio *puncta materia* nuncupantur.

COROLL. 2. Ruit quoque periculosa Leibnitii opinatio de obscuris monadum representationibus; nam vis etiam obscure solum representandi ad vim cogitandi in tota latitudine sumtam, ut ego quidem eam supra accepi, pertinet.

SCHOL. OEdipo profecto opus habet, Heracliteamque obscuritatem superat eorum doctrina, qui Leibnitii vestigiis insistentes ex vi monadum obscure repræsentativa omnes effectus naturales, quos in mundo corporeo experimur, deducere nituntur, agentes: quæcumque sub experientiam cadunt, mera esse phænomena, seu ita tantum sensibus nostris apparere; extensionem item, & motum æque nihil reale esse in ipsis corporibus, quemadmodum idem de colore, odore, sapore, aliisque id genus qualitatibus hodie physici docent. Certe aut omnia me fallunt, aut hæc opinio absque circuitione ad idealismum ducit. Deinde ullane potest esse verisimilitudo, fore umquam ut per vim repræsentativam, qua ens solum tendit ad mutandum statum internum, obtineatur realis loci ad statum entis externum pertinentis mutatio. Atque hoc adeo verum est, ut ipse Leibnitius monuerit, ex vi monadum repræsentativa nequaquam solutionem problematum in effectibus naturalibus occurrentium petendam esse. Qui magis in aberrante hac Leibnitianorum doctrina erudiri cupit, adeat dissertationem *de systemate mundi ex invitatione illustrissima academia Berolinensis deducto ex principiis monadicis*. N. X. & dissertationem

*Neues
Lehrge-
bäude
von der
Natur,
und Ge-
mein-
schaft
der Sub-
stanzen,
im An-
hänge
zur ne-
uesten
Auflage
der Theo-
dicæ
pag. 734.*

de primariis monadologia capitibus. N. XI. quæ cum dissertatione Cl. Justi, quæ præmium tulit, anno 1748. Berolini in lucem datae sunt.

sed non liberam: LII. *Vis elementorum non est vis libera*. Vis elementorum est tantum vis motrix absque vi cogitandi (§. præc.); sed absque vi cogitandi ut esse nequit potestas eligendi, ita impossibilis est omnis libertas: ergo vis elementorum libera non est.

COROLL. Vis ergo elementorum habitis omnibus requisitis, & ablato omni impedimento, continuo effectum producit, id est, motum efficit (ont. §§. 146. 132. schol.); atque inde elementa natura sua ad motum determinantur.

quæ proinde non agit nisi data directione, & celeritate, LIII. *Vis elementorum motum non efficit, nisi data ab externo principio celeritate, & directione*. Infinitæ celeritates, & directiones sunt possibiles, atque ex his unam aliquam terminatam eligere ad elementum, quod libertate caret (§. præc.), non pertinet; neque alia in ipso ratio sufficiens determinatæ cujusdam celeritatis, & directionis cogitari potest: ergo directio, & celeritas, qua elementum movetur, ab externo principio determinari debet; atqui motus sine determinata directione, & celeritate fieri nullo modo potest: igitur vis elementorum motum non efficit, nisi data ab externo principio celeritate, & directione.

COROLL. 1. Igitur si elementum quiescat, namquam ex se motum inchoabit; sin contra moveatur, movebitur in perpetuum eadem directione, & celeritate, nisi impedimentum aliunde adveniat.

COROLL. 2. Atque inde quodvis elementum quan-

quantum in se est ; perpetuo conservat eundem statum motus , vel quietis , in quo est . Atque in hoc ego *inertiam* elementorum pono , quæ ut patet , non est proprietas , aut vis distincta a vi motrice insufficiente ad determinandam celeritatem & directionem . Vide Bivvandum e S. J. in academia Græcensi Physices Professore .

Phys.
gen. p. 2.
f. 2. art.
8. prop.
5. & 6.

SCHOL. Quæ adhuc de vi elementorum dixi , ad ipsa quoque corpora applicanda sunt ; cum enim generatim collectio virium , quæ in entibus simplicibus insunt , enti composito conveniat (ont. §. 178. cor. 4.), necesse est , ut vires etiam elementorum collectæ unam velut vim in corpore constituent . Gaudent igitur corpora vi motrice ; verum non libera , ac proinde ipsa quoque natura sua ad motum determinata sunt : neque tamen ob impotentiam naturalem determinatam quamdam directionem , & celeritatem eligendi aut motum de se umquam inchoant , aut in motu constituta directionem , vel celeritatem mutant : quare inertia quoque sunt . Quod si præterea cum Cartesiano contendas corpora esse *indifferentia* ad motum , vel quietem ; & istud certo quodam sensu dari poterit . Sunt nempe corpora ad motum , vel quietem *indifferentia* , quatenus ex natura sua hanc vel illam , aliquam potius quam nullam directionem , & celeritatem a principio externo non postulant , quemadmodum ignis etiam simili ratione ad urendum , vel non urendum indifferens dici potest , cum ex se applicationem ad rem , quæ comburi possit , non exigat ; verum ut ignis applicatus necessario urit ; ita corpus posita externa celeritatis , & directionis determinatione necessario movetur . En quam belle virium insitarum hypothesis (si tamen ea hypothesis dicenda sit) cum pervulgata de iner-

cia, ac indifferentia corporum opinione co-
hæreat.

At vero in eo jam versatur quæstio, unde eæ
determinationes in natura ortum habeant? hanc in rem nihil & rationi, & phænomenis
magis consentaneum dici posse videtur, quam
illud sit, quod a viro clarissimo Boscovichio
accepimus. Agunt nimirum elementa certis
intervallis disjuncta in se mutuo, atque pro
horum intervallorum ratione jam ad mutuum
accessum, jam ad recessum se invicem deter-
minant; unde eadem vis motrix modo *attra-*
ctricis, modo *repultriciis* cognomentum forti-
etur. In majoribus quidem distantis sola fere
attractio agit, unde gravitatis phænomena
physici repetunt; in minoribus vero interval-
lis alternæ sunt vices accessus, & recessus,
dum distantis in infinitum imminutis in infi-
nitum quoque crescat vis repellens, quæ om-
nem contactum in natura excludat. Ubi deni-
que ab repulsionem ad attractionem transitur,
limites quidam sunt, ad quos si elementum
appulerit, nec recedere, nec accedere potest;
quod cohæsiōni explicandæ inservit. Atque
hic agendi modus *Lex virium* ab auctore com-
pellatur, quæ per curvam geometricam conti-
nuam ipsis velut oculis intuenda sisti potest;
& miro compendio explicationem effectuum
naturalium promoveat. Sed hæc jam sunt fori
physici; qui uberius instrui desiderat, adeat
ipsum fontem (a), aut physicam generalem
auditorum usibus accommodatam a Leopoldo
Bivvald typis Græcensibus anno 1767. vulga-
tam (b), in qua, quidquid erudite, & solide
hac de re dici potest, summa industria enus-
cleatum inveniet.

(a) *The-*
or. phil.
nat. p. I.
§. 10.
seqq.
Diff. de
leg. con-
sin.

(b) *P. 2.*
sect. 1.
Elemen-
ta sunt

LVI. Nihil obstat, quo minus elementa pu-
tamus interne perfecte similia esse. Imprimis
enim

enim principium indiscernibilium Leibnitii jam refutatum est (ont. §. 76.). Deinde tam ex naturæ simplicitate, quam ex phænomenis colligimus eandem virium legem pro omnibus obtinere, ut Boscovichius probat; quo conficitur eandem specie vim motricem eodem modo agentem in omnibus inesse. Denique, cum omnia sint entia simplicia (§. 46.), eadem simplicitas, ac inextensio omnibus communis est; aliud vero præterea, in quo inter se discrepent, singulis convenire, ne conjectura quidem, assequi possumus.

*Theor.
phil.
nat. p.
1. §. 92.*

SCHOL. Leibnitio a dissimilitudine corporum sensibilium argumentanti egregie respondet Boscovichius: „ quod autem attinet ad inductionem, quam Leibnitiani desumunt a dissimilitudine, quam observamus in rebus omnibus, cum nimirum nusquam ex. gr. in amplissima silva reperire sit duo folia prorsus similia, ea sane me nihil movet; cum nimirum illud discrimen sit proprietas relativa ad rationem aggregati, & nostros sensus, quos singula materiæ elementa non afficiunt vi sufficiente ad excitandam in animo ideam, nisi multa sint simul, & in molem majorem excrescant. Potro scimus utique combinationes ejusdem numeri terminorum in immensum excrescere, si ille ipse numerus sit aliquanto major. Solis 24. litterulis alphabeti diversimode combinatis formantur voces omnes, quibus huc usque usa sunt omnia idiomata, quæ exstiterunt, & quibus omnia illa, quæ possunt exsistere, uti possunt. Quid si numerus earum existeret tanto major, quanto major est numerus punctorum materiæ in quavis massa sensibili? quod ibi diversus est litterarum diversarum ordo, id in punctis etiam prorsus homogeneis sunt positiones, & distantiae,

*Loc. cit.
§. 95.*

§. 97.

„ quibus variatis variatur utique forma ; &
 „ vis , qua sensus afficitur in aggregatis .
 „ Quanto major est numerus combinationum
 „ diversarum possibilium in massis sensibili-
 „ bus , quam earum massarum , quas possumus
 „ observare , & inter se conferre , (qui qui-
 „ dem ob distantias , & directiones in infini-
 „ tum variables , præscindendo ab æquilibrio
 „ virium , est infinitus , cum ipso æquilibrio
 „ est inmensus) ; tanto major est improbabi-
 „ litas duarum massarum omnino similium ,
 „ quam omnium aliquantisper saltem inter se
 „ dissimilium . „ — — — Patet igitur , va-
 „ rietatem illam a numero pendere combina-
 „ tionum possibilium in numero punctorum
 „ necessario ad sensationem , & circumstantia-
 „ rum , quæ ad formationem massæ sunt ne-
 „ cessariæ , adeoque ejusmodi inductionem ex-
 „ tendi ad elementa non posse . Quin immo
 „ illa tanta similitudo , quæ cum exigua dis-
 „ similitudine commixta invenitur in tam mul-
 „ tis corporibus , indicat potius similitudinem
 „ ingentem in elementis . Nam ob tantum
 „ possibilium combinationum numerum , mas-
 „ sæ elementorum etiam penitus homogeneo-
 „ rum debent a se invicem differre plurimum ;
 „ adeoque si elementa heterogenea sint , in
 „ immensum majorem debent habere dissimi-
 „ litudinem , quam ipsa prima elementa , ex
 „ quibus idcirco , ne tantillum quidem , simi-
 „ les provenire deberent . „ — — — Deni-
 „ que eleganti exemplo , quod præterire nequeo ,
 „ rem totam illustrat . „ Fieri utique possent ni-
 „ gricantes litteræ , non ductu atramenti con-
 „ tinuo , sed punctulis rotundis nigricanti-
 „ tibus , & ita parum a se invicem remotis ,
 „ ut intervalla non nisi ope microscopii di-
 „ scerni possent , & quidem ipsæ litterarum
 „ formæ pro typis fieri possent ex ejusmodi
 „ rotundis sibi proximis cuspidibus constan-

„ res,

„ tes, Concipiatur ingens quædam Bibliotheca,
 „ ca, cujus omnes libri constant litteris im-
 „ pressis, ac sit incredibilis in ea multitudo
 „ librorum conscriptorum linguis variis, in
 „ quibus omnibus forma characterum sit ea-
 „ dem. Si quis scripturæ hujusmodi, & lin-
 „ guarum igharus circa ejusmodi libros, quos
 „ omnes a se invicem discrepantes intueretur,
 „ observationem institueret cum diligen-
 „ ti contemplatione; primo quidem inveniret
 „ vocum farraginem quamdam, quæ voces in
 „ quibusdam occurrerent sæpe, cum eadem
 „ in aliis nusquam apparerent, & inde lexi-
 „ ca posset quædam componere totidem nu-
 „ mero, quot idiomata sunt, in quibus sin-
 „ gulis omnes ejusdem idiomatis voces reperi-
 „ rentur, quæ quidem numero admodum pau-
 „ ca essent, discrimine illo ingenti tot, tam
 „ variorum librorum redacto ad illud usque
 „ adeo minus discrimen, quod contineretur
 „ lexicis illis, & haberetur in vocibus ipsa
 „ lexica constituentibus. At inquisitione pro-
 „ mota, facile adverteret, omnes illas tam
 „ varias voces constare ex 24. tantummodo
 „ diversis litteris, discrimen aliquod inter se
 „ habentibus in ductu linearum, quibus for-
 „ mantur, quarum combinatio diversa pareret
 „ omnes illas voces tam varias, ut earum
 „ combinatio libros efformaret usque adeo ma-
 „ gis a se invicem discrepantes. Et ille qui-
 „ dem si aliud quodcumque sine microscopio
 „ examen institueret, nullum aliud inveni-
 „ ret magis adhuc simile elementorum genus,
 „ ex quibus diversa ratione combinatis orien-
 „ tur ipsæ litteræ; ac microscopio arrepto
 „ intueretur utique illam ipsam litterarum
 „ compositionem e punctis illis rotundis pror-
 „ sus homogeneis; quorum sola diversa posi-
 „ tio, ac distributio litteras exhiberet. „ De-
 „ nique ita concludit. „ Hæc mihi quædam §. 99.

„ imago videtur esse eorum, quæ cernimus in
 „ natura. Tam multi, tam varii illi libri cor-
 „ pora sunt, & quæ ad diversa pertinent re-
 „ gna, sunt tamquam diversis conscripta lin-
 „ guis. Horum omnium chemica analysis
 „ principia quædam invenit minus inter se
 „ difformia, quam sint libri, nimirum voces.
 „ Hæ tamen ipsæ inter se habent discrimen
 „ aliquod, ut tam multas oleorum, terrarum,
 „ salium species eruit chemica analysis e di-
 „ versis corporibus. Ulterior analysis harum
 „ veluti vocum, litteras minus adhuc inter
 „ se difformes inveniret, & ultimo juxta theo-
 „ riam meam deveniret ad homogenea pun-
 „ ctula, quæ, ut illi circuli nigri litteras,
 „ ita ipsa diversas diversorum corporum par-
 „ tículas per solam dispositionem diversam ef-
 „ formarent: usque adeo analogia ex ipsa na-
 „ turæ consideratione derivata non ad diffor-
 „ mitatem, sed ad conformitatem elementorum
 „ nos ducit. „

Corpora
 neque-
 unt in
 infini-
 tum di-
 vidi.

LV. *Corpora non sunt in infinitum divisibi-*
lia. Cum enim corporum elementa sint entia
 simplicia (§. 46.), ad divisibilitatem corpo-
 rum infinitam absolute requireretur, ut in
 quovis corpore, quantumcumque parvo, aut
 magno, elementa numero actu infinito exis-
 tant; atqui omnis numerus actu infinitus re-
 pugnat (ont. §. 219.): igitur divisibilitas in
 infinitum repugnat.

SCHOL. I. Corpus nimirum quodvis in tot
 partes secari potest, quot sunt in eo elemen-
 ta, seu materiæ puncta. Quod si divisio ul-
 terius continetur, pertinebit ea ad intervalla
 vacua inter duo quævis puncta intercepta, quæ
 omnino divisionem in infinitum admittunt
 (ont. §. 196. sch. n. 2.). Atque hac ratione
 evitantur omnes difficultates, quas geometria

mo-

mover, dum divisibilitatem infinitam extensi continui demonstrat, quæ, quantum olim philosophis negotium facessiverint, nemini in veterum scriptis vel mediocriter versato ignotum esse potest. Ne tamen in ordine ad explicanda naturæ phænomena quidpiam desideretur, in locum divisibilitatis infinitæ succedit *componibilitas* in infinitum, ut ait Boscovichius; in *Loc. cit. P. 3. §. 394.* omni videlicet corpore numerus punctorum actu existentium finitus est, ac is augeri semper sine fine potest, cum enim inter duo quavis distantia puncta semper aliud interferi queat (ont. §. cit.), nullus numerus punctorum in dato spatio existentium adeo magnus erit, ut non alius finitus major in eodem spatio haberi possit.

SC H O L. 2. Sunt non ex veteribus modo; ve- *Occur-*
rum & ex recentioribus philosophis nonnulli, *ritur*
qui, quæ hoc capite dicta sunt, minime pro- *dubis.*
banda esse putent. Horum dubitationibus jam
occurrant.

Ajunt 1.) Prorsus verisimile non esse, ut ex inextensis oriatur extensum continuum.

2. Hi quidem optime ratiocinantur, si sermo sit de extenso *metaphysice* continuo; non item, cum agitur de extenso *physice* solum, & comparate ad nostros duntaxat sensus continuo (ont. §. 193.). Linea, superficies, corpus mathematicum componi ex punctis simplicibus nequaquam possunt; cum enim hæc sint continua metaphysice talia, necesse foret, ut puncta sese mutuo contingerent, quo casu ex infinitis etiam punctis ne minima quidem linea umquam exsurgere posset; quod argumentum, ut olim Zenonistas, nunc Leibnitianos obmutescere cogit. Inde Geometrarum sapientiores lineam non ex punctorum additione: sed ex fluxu unius puncti sui vestigium relinquentis generari concipiunt. At vero corpora sunt solum collectiones punctorum certo a se

intervallo distantium, ac per mutuas vires co-
hærentium: quare nihil verat, ut id genus
extensum physice solum continuum ex pun-
ctis simplicibus, & non extensis confietur,
quemadmodum etiam numerus ex unitatibus,
quarum nulla seorsum numerum constituit,
coalescit.

2.) Recte sic concludimus: minimæ quævis mas-
sæ sensibiles solidæ sunt, pollentque vi attra-
ctiva; & repulsiva: ergo etiam elementa so-
liditate, iisdemque viribus gaudent: igitur
recte quoque sic arguemus: minimæ massæ
in sensus incurrentes sunt extensæ: ergo et-
iam elementa non omni extensione destituun-
tur.

3. Priores proprietates absolutæ sunt, nec a ra-
tione totius, aut compositi pendent; quare
per inductionem a sensibilibus ad insensibilia
transferri possunt: contra extensio est pro-
prietas comparativa, quæ cum pluralitatem in-
volvat (ont. §. 188.), necessario a ratione
compositi pendet: unde iis, ex quibus compo-
situm coalescit, comperere non potest (conf.
§. 143. schol. log.), vide quoque Boscovi-
chium. Certe si id genus argumentationum
valeret, colligi posset quamvis massæ cujus-
piam partem duas libras appendere, propterea
• quod ipsa integra totidem sit librarum.

3.) Cl. Justi in dissertatione supra (§. 51.
schol.) laudata mirabile argumentum profert,
quo ipse quidem totum entium simplicium,
• ac inextensorum systema everti putat. Au-
di argumentantem: ens compositum est ens
ex partibus constans; quod constat ex par-
tibus, non potest simul ex nullis partibus
constare: ergo ens compositum non potest
constare ex nullis partibus, atqui quod non
potest constare ex nullis partibus, non po-
test constare ex entibus, quæ nullas habent
partes, qualia sunt entia simplicia: ergo ens
com-

*Theor.
phil. na-
tur. p. 3.
§. 140.*

§. 26.

compositum non potest constare ex simplicibus.

3. Concesso integro syllogismo subsumtam minorem nego; id ipsum enim, quod in ea sine probatione asseritur, in questione est. Latet hic præterea insolens æquivocatio; si namque ea propositio accuratius discutatur, facile apparet niti eam hypothese omnino falsa, quasi nimirum *non habere partes, & non esse partem* idem in re sit. Atque in idem vitium §. 6. 7. rursus labitur in appendice; ubi egregiam suam argumentationem uberius declarat, dum illud tandem aperte in lucem proferat. At vero §. 10. quo fundamento adstruitur, illud, quod nullam habet partem, non posse esse alterius partem? nonne id, quod non est exercitus, pars exercitus; & quod non est numerus, pars numeri esse potest? Ait quidem: si ens simplex pars esset corporis, necesse fore, ut magnitudine præditum sit; cum quævis pars sibi ipsi æqualis sit. Sed nihil promoveret; quævis utique pars sibi ipsi æqualis est ea æqualitate, quæ vi naturæ ipsi competere potest, quæque vel ad extensionem, vel ad intensionem pertinebit. Quamquam partem esse æqualem sibi ipsi, si generalissime, ut hic oportet, sumatur, reapse aliud non sonat, quam partem quoad omnia esse eandem secum ipsa; quod verum est, seu ipsa adhuc sit composita, seu non.

4.) Duo adhuc sunt, quæ profert idem auctor; sed quæ similiter turpi æquivocationis vitio laborant. Primum ait, compositionem esse essentiam entis compositi, ac proinde necessariam; eorum porro, quæ necessaria sunt, nullam dari rationem sufficientem, atque adeo principio rationis sufficientis eos abuti, quæ compositionis rationem sufficientem in simplicibus, seu non compositis querunt. Tum sic §. 33. arguit: ens compositum, & simplex sunt op.

posita, ut possibile, & impossibile, finitum, & infinitum; est autem contradictorium, ut ex oppositis opposita entia exsurgant; quia enim unius notia negat, quod alterius notia affirmat, ex non sunt possible in uno ente; sed quod in uno ente possibile non est, ex illo etiam ens exsurgere nequit: igitur quemadmodum ex finitis infinitum, ex impossibilibus possibile oriri nequit, ita absolute impossibile est, ut ex entibus simplicibus ens compositum coalescat.

R. ad ~~unum~~ Compositio duplici modo spectari debet; quatenus est essentia entis compositi, & sic est necessaria; necessarium quippe est, ut ens compositum sit compositum, neque huius rei ratio sufficiens queritur, sicut non querimus, quare circulus rotundus sit. Deinde compositio spectatur comparate ad partes componentes, quatenus est certus modus, quo certae partes inter se conferuntur, qui modus contingens est, proptereaque ratione sufficiente eget. Patet id in horologio, cujus essentia est talis talium partium conjugatio; si queras, quare horologium talem partium conjugationem exigit? nullam proferam rationem, sed dicam, quia sesus non esset horologium; si contra queras, quare nunc haec partes sic sunt consociatae? respondebo, quia id artifex praestitit. En rationem sufficientem compositionis. Deinde non querimus, quare ens compositum sit compositum; si enim jam ponas ens esse compositum, questio prorsus inepta foret: sed querimus, qui fiat, ut ens aliquod sit compositum, undeque ea compositio exsurgat? & hoc tam prudenter, quam utiliter queri potest; quemadmodum querimus rationem existentiae entis contingentis, tamen si existentiam ab essentia realiter distinctam non esse statuamus. Porro equivocatio in eo latet, quod, ut patet ex appendice, ponat mas

teriam essentialiter esse compositam, quod eo jure, quo ipse asserit, a nobis negatur; confundit præterea inscite materiam, & corpus, quasi vero idem esset materia, & horologium. Denique de materia pro corpore accepta affirmat, eam annihilandam fore, si in ipsius divisione ad finem perveniretur, in quo novus continetur verborum lusus. Imprimis enim annihilatio accipitur pro simplici interitu, ita quippe corpus in sua elementa resolutum interit, ut horologium, cum nexus partium dissolvitur. Deinde longe diversa sunt, *corpus posse in infinitum dividi, & corpus, quamdiu corpus est, dividi posse*; istud cum veritate congruit, alterum non; utriusque tamen idem esse sensus in objectione ponitur.

Si. Ad 2dum. Tamen si ens compositum, & simplex opposita sint, & propterea idem ens simul compositum, & simplex esse nequeat, nihil tamen obstat, quo minus ex pluribus simplicibus inter se coherentibus unum compositum consurgat, id quod innumeris exemplis illustrari potest. Quivis globus eburneus non est series, estque simul contradictorium esse, & non esse seriem, & tamen ex multis globis eburneis juxta se positis oritur series; ita quoque ex partibus, quæ non sunt horologium, conficit horologium; ex militibus, quorum quivis nec exercitus est, nec sufficiens cædendo hosti, conflatur exercitus ad id præstandum sufficiens. Immo generatim pars seorsum accepta non est totum, atque ideo omne totum consurgit ex talibus, quæ ipsum non sunt; & sic prorsus compositum prærequirit componentia, quæ ab ipso distinguantur, & composita amplius non sint (vid. ont. §. 177.). Argumentatio igitur præfens in eo peccat, quod a prædicatis absolutis ad comparativa; item ab eo, quod singulis seorsum acceptis nec inadæquate, aut inchoative convenit, ad

id, quod in ipsis saltem ea ratione inest, præcedat (ont. §. 18. sch. n. 1.). Certe, cum finiti ad infinitum nulla sit proportio (ont. §. 220. cor. 2.), illud comparate ad hoc reapse nihilum est; impossibile item idem sonat, quod nihilum (ont. 29. cor. 1.); atqui infinitorum etiam nihilorum collectione ne una quidem unitas obtinetur: patet igitur, cur ex entibus finitis infinitum, aut ex impossibilibus possibile oriri nequeat. Atque hi sunt Achilles illi, quibus vir clarissimus entia simplicia materialia ex orbe eliminavit, præmiumque ab Academia propositum consecutus est.

5.) Ne posita simplicitate materiæ sufficiens non sit eam inter, & spiritum discrimen, verentur nonnulli cum Scarella in omnibus Boscovichio adversante, putant enim posse etiam spiritus id genus viribus attractivis, & repulsivis a Deo donari, quo casu ipsi corpus componere possent, atque sic periret omne substantiale, atque absolutum discrimen inter animam, & corpus.

6.) Discrimen substantiale, & absolutum inter corpus, & animam semper manet idem, seu corpus dicatur ex simplicibus constare, seu non; corpus enim semper erit ens compositum, anima contra ens simplex. Deinde quod ad discrimen inter materiam, quæ sit ens simplex, & spiritum attinet, illud in eo situm est, quod hic vi cogitandi polleat; illa eadem careat (§. 51. coroll. 1. & ont. §. 176. sch.). Utrum vero Deus spiritibus eas vires tribuere possit, omnino ignoramus; id tamen extra controversiam ponitur: compositum quoddam ex meris spiritibus constans, si illud possibile sit, essentiali adhuc, & interno discrimine a corporibus nobis notis discernendum fore. Verum de hoc plura in psychologia dicam; consulatur interea Boscovichius. Ceteram difficultas hæc, si qua est, pari ratione ipsum

ipsum auctorem premit ; cum enim ipsi elementa corporum sint entia simplicia virtualiter extensa, eadem prorsus quaestio de iis institui poterit ; nam nihil vetat, ut & spiritus huiusmodi extensione, si quidem ea non repugnet, praeditos statuamus, praesertim cum notum sit, complures philosophos & olim, & nunc quoque cum Genuensi animae humanae similem extensionem attribuisse.

6.) Ipsa idea corporis, & materiae videtur notionem extensionis metaphysice continuæ involvere, ita ut sublata una, alteram quoque tolli necesse sit.

7.) Idea hæc, quam multi se habere putant, præjudicatis solum opinionibus ortum debet, *Loc. cit. §. 158.* ut fufius declarat Boscovichius. Pauca ex ipso adnotabo. „ Illud procul dubio arbitror omnino certum, ideam corporis, materiae, rei corporeæ, rei materialis nos hausisse extensionibus. Porro ideæ primæ omnium, quas circa corpora acquisivimus per sensus, fuerunt omnino eæ, quas in nobis tactus excitavit, easdem omnium frequentissimas hausimus. Multa profecto in ipso materno utero se tactui perpetuo offerebant, antequam ullam fortasse saporum, aut odorum, aut sonorum, aut colorum ideam habere possemus per alios sensus, quarum ipsarum, ubi eas primum habere coepimus, multo minor sub initium frequentia fuit. Ideæ autem, quas per tactum habuimus, ortæ sunt ex phænomenis huiusmodi. Experiebamur palpando, vel temere impingendo resistantiam vel a nostris, vel a maternis membris ortam, quæ cum nullam interruptionem per aliquod sensibile intervallum sensui obiceret, obtulit nobis ideam impenetrabilitatis, & extensionis continuæ : cumque deinde cessaret in eadem directione alicubi resistantia, & secundum aliam directionem exerceretur, re-

„ rectus; terminos ejusdem quantitatis conce-
 „ pimus, & figuræ ideam hausimus. Porro o-
 „ riebantur hæc phænomena a corporibus e-
 „ materia jam efformatis, non a singulis ma-
 „ teriæ particulis, e quibus ipsa corpora com-
 „ ponebantur. „

Dixi de corporibus, eorumque elementis pro scopo-
 satis: restat, ut de eorundem compenetratio-
 ne, & replicatione, ut ajunt, paucis agam,
 idque non alio ex capite, quam quod res hæc
 ad sanctissimum religionis nostræ mysterium ab-
 hæterodoxorum obrectationibus vindicandum
 plurimum inservit.

C A P U T V.

De Compenetratione, & Replicatione Corporum.

Quid: LVI. *Soliditas*, sive *Impenetrabilitas* est ea-
 impenetrabili-
 tas, impenetra-
 tio, & impenetra-
 bile: *corporum vis, qua quodvis alterum ex loco, quem actu occupat, excludit. Impenetratio est actualis exclusio alterius ex loco occupato proveniens ab ea vi velut effectus. Quod denique hac vi præditum est, impenetrabile dicimus.*

Omne corpus est naturaliter impenetratum; LVII. *Omne corpus spectatis naturæ legibus alterum ex suo loco excludit. Quid spectatis naturæ legibus fieri debeat, id diuturna; constansque experientia solum docere potest; sed constans experientia docet quodvis corpus ita existere in loco, ut pro eo tempore omnia alia ex eodem excludat, quemadmodum longa inductione istud de corporibus tam fluidis, quam solidis physici ostendunt: Ergo spectatis naturæ legibus omne corpus alterum ex suo loco excludit.*

SCHOL. 1. Vim hanc eandem esse cum illa, idque a
 quæ mutuum elementorum contactum impe- vi repul-
 dit, facile perspicitur; ut enim ea efficit, ne siva pro-
 venit.
 umquam punctum materiæ cum alio in eodem
 spatii puncto congruat, ita ab eadem profici-
 sei debet, ut numquam quædam punctorum
 massa, quæ corpus constituit, cum alia simili
 in eodem loco existat. Provenit igitur hæc
 impenetratio a vi motrice elementorum, cum
 ea secundum generalem virium legem repulsi-
 va est (§. 53. schol.).

SCHOL. 2. Assertioni huic apparentes quædam
 compenetrations minime obstant; ut cum
 lux, vel aer corpora etiam densissima per-
 meat, aut cum diversis generis olea durissima
 quoque marmora ita pervadunt, ut, cum dis-
 secantur, in medio, quin & in inferiori par-
 te variis tinctæ coloribus deprehendantur. Hæc
 enim non veram aliquam compenetrationem;
 sed poros solum, licet ne armatis quidem o-
 culis detegendos, in corporibus solidissime com-
 pactis arguunt.

LVIII. *Compenetratio* est simultanea duo- Quid
 rum, aut plurium entium in eodem loco co- compo-
 existentia. netra-
 tio?

SCHOL. De entibus creatis mihi sermo est; ens
 enim increatum, tamen vi suæ immensitatis
 omnibus rebus intime præsens adsit, non ta-
 men vero sensu compenetrari dici potest: nem-
 pe nos hujus existentie modum nullo pacto
 intelligimus. Definita porro compenetratione Quæ
 quærun philosophi, utrum nec per absolutam quæritur
 Dei potentiam effici possit, ut duo, vel plu-
 ra corpora in eodem loco simul existant?
 Quæ dubio huic solvendo apta videbuntur,
 jam adferam; verum, ut supra monui, non a-
 lium in finem, quam ut pateat, nihil præ-
 sidii heterodoxis in ratione naturali relinqui;
 quo

quo ipsi ad impugnandum sacrosanctum Eucharistiae mysterium verisimiliter uti possint, qui scopus & subsequens de replicatione quaestio- nis erit.

LIX. *In compenetratione corporum nulla est contradictio ex parte ipsius corporis.* Nulla est ratio positiva, quæ vel probabiliter ostenderet impenetrationem pertinere ad essentialia corporis; si enim esset quæpiam ratio, foret ea constans sensuum experientia; atqui imprimis ea tantum docet, quid spectatis naturæ legibus fieri debeat; omnem autem probandi vim amittit, cum de essentiis rerum, & absoluta Dei potentia agitur. Deinde eadem experientia non est ratio, quæ evincat actualem lapsum, mutuum accessum, vel recessum, compressarum partium restitutionem de corporis essentia esse; ergo neque evincit impenetrationem ad essentialiam corporis pertinere; quemadmodum enim lapsus actualis, mutuus accessus, vel recessus, restitutio compressarum partium sunt effectus gravitatis, attractionis, repulsionis, elasticitatis, ita impenetratio est effectus impenetrabilitatis: igitur salva corporis essentia, & manente illius impenetrabilitate impenetratio abesse potest; atqui si ita sit, in compenetratione corporum nulla est contradictio ex parte corporis: quidquid enim ad essentialia non pertinet, neque cum his nexu necessario conjungitur, mutari absolute potest; constat igitur afferti veritas.

LX. *In compenetratione corporum nulla est contradictio ex parte elementorum, ex quibus corpora coalescunt.* Imprimis enim in compenetratione corporum nequaquam necesse est, ut ipsa quoque elementa compenetrentur, cum in quovis intervallo inter duo elementa intercepto alia finito numero in infinitum inter-

ter.

terponi possint (§. 55. sch. 1.). Deinde elementa, si ad mutuum contactum perveniant, alioquin naturaliter compenetrantur (ont. §. 192.); quis autem ajat, actualem illam repulsionem quæ contactum impedit, esse elemento, id est, enti illi simplici essentialem, nec per absolutam Dei potentiam impediri posse? redit hic argumentum (§. præc.). Denique duæ substantiæ compenetratæ manent duæ, & non propterea in unam transeunt; esse quippe in loco duo involvit; ipsum esse substantiæ, & modum coexistendi. Jam vero quis ex eo, quod plures substantiæ habeant eundem modum coexistendi inferat ipsum earum esse fieri unicum: id certe non fit propterea, quod plures substantiæ habeant eundem respectum ad successiva, seu eodem tempore existant; sicut autem respectus ad successiva, ita respectus ad coexistentia substantiis extrinsecus advenit. Sane si hæc argumentandi ratio valeret, nec substantia spiritualis compenetrari posset cum materiali, quod tamen Lockius acer alias compenetrationis hostis fieri posse apertis verbis profiteretur.

LXI. In compenetratione corporum nulla est contradictio ex parte modi, quo corpora ex elementis componuntur. Modus compositionis in eo consistit, ut primum elementa per mutuas vires in certa distantia cohærentia efforment corpusculum primitivum, in quo jam ratio compositi, certa que corporis species determinatur (§§. 48. cor. 1. 49.); tum ex corpusculis primitivis ea rursus ratione conjunctis derivativa, & tandem ex his majori numero collectis massa sensibus percipienda oritur; atqui in hoc modo nihil est, quod obstat, quo minus duo corpora inter se, vel idem etiam corpus secum ipso compenetratur. Tamen enim nexus corpusculorum de-

*Essai
concern.
l'ent.
hum.
liv. 2.
ch. 27.*

rivativorum solvatur ; permanet tamen elementorum cohæſio, atque adeo perſiſtunt corpufcula primitiva, ipſaque eſſentia compoſiti, & determinata corporis ſpecies ; ſed hæc infra magis illuſtrabuntur.

In compenetracione nulla latet contradictio. Si in compenetracione corporum quæpiam contradictio lateret, ea ſe teneret, vel ex parte corporis, vel ex parte elementorum, ex quibus corpora coaleſcunt, vel denique ex parte modi, quo corpora ex elementis componuntur ; atqui ex nulla harum partium contradictio quæpiam deprehendi poteſt (§§. 59. 60. 61.) ergo nulla latet in compenetracione corporum contradictio.

COROLL. 1. Quod contradictionem non involvit, eſt in ſe poſſibile (ont. §. 30.), quodque tale eſt, per omnipotentiam Dei effici poteſt (ont. §. 36. cor. 2. 3.) : igitur compenetratio corporum per Dei omnipotentiam effici omnino poteſt.

COROLL. 2. Ex eo, quod admiſſa reali præſentia SS. corporis in myſterio Eucharistiæ videatur quoque admitti debere quædam ejusdem SS. corporis compenetratio, nullo pacto ſequitur dogmati huic fidem denegandam eſſe, ut complures heterodoxi hac ætate contendunt.

SCHOL. 1. Non puto, quemquam fore, qui de majoris propoſitionis veritate dubitet ; non enim quidpiam aliud præter corpus ipſum, elementa, & compoſitionis modum cogitari poſſe videtur, in quo prætenſa contradictio lateat ; aut ſi ſit aliquid, proferant illud in medium adverſarii, ut ſimilem argumentationem eidem accommodare poſſimus. Atque iſtud de iis quoque, quæ ad minoris probationem attuli, notari velim ; cum enim in argumento

negativo verfer, nulla reapse probatio a me jure exigitur (S. 235. schol. l. 5. log.) ; id duntaxat mihi incumbit ostendere, contradictiones, quas adversarii adducunt, esse solum apparentes, in se nullas: id quod & præstium adhuc fuit, & objectorum solutione deinceps præstabitur. Profecto quamdiu repugnantia clare non demonstratur, standum est pro omnipotentia Dei, neque licet ei quodpiam objectum subtrahere eo tantum titulo, quod illud finita nostra intelligentia non assequamur.

SCHOL. 2. Examinemus igitur ea, quæ adversæ partis patronis repugnantiam involvere videntur. Solvuntur objectiones.

Ajunt 1.) Omne corpus est vi essentia impenetrabile: ergo compenetratio corporum est absolute impossibilis. Ratio consequentis est, quia secus posset aliquod corpus simul esse impenetrabile, & simul penetratum, quod repugnat.

Ad. 1. ant. omne corpus est vi essentia impenetrabile, *quatenus habet vim excludendi aliud corpus ex loco, in quo est*, c. ant. *quatenus ea vi actu excludit aliud corpus*, n. ant. Aliud est nempe vis ipsa, aliud effectus ab ea proveniens: illa ad essentiam pertinet, hic non: quare per absolutam Dei potentiam impediri potest: quemadmodum Deus, quod nemo negaverit, efficere potest, ut ignis vi sua non agat actu, & stupam sibi applicatam non adurat. Atque hoc sine absurdo; corpus enim impenetrabile per absolutam Dei potentiam compenetratum esse nequaquam contradictionem involvit; hoc quippe non aliud sonat, quam corpus, quod vi essentia habet vim excludendi omne aliud corpus ex suo loco, nunc ob impedimentum per absolutam Dei potentiam positum actu aliud corpus non excludere: quemadmodum corpus, quod habet vim

labendi in terram, non tamen labitur, cum ipsi quidpiam obstat.

- 2.) Extensio pertinet ad essentiam corporis; sed in compenetracione corporis perit extensio: ergo in compenetracione corporis ejus essentia periret. Atque id de omni ea extensione, quam corpus ante compenetracionem habet, intelligendum est; nam omnino repugnat, ut sit corpus ita extensum absque extensione partium, ut ajunt, integralium.

d. M. Extensio *partium essentialium* pertinet ad essentiam corporis, *c. M.* extensio *partium integralium*, *n. M.* & sic *d. m. n. conf.* Partes *essentiales* voco ipsa elementa, ex quibus immediate corpuscula primitiva constantur, horumque elementorum positio extra se invicem est extensio partium essentialium, quæ utique ad essentiam corporis pertinet; cum per eam non modo ratio compositi, sed species etiam corporis determinetur (§. 48. cor. 1.). Partes denique *integrales* sunt mihi corpuscula ipsa tum primitiva, tum derivativa, propterea quod hæc ad integritatem solum massæ, & magnitudinem voluminis pertinent; nam ablatis quoque aliquot ejusmodi corpusculis manet adhuc ejus speciei corpus, ut patet in massa auri, quæ etiam dissecta rationem auri conservat. Sicut porro ipsæ partes integrales non sunt de essentia corporis, ita neque earum extensio, sive positio extra se invicem ad eam essentiam pertinet: quare tametsi in compenetracione positio partium integralium tollatur, aut immutetur, nihil tamen propterea de essentia compositi, aut corporis ejus speciei decedit. Quamquam nec istud in omni compenetracione evenire necessum est; potest enim exempli causa globus aureus cum globo argenteo compenetrari salva in utroque partium integralium extensione. Unde patet, quam infirmum sit hoc argumentum ab exten-

sione corporis petitum : Id , quod additur ,
 rursum distinctione dissolvo : repugnat , ut sit
 corpus ita extensum *reduplicative* sumtum abs-
 que extensione partium integralium *c. specificative*
 sumtum , *n. Reduplicatio* , ut ait Chav- Lex
phil.
hac tit.
 vinus , est quædam conditio posita in propo-
 sitione determinans , aut indicans rationem , qua
 prædicatum attribuitur subjecto , exprimiturque
 fere his particulis , *ut , quatenus , qua , qua-
 tale , qua ratione* . Fit igitur reduplicatio ,
 cum subjectum aliquod una cum modo , seu
 forma sua tamquam unum aliquod compositum
 consideratur , ita ut modus ipse illius compo-
 siti essentiam ingrediatur ; sic verbi gratia : si
 considerem hominem doctum *ut* doctum , con-
 sidero velut quoddam compositum , quod tam
 per hominem , quam per doctrinam essentiali-
 ter constituitur , licet doctrina ad essentiam
 hominis *specificative* , id est in se solum spe-
 ctati nequaquam pertineat . Pari ratione corpus
 ita extensum spectari potest *vel reduplicative* ,
ut est ita extensum , *vel specificative* , quod
 nunc est ita extensum ; priori modo conside-
 ratum non potest quidem esse absque extensio-
 ne partium integralium , quin hæc ad illius
 essentiam pertinet ; verum hoc minime obest ;
 neque enim dicimus corpus ita extensum , *ut*
est ita extensum compenetrari posse , secum
 ipso videlicet , nam posse cum alio paullo ante
 dictum est ; sed dicimus corpus , quod *est ita*
nunc extensum compenetrari posse , non qui-
 dem manente tota hac extensione , seu volu-
 mine , sed imminuto .

- 3.) Si duo corpora compenetrari possent , pos-
 sent etiam compenetrari duæ substantiæ ; at-
 qui hoc evidenter repugnat ; nam de essentia
 substantiæ est existere extra alteram ; sed sub-
 stantia compenetrata non existit extra alte-
 ram ; ergo *M. p. i.* omnis substantia ex essen-
 tia sua ab altera distinguitur ; sed quod ab al-
 tero

terro distinguitur, existit extra alterum; ergo: 2. Unicum discrimen inter substantiam, & accidens in eo ponitur, quod hujus proprium sit inesse, seu inexistere, cum accidens non habeat existentiam propriam, quæ non sit existentia substantiæ, neque ab hac separatim existere pergat.

¶ 1. Tametsi daremus Leibnitianis, quorum hæc est argumentatio, substantias compenetrari non posse, nihil tamen contra compenetrationem corporum inferri posset, cum ad eam necesse non sit, ut umquam duæ substantiæ compenetrarentur (§. 60.). Sunt equidem, qui mecum hac de re non consentiunt. Ego autem sic existimo: corpus a cum corpore b *vere*, & *proprie* compenetrandum fore, si illud ita in hoc existeret, ut singula illius elementa, persistente tamen mutuo nexu, in intervallis vacuis elementorum alterius ponantur; sic enim arguo: compenetratio (vera) est (vera) simultanea duorum entium in eodem loco co-existentia (§. 58.); sed in hac hypothesi hæc duo corpora, etsi ipsorum elementa non compenetrarentur, vere in eodem loco existerent: igitur vera foret compenetratio: non quidem elementorum, sed ipsorum corporum. Ceterum si quis pertinacius contendat, eam compenetrationem *impropriam*, aut *apparentem* dici debere, non amplius repugnabo logomachiam veritus; si modo eandem fieri posse profiteatur: istud quippe meo proposito plane satisfacit.

¶ 2. *trans M. n. m. ad prob. d. M. de essentia substantiæ est existere extra alteram, id est, existere per existentiam distinctam, & sibi soli propriam, c. M. de essentia substantiæ est existere extra alteram, id est, distinctum locum occupare, n. M. & sic d. m. n. conf.* Cum existentia actualis revera non distinguatur ab essentia actuali (ont. §. 55.), necesse uti-

utique est, ut sicut quævis substantia habet distinctam essentiam, ita etiam habeat distinctam existentiam, sibi que soli propriam; verum, inde minime inferitur, eam in distincto quoque loco necessario existere. Neque inter locum, & existentiam ulla est paritas; existentia enim est forma interna realiter cum essentia, ut ajunt, identificata: sicut igitur essentia incommunicabilis est, nec duabus simul substantiis communis esse potest, ita idem pariter de existentia affirmandum est. Contra locus realis, cum sit determinatus modus coexistendi simultaneis (ont. §. 208.), est respectus duntaxat externus, qui substantiam interne non afficit, nec quidquam in ea mutat: quare fieri potest, ut hic respectus sit pluribus substantiis simul communis, quemadmodum respectus ad successiva omnes illis substantiis communis est, quæ eodem tempore simul existunt.

Ad id, quod in ulteriore probatione primo loco ponitur, ajo, precario sumi a Leibnitianis illa tantum distincta esse, quæ distinctis in locis existunt; immo hoc ipsum hic in questione versatur: unde absque vitio circuli opponi non potest. Deinde numquid accidens distinguitur a substantia, in qua inhæret? existitne illud propterea in loco distincto? certe, qui identitatem, & distinctionem entium ab identitate, & distinctione loci repetunt; non habent, unde ipsam hanc loci identitatem, & distinctionem explicent. Quare illa solum distincta dici debent, quæ ipsum hoc esse commune non habent (ont. §. 63.); unde omnis substantia ex essentia sua, & per essentiam suam ab alia distinguitur, seu in diverso, seu in eodem cum altera loco existat. (vid. §. 60.).

Ad alterum: discrimen inter substantiam, & accidens istud est; substantia per se existit; accid.

nulloque subjecto inhaesionis eget ; contra accidens non potest existere sine substantia , in qua velut suo subjecto inhaeret , & a qua ita in existendo pendet , ut ab ea separatim continuo pereat . Est porro hic modus , quo accidens substantiae *inexistit* , longe diversus ab eo , quo substantia alteri , quacum compenetratur , *inexistit* ; substantia enim compenetrata eundem modum existendi , quem ante compenetrationem ut substantia habuit , retinet : permanente nempe eadem essentia perseverat eadem existentia . Turpe igitur æquivocationis vitium in vocabulis *inesse* , *inexistere* hic committitur , super quo tamen velut firmissimo fundamento suum Leibnitiani systema ædificant .

- 4.) Si duo extensa abstracta concipiantur compenetrari , ex duobus extensis unum efficitur : igitur etiam idem fiat duabus substantiis , aut extensis concretis , necesse est , si compenentrentur . Ita arguit Antonius Genuensis : „ Si „ duæ substantiæ formaliter extensæ se pene- „ trent omnimoda compenetracione , erunt u- „ na , eademque substantia . Nihil esse potest „ apertius . Quis enim ut simili exemplo utar , „ duos globos ejusdem molis a , b compene- „ tratos in eundem habeat pro distinctis ? ni- „ si fortasse , qui nondum intelligere potuit , „ quid sit res distingui . Sane ut duæ exten- „ siones penetratæ sunt eadem extensio , ita „ duæ substantiæ extensæ penetratæ eadem „ substantia . „ Tum ulterius prosequitur : „ Proprietates separari a substantia nequeunt : „ ergo cum miscentur in duobus extensis com- „ penetratis , necesse est , ut & ipsæ sese com- „ penentrent , id est , ut sibi se mutuo com- „ municent , atque ut unum sint idemque lo- „ co , & tempore , quemadmodum duæ illæ „ substantiæ loco , & tempore sunt unum . „ Capiatur cybus vitri , atque cum æquali cu-

*Elem.
met. p.
x. 9. 61.
sch.*

„ bo auri compenetretur, erunt loco, ac tem-
 „ pore eodem unus idemque cubus extensi.
 „ Dicas nunc proprietates in his duobus cubis
 „ non compenetrari: erit malleabilitas auri
 „ aut loco, aut tempore distincta a fragilitate
 „ vitri; quod qui concipit, simul concipiat
 „ duos illos cubos compenetratos non unum,
 „ sed duos esse extensi cubos. „ Ita ille ve-
 lut ex tripode.

Imprimis non intelligo, quid sit substantia
 formaliter extensa; nam ut ipse docet: „ sub-
 „ stantia nequit esse, nisi simplex. „ Dein-
 de disparem rationem assigno: extensum in
 abstracto, cum nihil sit reale, nihil habet,
 nisi quod ipsi mens nostra tribuit; concipi-
 mus autem nihil prorsus nisi meram extensio-
 nem, vel in longum tantum, vel etiam in
 latum, vel simul in profundum. Inde fit, ut
 cum ejusmodi extensionem cum altera com-
 penetrari cogitamus, nihil amplius sit, per quod
 una ab altera discernatur; non enim possumus
 ideam animo informare, per quam duæ lineæ
 mathematicæ in eodem loco existentes, ut
 duæ, repræsententur, quemadmodum nec duas
 sectiones ejusdem tabulæ in eodem loco exsi-
 stentes concipere possumus. Contra duæ sub-
 stantiæ, vel duo extensa concreta, id est,
 duo corpora, si compenetrentur, servant om-
 nia eadem, per quæ antea discernebantur;
 servant nimirum suas vires activas, eruntque
 proinde adhuc duo repellentia, duo attrahen-
 tia, duo inertia, duo mobilia, verbo duo glo-
 bi a, & b. Neque enim hæ, & similes pro-
 prietates a loco, aut ab extensione partium
 integralium pendent. Fieri fortasse posset, ut
 nos duos globos a, & b compenetratos discer-
 nere non valeamus; verum non quæritur,
 quid nobis, sensibusque nostris appareat, sed
 quid in se sit, quidque intellectus infinitus
 perspicere debeat.

Loc. cit.
§. 23.

Nec plus roboris ea continent, quæ sequuntur. Certe sicut in eodem corpore, vel in eadem substantia multæ sunt proprietates distinctæ, quin inter sese commisceantur; ita possunt eadem proprietates manere inter se distinctæ in duabus substantiis, vel corporibus compenetratis. Præterea a veritate alienum est, idem sonare, *esse unum idemque loco, & tempore, & inter se commisceri*; atque de hoc ipso quæstio vertitur; quærimus enim, utrum, si compenetratio fieret, proprietates unius substantiæ cum proprietatibus alterius confunderentur, & commiscerentur, tametsi lubentes demus, easdem proprietates & loco, & tempore unum idemque esse. Nam istud non aliud significat, quam has proprietates eodem tempore in eodem loco existere, quod neutriquam impedit, ut ex non in diversis subjectis inhæreant. Profecto vel ex eo, quod ipso fatente proprietates a substantia separari nequeant, manifeste sequitur, quamlibet proprietatem etiam facta compenetratione suæ substantiæ inhæsuram; cum hic nihil mutetur, nisi locus, qui utpote respectus externus internam subjecti constitutionem, aut ejus proprietates minime afficit. Atque hinc apparet sophisma esse, non argumentationem, quo Genuensis uctitur. Ait ex substantiis duabus compenetratis fieri *unicam*, idque intelligit *quoad tempus, & locum*. Neque vero contra hoc pugnamus; sed id ipsum asserimus: quid enim est compenetrari, nisi *unum fieri quoad tempus, & locum*? Et quid hic absurdi latet? Nonne substantiæ, quæ ante compenetrationem simul exstiterunt, erant *unum quoad tempus*? Cur igitur non possent etiam simul esse *unicum quoad locum*, ita tamen, ut reapsæ, & in se maneant duæ substantiæ? In casu igitur proposito duo illi cubi compenetrati erunt duo, & quis suas retinebit proprietates, ita ut malleabilitas auri

in cubo aureo , & fragilitas vitri in cubo vi-
treo futura sit ; sed locus erit utrique com-
munis .

5.) Si compenetratio corporum esset possibilis ;
posset corpus compenetrari secum ipso usque
ad punctum quoddam spatii ; sed hoc fieri ne-
quit , etsi poneretur punctum illud extensione
gaudere ; omne enim corpus est ens composi-
tum : ergo essentia omnis corporis est talis nex-
us talium partium ; sed in hoc casu tollere-
tur talis nexus talium partium : ergo .

d. M. Si compenetratio corporum esset possi-
bilis , posset corpus compenetrari secum ipso
usque ad punctum quoddam spatii *extensum*
adhuc , & *divisibile* , seu accuratius loquendo ,
ad *spatiolum aliquod minimum* , c. M. ad
punctum quoddam *simplex* , & *individuum* ,
n. M. & sic d. m. n. *conf.* Ratio est , quia ,
cum corpus etiam compenetratum debeat ma-
nere corpus , necesse est , ut saltem omnia cor-
puscula primitiva illæsa permaneant ; nam si
& ista dissolverentur , nec corpus absolute , nec
huius speciei amplius adesset ; sed sola rema-
nerent elementa , ex quibus corpus antea com-
ponebatur , quæ si ad contactum mutuum per-
venirent , omnia simul in uno individuo pun-
cto spatii consisterent . Jam vero , etsi ponamus
omnia corpuscula primitiva alicujus massæ
ante sensibilis intra se existere , egebunt ta-
men spatiolo quodam dividuo in tot nempe
partes , in quod ipsum illud corpusculum se-
cari potest : igitur corpus quodvis potest per
compenetrationem redigi ad minimum quod-
dam spatiolum , nullo tamen pacto ad pun-
ctum spatii individuum . Idem cum proportio-
ne dicendum de corpore heterogeneo , seu ta-
li , quod ex diversæ speciei corporibus coales-
cit ; hac quippe in hypothesi omnia omnium
diversarum specierum corpuscula primitiva sal-
vari deberent . Cum autem dico , corpus pos-

se usque ad spatiolum uni corpusculo primitivo respondens compenetrari, nihil ipsius essentiae contrarium admitto; unde ad probationem.

Ajo: *c. ant. d. conf.* ergo essentia omnis corporis est talis nexustalium partium *essentialium* *c. conf. integralium*, *n. conf.* & sic *d. m. subs. n. conf.* Quid per partes *essenciales*, & *integrales* intelligam, jam supra (n. 2.) innuavi. Patec porro in presenti casu solus partium *integralium* nexus tolli, non iter *essentialium*; nam cum secundum dicta omnia corpuscula primitiva integra permaneant, permanet etiam nexus elementorum, qui essentiam, & speciem corporis constituit. Atque ex his colliges: 1. non prorsus a vero aberrasse Cartesium, dum essentiam corporis in extensione constituit; nam revera sine omni extensione nullum corpus esse potest, cum omne corpus sit ens compositum; 2. illos contra ad improprie loqui, aut omnino a veritate destituisse, qui ajunt posse corpus per absolutam Dei potentiam usque ad unicum punctum compenetrari, & tamen manere corpus 3. illorum denique obscurum esse sermonem, qui docent corpus compenetratum existere definitive (ont. §. 201. schol.); falsum enim istud est, si partes *essenciales* intelligentur: comparate tamen ad partes *integrales* aliquo sensu sustineri potest; nam si plura corpuscula primitiva inter se existant, iisdem simul sumtis eadem partem spatii imaginarii respondere concipietur.

Ad extremum dicet fortasse aliquis: omnia, quibus compenetrationis possibilitatem evincere adlaboravi, argumenta in recenti hoc de corporum genesi systemate inniti, quod tamen etiam nunc in acrem a philosophis disceptationem vocatur. At vero demus systema hoc nondum absoluta certitudine pollere, nemo certe adeo inimicus erit, ut illud etiam possi-

bili;

bilitate expoliet. Jam vero vel sola systematis hujus possibilitas compenetrationis quoque possibilitatem satis commonstrat; clare enim inde colligitur, compenetrationem corporum in se spectatam nequaquam repugnare, id quod mihi tunc demonstrandum fumi. Deinde ulterius argumentando progredi licebit: si nos imbecilli nostra intelligentia vel unum modum detegere possimus, quo corporum compenetratio effici queat, dubitari non potest, quin innumeri alii sint, nobis quidem ignoti, at infinito intellectui optime perspecti, quibus idem obtineri possit. Quare non est, cur Deo hanc potentiam denegemus. Sed jam ad alteram hujus capitis partem transeamus.

LXIII. *Replicatio* est simultanea ejusdem Quid replicatio?
entis in duobus, vel pluribus locis existentia.

ENOL. Hic rursus de ente infinito sermo non est; illud enim ab essentiali sua immensitate habet, quod utique præsens adsit. Porro tamen de ente generatim definitio data sit, quæstio tamen hæc cum primis ad corpora pertinet ob rationem supra allatam. Quærunt igitur, utrum per absolutam saltem Dei potentiam unum idemque corpus eodem temporis momento in pluribus locis existere queat; nam spectatis naturæ viribus id fieri nequaquam posse quotidiana experientia docet, cujus testimonium si rejiciamus, nihil amplius in rebus naturalibus certum erit.

LXV. *Multiplicato loco non multiplicatur ipsum corpus.* Multiplicato loco solum multiplicatur respectus quidam ad coexistentia simultanea (ont. §. 208.) corpori ipsi exteriori; sed multiplicato id genus respectu exteriori corpus ipsum non multiplicatur, quemadmodum patet in corpore per plura temporis

Quæ
quæstio?

momenta in eodem loco, vel successive in pluribus locis existente, quod certe unum idemque permanet; ergo multiplicato loco non multiplicatur ipsum corpus.

LXV. *In replicatione corpus unum non evadit multiplex.* Si in replicatione unum corpus evaderet multiplex, id fieret ob locum multiplicatum: sed ob multiplicatum locum ipsum corpus non evadit multiplex (§. præc.): ergo in replicatione unum corpus non evadit multiplex.

In repli-
catione
nulla est
contra-
dictio.

LXVI. *In replicatione corporum nulla est contradictio.* Si in replicatione corporum aliqua esset contradictio, illa foret in eo, quod unum corpus evadat multiplex, in quo omnes fere adversarii consentiunt; sed in replicatione unum corpus non evadit multiplex (§. præc.), ut inscite pronunciat Clericus: ergo in replicatione corporum nulla est contradictio.

Præf. ad
Ont.

COROLL. 1. Igitur replicatio corporum in se possibilis est (ont. §. 30.), ac per absolutam Dei potentiam effici potest (ontol. §. 36. coroll. 2. 3.).

COROLL. 2. Ex eo, quod in sacrosancto Eucharistiae mysterio sanctissimum Christi corpus in pluribus locis simul existat, nullum potest argumentum, quo heterodoxi catholicum dogma impugnent.

SCHOL. Huc quoque pertinent ea, quæ supra (§. 62. schol. 1.) monui. Mearum nimirum partium non est positiva ratione comprobare, nullam in replicatione corporum contradictionem latere; id enim per sese inde consequitur, quod nulla in hunc usque diem aperta contradictio demonstrata fuerit: levis certe sunt, quæ in contrariam partem adferuntur, ut mox videbimus. Ajunt enim

Respon-
detur
objectis.

1.) Certum est illa esse realiter distincta, quæ
di.

distinctis in locis existunt : replicatio igitur corporum contradictionem involvit . *ant. p.* Certum est illa esse realiter distincta, quæ separata sunt ; sed illa, quæ distinctis in locis existunt, sunt separata : ergo. Accedit, quod separabilitas quoad locum sit nota certissima realis distinctionis ; atqui in iis, quæ distinctis in locis existunt, habetur separabilitas quoad locum : igitur in illis quoque distinctio realis datur .

Ad d. ant. Certum est *physice* illa esse realiter distincta, quæ distinctis in locis existunt, *c. ant.* etiam *metaphysice* *neg. ant. & conf.* Certitudo hæc experientia solum nititur, ac proinde physica tantum est ; experientia enim docet duntaxat, quid secundum communes naturæ leges & fiat, & fieri debeat ; id vero non prohibet, quo minus Deo sic volente contrarium quandoque efficiatur . Quemadmodum cum video regulam ex recto decidentem, certus quidem sum physice, eam ad terram usque lapsuram ; interea tamen in se non repugnat, ut in aere suspensa hæreat .

Ad prob. c. M. d. m. si secundum communes naturæ leges sic existant, *c. m.* secus *n. m. d.* etiam *conf.* Quæ separata sunt, aut separari possunt, illa sunt reapse distincta, atque hoc nobis certitudine etiam metaphysica constat ; repugnat enim, ut aliquid a se ipso separaretur . Porro quæ secundum communes naturæ leges in distinctis locis existunt, sunt in se separata, quemadmodum loca, in quibus ita existunt, a se separantur : & de hoc quoque certitudo metaphysica habetur . Unde metaphysice certum est ea, quæ distinctis in locis naturaliter existunt, reipsa distincta esse . At vero, utrum, quæ distinctis in locis existunt, naturaliter existant, certitudine metaphysica scire nequaquam possumus ; cognitio enim, quæ hic habetur, sensibus solum com-

se usque ad spatium uni corpusculo primitivo respondens compenetrari, nihil ipsius essentiae contrarium admitto; unde ad probationem.

Ajo: *c. ant. d. conf.* ergo essentia omnis corporis est talis nexustalium partium *essentialium* *e. conf. integralium*; *n. conf.* & sic *d. m. subs. n. conf.* Quid per partes *essenciales*; & *integrales* intelligam, jam supra (n. 2.) innuavi. Pater porro in presenti casu solum partium *integralium* nexum tolli, non item *essentialium*; nam cum secundum dicta omnia corpuscula primitiva integra permaneant, permanet etiam nexus elementorum, qui essentiam, & speciem corporis constituit. Atque ex his colliges: 1. non prorsus a vero aberrasse Cartesium, dum essentiam corporis in extensione constituit; nam revera sine omni extensione nullum corpus esse potest, cum omnino corpus sit ens compositum; 2. illos contra autem improprie loqui, aut omnino a veritate deflere, qui ajunt posse corpus per absolutam Dei potentiam usque ad unicum punctum compenetrari, & tamen manere corpus 3. illorum denique obscurum esse sermonem, qui docent corpus compenetratum existere definitive (ont. §. 201. schol.); falsum enim istud est, si partes *essenciales* intelligentur: comparate tamen ad partes *integrales* aliquo sensu sustineri potest; nam si plura corpuscula primitiva intersese existant, iisdem simul sumtis eadem pars spatii imaginarii respondere concipietur.

Ad extremum dicet fortasse aliquis: omnia, quibus compenetrationis possibilitatem evincere adlaboravi, argumenta in recenti hoc de corporum genesi systemate inniti, quod tamen etiam nunc in acriorem a philosophis disceptationem vocatur. At vero demus systema hoc nondum absoluta certitudine pollere, nemo certe adeo inimitus erit, ut illud etiam possi-

bilitate expoliet. Jam vero vel sola systematis hujus possibilitas compenetrationis quoque possibilitatem satis commonstrat; clare enim inde colligitur, compenetrationem corporum in se spectatam nequaquam repugnare, id quod mihi unice demonstrandum fuisse. Deinde ulterius argumentando progredi licebit: si nos imbecilli nostra intelligentia vel unum modum detegere possimus, quo corporum compenetratio effici queat, dubitari non potest, quin innumerum alii sint, nobis quidem ignoti, at infinito intellectui optime perspecti, quibus idem obtineri possit. Quare non est, cur Deo hanc potentiam denegemus. Sed jam ad alteram hujus capitis partem transeamus.

LXIII. *Replicatio* est simultanea ejusdem entis in duobus, vel pluribus locis existentia. Quid replicatio?

SCHOL. Hic rursus de ente infinito sermo non est; illud enim ab essentiali sua immensitate habet, quod utique præsens adsit. Porro tamen de ente generatim definitio data sit, quæstio tamen hæc cum primis ad corpora pertinet ob rationem supra allatam. Quærunt igitur, utrum per absolutam saltem Dei potentiam unum idemque corpus eodem temporis momento in pluribus locis existere queat; nam spectatis naturæ viribus id fieri nequaquam posse quotidiana experientia docet, cujus testimonium si rejiciamus, nihil amplius in rebus naturalibus certum erit.

Quæ
quæstio?

LXV. *Multiplicato loco non multiplicatur ipsum corpus.* Multiplicato loco solum multiplicatur respectus quidam ad coexistentiam simultaneam (ont. §. 208.) corpori ipsi externus; sed multiplicato id genus respectu externo corpus ipsum non multiplicatur, quemadmodum patet in corpore per plura temporis

momenta in eodem loco, vel successive in pluribus locis existente, quod certe unum idemque permanet; ergo multiplicato loco non multiplicatur ipsum corpus.

LXV. *In replicatione corpus unum non evadit multiplex.* Si in replicatione unum corpus evaderet multiplex, id fieret ob locum multiplicatum: sed ob multiplicatum locum ipsum corpus non evadit multiplex (§. præc.): ergo in replicatione unum corpus non evadit multiplex.

LXVI. *In replicatione corporum nulla est contradictio.* Si in replicatione corporum aliqua esset contradictio, illa foret in eo, quod unum corpus evadat multiplex, in quo omnes fere adversarii consentiunt; sed in replicatione unum corpus non evadit multiplex (§. præc.), ut inscite pronuntiat Clericus: ergo in replicatione corporum nulla est contradictio.

In repli-
catione
nulla est
contra-
dictio.

Præf. ad
Ont.

COROLL. 1. Igitur replicatio corporum in se possibilis est (ont. §. 30.), ac per absolutam Dei potentiam effici potest (contol. §. 36. coroll. 2. 3.).

COROLL. 2. Ex eo, quod in sacrosancto Eucharistiae mysterio sanctissimum Christi corpus in pluribus locis simul existat, nullum peti potest argumentum, quo heterodoxi catholicum dogma impugnent.

SCHOL. Huc quoque pertinent ea, quæ supra (§. 62. schol. 1.) moxui. Meorum nimirum partium non est positiva ratione comprobare, nullam in replicatione corporum contradictio- nem latere; id enim per sese inde consequitur, quod nulla in hunc usque diem aperta contra- dictio demonstrata fuerit: levia certe sunt, quæ in contrariam partem adferuntur, ut mox videbimus. Ajunt enim

Respon-
detur

objectis. 1.) Cernum est illa esse realiter distincta, quæ
di.

distinctis in locis existunt : replicatio igitur corporum contradictionem involvit . *ant. p.* Certum est illa esse realiter distincta , quæ separata sunt ; sed illa , quæ distinctis in locis existunt , sunt separata : ergo . Accedit , quod separabilitas quoad locum sit nota certissima realis distinctionis ; atqui in iis , quæ distinctis in locis existunt , habetur separabilitas quoad locum : igitur in illis quoque distinctio realis datur .

Ad d. ant. Certum est *physice* illa esse realiter distincta , quæ distinctis in locis existunt , *c. ant.* etiam *metaphysice neg. ant. & conf.* Certitudo hæc experientia solum nititur , ac proinde physica tantum est ; experientia enim docet duntaxat , quid secundum communes naturæ leges & fiat , & fieri debeat ; id vero non prohibet , quo minus Deo sic volente contrarium quandoque efficiatur . Quemadmodum cum video regulam ex tecto decidentem , certus quidem sum physice , eam ad terram usque lapsuram ; interea tamen in se non repugnat , ut in aere suspensa hæreat .

Ad prob. c. M. d. m. si secundum communes naturæ leges sic existant , *c. m.* secus *n. m. d.* etiam *conf.* Quæ separata sunt , aut separari possunt , illa sunt reapse distincta , atque hoc nobis certitudine etiam metaphysica constat ; repugnat enim , ut aliquid a se ipso separaretur . Porro quæ secundum communes naturæ leges in distinctis locis existunt , sunt in se separata , quemadmodum loca , in quibus ita existunt , a se separantur : & de hoc quoque certitudo metaphysica habetur . Unde metaphysice certum est ea , quæ distinctis in locis naturaliter existunt , reipsa distincta esse . At vero , utrum , quæ distinctis in locis existunt , naturaliter existant , certitudine metaphysica scire nequaquam possumus ; cognitio enim , quæ hic habetur , sensibus solum com-

paratur. Jam autem corpus in duobus locis per replicationem existens non separatur a se ipso, tametsi loca sint separata: ad hoc enim, ut aliquid ab altero separaretur, requiritur, ut illud ibi non sit, ubi est alterum; corpus vero replicatum existens in uno loco non abest a se ipso existente in alio loco. Paritas a tempore hæc insigniter illustrat: illa tantum tempore a se separantur, quorum alterum non existit eo tempore, quo existit alterum; at vero, ubi idem corpus per plura temporis momenta perdurat, non utique ipsum vigesimo momento existens separatur a se ipso primo momento existente, etsi momenta inter se separata, & distincta sint.

Ad id, quod additur rursus *d. M.* hoc sensu: quod ea sint distincta, quorum alterum potest existere in determinato loco non existente illic altero, *c. M.* hoc sensu: quod omnia ea sint distincta, quæcumque in distinctis locis qua demum cumque ratione existunt, *n. M.* & sic *d. m. n. conf.* Sume corpus *a*; si istud existere possit in loco *c*, quin in eodem simul existat corpus *b*, aderit nota certissima realis inter *a*, & *b* distinctionis. Id autem in replicatione non contingit; si enim corpus *a* ex loco *c* replicetur in locum *d*, corpus *a* non potest existere in loco *d* sine illo, quod existit in loco *c*, id est, sine se ipso. Inde cum video corpus *a* existere in loco *c*, & aliud prorsus simile *b* in loco *d*, scio quidem adesse separabilitatem quoad locum, seu realem locorum separationem; non tamen metaphysice certus sum corpus *a* ab corpore *b* realiter distingui, cum hæc distinctio fundetur solum in naturæ legibus, quas permutare Deo liberum est. Pater igitur non omnem separabilitatem quoad locum certissimam notam distinctionis realis esse.

2.) Si corpus quodpiam simul in locis *a*, & *b*

existeret, distaret illud a se ipso; atqui hoc absurdum est: ergo. *M. p.* loca a, & b distarent: ergo etiam corpus in iis existens. *c. p.* ideo loca a & b distarent, quia locus a haberet aliam relationem ad coexistentia, quam locus b; sed etiam corpus in loco a existens aliam haberet relationem, quam corpus in loco b existens: ergo si.

R. n. M. Non enim corpus distaret a se ipso; sed ipsum in locis distantibus simul existeret; *Ad prob. c. ant. n. conf.* ad hujus *prob. d. M.* ideo *duntaxat*, *n. M.* ideo & *simul*, quia relationem ad coexistentia, quam haberet locus a, non etiam haberet locus b. *c. M.* sic *d. m. n. conf.* Disparitas in eo sita est: imprimis eam relationem ad simultanea, quam habet locus a, non haberet quoque locus b; deinde etiam inter puncta spatii imaginarii, quæ duobus his locis a, & b responderent, duci posset linea, quæ distantiam & designaret, & metiretur: ex quibus colligitur loca a, & b distare. Contra corpus, etsi per replicationem existens in loco b aliam relationem habeat ad coexistentia, quam idem corpus, prout in loco a existit, habet tamen simul eandem relationem, quam habet corpus, quod in loco a existit, cum sit idem. Inde vero tantum sequitur, idem corpus duas simul diversas relationes ad coexistentia habere, id est in duobus locis simul existere; sicut cum idem corpus successive diversas relationes ad distincta temporis momenta habet, non sequitur illud a se distare, sed tantum in diversis momentis existere.

3.) Si corpus a posset replicari, posset illud alteri b simul esse contiguum, & simul ab eodem distare; sed hoc repugnat: ergo.

R. d. M. respectu *diversi* loci, *c. M.* respectu *eiusdem* loci *n. M.* sic *d. m. n. conf.* Fateor in uno eodemque loco non posse corpus b

contingi a corpore a, & simul non contingi; hic enim idem affirmaretur, & negaretur de eodem subjecto sub eodem respectu; at verò mutato respectu, & multiplicato loco hæc contradictio cessat: patet id ex duabus propositionibus, quæ in hoc casu veræ forent, quæque nequaquam contradictoriæ sunt, videlicet: *corpus a, prout existit in loco c, contingit corpus b, & corpus a, prout existit in loco d, non contingit corpus b.* Generatim hic probandum est, ex eo, quod quæpiam absurda videantur, & convenire nequeant corporibus, prout ipsa secundum naturæ leges uno tantum loco existunt, indubitanter colligi non posse; ea ita absolute repugnare, ut nec corporibus replicatis competere queant; si enim eorum repugnantia ab unitate duntaxat loci pendeat, quod sæpiissime evenit, necesse est, ut hac unitate per replicationem sublata & ipsa tollatur.

- 4.) Facta replicatione posset idem corpus moveri motibus contrariis, in uno loco versus ortum, in altero versus occasum, quod rursus repugnare ita ostendunt: nequit idem corpus in eodem loco moveri simul versus ortum, & occasum: ergo neque in diverso loco. *c. p.* Ideo-
immum; quia inde sequeretur idem corpus moveri versus ortum, & simul non moveri: sed idem sequeretur in casu altero: ergo si.

3. n. assertum. *Ad prob. c. ant. n. conf.* Ad hujus prob. d. *M.* sub eodem respectu, *c.* *M.* sub diverso respectu *n.* *M.* sic d. *m. n. conf.* Nempe etsi idem corpus non replicatum motibus contrariis ferri nequeat, potest idem tamen contingere corpori replicato, eum ob diversitatem locorum respectus mutetur. Etenim posita replicatione solum sequitur, idem corpus moveri versus ortum *positive*, & non moveri versus ortum *exclusively*, id est, ita in uno loco moveri versus ortum, ut non exclu-

dat.

dat, seu impediatur motum versus occasum pro alio loco. *Movetur igitur corpus in loco a versus ortum positive, & non movetur in loco a versus ortum exclusive*: rursus, *idem corpus in loco b movetur versus occasum positive, & in eodem loco b non movetur versus occasum exclusive*, quæ enunciationes, ut facile patet, non sunt contradictoriæ. Ceterum de motu plane laborandum non videtur: novimus enim idem corpus non replicatum comparate ad alia moveri posse, dum comparate ad alia quiescit, ut evenit homini in navi sedenti, dum ea secundo flumine decurrit.

§. 1. Corpus in locis a, & b existens circumscriberetur loco a, & simul non circumscriberetur; atqui hoc utique contradictorium est: ergo.

§. 2. d. M. Corpus in locis a, & b existens circumscriberetur loco a, & simul non *solo* loco a circumscriberetur, c. M. circumscriberetur *solo* loco a, & simul *solo* loco a non circumscriberetur, n. M. sic d. m. n. *conf.* Corpus replicatum tot locis circumscribitur, id est, circumscriptive existit, in quot locis replicatur; nam in omnibus locis ejus partes diversæ diversis partibus spatii imaginarii commensurantur; quod proprie est circumscriptive existere (ont. §. 201. sch.). Inde corpus replicatum circumscriptive existit in loco a; sed non *solum* in loco a, cum etiam circumscriptive existat in loco b. Quod si per *circumscribi* loco cum Chavvino, aliisque intelligas *Lex loco contineri*, & quasi *ejus terminis concludi*, Philip. di, ajo: corpus existens in loco a continetur, *hoc vis.* concluditur, seu circumscribitur loco a *positive*, & non continetur eodem loco *exclusive*; id est: ita totum corpus continetur loco a, ut simul non excludatur, seu impediatur, quominus etiam totum loco b, & alio quovis contineri possit, non quidem secundum com-

contingi a corpore a, & simili non contingi; hic enim idem affirmaretur, & negaretur de eodem subjecto sub eodem respectu; at verò mutato respectu, & multiplicato loco hæc contradictio cessat: patet id ex duabus propositionibus, quæ in hoc casu veræ forent, quæque nequaquam contradictoriæ sunt, videlicet: *corpus a, prout existit in loco c, contingit corpus b, &, corpus a, prout existit in loco d, non contingit corpus b.* Generatim hic probandum est, ex eo, quod quæpiam absurda videantur, & convenire nequeant corporibus, prout ipsa secundum naturæ leges uno tantum loco existunt, indubitanter colligi non posse; ea ita absolute repugnare, ut nec corporibus replicatis competere queant; si enim eorum repugnantia ab unitate duntaxat loci pendeat, quod sæpiissime evenit, necesse est, ut hac unitate per replicationem sublata & ipsa tollatur.

- 4.) Facta replicatione posset idem corpus moveri motibus contrariis, in uno loco versus ortum, in altero versus occasum, quod rursus repugnare ita ostendunt: nequit idem corpus in eodem loco moveri simul versus ortum, & occasum: ergo neque in diverso loco *c. p.* Ideo *impossibile*; quia inde sequeretur idem corpus moveri versus ortum, & simul non moveri: sed idem sequeretur in casu altero: ergo si.

3. n. assertum. *Ad prob. c. ant. n. conf.* Ad hujus prob. d. *M.* sub eodem respectu, *c. M.* sub diverso respectu *n. M.* sic d. *m. n. conf.* Nempe etsi idem corpus non replicatum motibus contrariis ferri nequeat, potest idem tamen contingere corpori replicato, eum ob diversitatem locorum respectus mutetur. Etenim posita replicatione solum sequitur, idem corpus moveri versus ortum *positive*, & non moveri versus ortum *exclusively*, id est, ita in uno loco moveri versus ortum, ut non exclu-

dat.

dat, seu impediatur motum versus occasum pro alio loco. *Movetur igitur corpus in loco a versus ortum positive, & non movetur in loco a versus ortum exclusive*; rursus, *idem corpus in loco b movetur versus occasum positive, & in eodem loco b non movetur versus occasum exclusive*, quæ enunciationes, ut facile patet, non sunt contradictoriæ. Ceterum de motu plane laborandum non videtur: novimus enim idem corpus non replicatum comparate ad alia moveri posse, dum comparate ad alia quiescit, ut evenit homini in navi sedenti, dum ea secundo flumine decurrit.


5.) Corpus in locis a, & b existens circumscriberetur loco a, & simul non circumscriberetur; atqui hoc utique contradictorium est: ergo.


6.) d. M. Corpus in locis a, & b existens circumscriberetur loco a, & simul non *solo* loco a circumscriberetur, c. M. circumscriberetur *solo* loco a, & simul *solo* loco a non circumscriberetur, n. M. sic d. m. n. *conf.* Corpus replicatum tot locis circumscribitur, id est, circumscriptive existit, in quot locis replicatur; nam in omnibus locis ejus partes diversæ diversis partibus spatii imaginarii commensurantur; quod proprie est circumscriptive existere (ont. §. 201. sch.). Inde corpus replicatum circumscriptive existit in loco a; sed non *solum* in loco a, cum etiam circumscriptive existat in loco b. Quod si per *circumscribi loco* cum Chavvino, aliisque intelligas *Loco contineri*, & quasi *ejus terminis concludi*, ajo: corpus existens in loco a continetur, concluditur, seu circumscribitur loco a *positive*, & non continetur eodem loco *exclusive*; id est: ita totum corpus continetur loco a, ut simul non excludatur, seu impediatur, quominus etiam totum loco b, & alio quovis contineri possit, non quidem secundum com-

Loco
Philip.
hoc rito.

munes naturæ leges, sed per efficacissimam Dei easdem immutantis voluntatem.

Atque hæc ad comprobendam tum compenetrationis, tum replicationis possibilitatem dicta sufficiant: curiosius porro inquirere, quid admissa compenetratione, & replicatione fieri possit, aut non possit; quæ nominatim adjuncta repugnent, quo determinate modo eæ efficiantur, nec utile, nec necessarium est; is solus ea novit, qui omnia novit, & efficere potest. Philosophi duntaxat est, hanc Deo potentiam tribuere; cetera illi relinquat, oportet. Quod ab omni dubio longissime removetur, istud est, Deum lusus, aut joci causa contrastabilitas naturæ leges nihil moliri: quare injuria afficit supremum naturæ auctorem, qui ab ejusmodi quæstionibus, quæ veræ solum religionis ab obrectatorum calumniis vindicandæ gratia agitantur, ad examinandas inutiles mugas defectit.





SECTIO II.

D E

PERFECTIONE MUNDI.

§. LXVII.



Posita perfectione entis principium quoque perfectionis ponendum est (ont. §. 89. cor.): si igitur mundo perfectio competat, necesse est, ut hujus perfectionis principium existeret.

Exstat
princi-
pium
perfe-
ctionis
mundi.

LXVIII. *Principium perfectionis mundi est illud finis, quem Deus in procreatione mundi sibi praestituit. Principium perfectionis mundi est illud, ad quod obtinendum omnia tendunt, quæ in mundo insunt (ibid.): ergo etiam illud, quod Deus tam per ipsam creationem, quam per mundum a se conditum tamquam medium consequitur; sed id, quod agens per suam actionem, & per medium, quo utitur, obtinet, est agentis finis (ont. §§. 158. 162.): ergo principium perfectionis mundi est finis, quem Deus in procreatione mundi sibi praestituit.*

illud-
que est
finis Dei
creantis.

COROLL. Ergo cum de perfectione mundi agitur, finis, quem Deus in ejus procreatione sibi proposuit, investigandus est.

hoc lo-
co inve-
stigan-
dus.

SCHOL. Hunc Dei creantis finem vulgo finem quoque mundi dicimus; neque id sine ratione; finis enim agentis est etiam finis medii, quo agens ad eum consequendum utitur: certe medium, quod quis ad aliquid obtinendum eligit, vel ex natura sua, vel ex intentione sal-

Finis
Dei est.
etiam
finis
mundi.

tem

tem eligentis, potissimum utroque ex capite
ad eundem finem dirigitur.

Quo-
tuplex
mundi
perfe-
ctio?

LXIX. Perfectio hujus mundi vel compa-
rate solum ad suum finem, vel comparate ad
alios mundos possibiles spectari potest: priori
respectu oritur perfectio mundi sui in genere
(ont. §. 93. sch. n. 5.); posteriori autem quæ-
stio enascitur, utrum hic mundus inter omnes
possibiles perfectione excellat, sive, ut ajunt,
omnium possibilium optimus sit (ibid. n. 1.).
Hæc tria præsentem sectionem absolvent.

Quod
sectionis
argu-
men-
tum?

SCHOL. Velim ab iis, qui verentur, ne argu-
menti hujus pertractatione in cosmologia in-
leges methodi peccetur, metum poni; princi-
pia enim, quæ sequentes demonstrationes in-
gredientur, aut jam ex ontologia, ubi de sum-
ma entis necessarij, & infiniti, quod Deus est,
perfectione actum est, nota sunt, aut ex theo-
logia non precario, sed lemmatice (S. 119.
log.) sumentur. Ego certe e re discentium
potius esse opinor, ut veritates connexæ se-
rie non interrupta progonantur.

C A P U T I.

De Fine Dei Mundum Creantis.

Quid
gloria
Dei in-
terna &
externa?

Deus in
creando
mundo
finem
intendi-
dit.

LXX. Gloria Dei interna est collectio in-
finitarum ipsius perfectionum, sive infinita
naturæ illius excellentia. Gloria Dei externa
ea est, quæ ex earundem perfectionum ma-
nifestatione enascitur.

LXXI. Deus in procreatione mundi finem a-
liquem sibi præstituit. Omnis causa intelli-
gentia, & sapientia pollens, cum agit, ali-
quem finem sibi præstituit: id enim sapientiæ

leges postulant: certe sine fine agere non nisi insipientium est; sed Deus est causa, intelligentia, ac sapientia, & quidem infinita polens: igitur Deus cum egit, mundumque procreavit, finem aliquem sibi præstituit.

LXXII. *Finis, quem Deus in procreatione mundi sibi præstituit, est aliquid ipsi bonum, nondum possessum.* Imprimis utrumque ex eo perspicuum fit, quod universim finis semper sit consecutio alicujus boni, quod per actionem intenditur (ont. §. 160. cor. 1.). Deinde primum sic conficitur: cum omne bonum pro ratione bonitatis amandum sit, bonum infinitum, infinitum quoque amorem meretur: igitur Deus se ipsum, ut bonum infinitum, infinite amet, necesse est, liquidem sapienter amet; atqui Deus se ipsum infinite non amasset, si non aliquid sibi bonum pro fine in creatione mundi constituisset; amasset enim magis illud, cujus bonum quæsisset: ergo finis, quem Deus in procreatione mundi sibi præstituit, est aliquid ipsi bonum.

COROLL. Cum infinitas suas perfectiones Deus ab æterno, & necessario possideat, evidens est, gloriam internam non esse finem creationis.

LXXIII. *Finis, quem Deus in procreatione mundi sibi præstituit, est manifestatio suarum perfectionum, sive gloria externa.* Finis, quem Deus in procreatione mundi sibi præstituit, est aliquid ipsi bonum (§. præc.); sed præter gloriam internam, & externam nihil potest esse Deo bonum, cum ipse, utpote ens infinitum prorsus a nullo pendeat (ont. 228.); igitur finis, quem Deus in procreatione mundi sibi præstituit, est vel gloria ejus interna, vel externa, vel utraque simul; atqui gloria interna esse nequit (§. præc. coroll.): restat

et

ergo, ut sit externa, seu manifestatio suarum perfectionum.

SCHOL. Cum ajo, manifestationem divinarum perfectionum finem esse creationis, non propterea absolute excludo beatitatem creaturarum rationalium; verum hæc est finis solum secundarius, & intermedius: illa vero primarius, & ultimus; ex beatitate enim creatorum entium manifestatio divinarum perfectionum complete denique enascitur, quemadmodum contra Dariusium solide nuper Krebsius (a) demonstravit. Alii quidem hæc pro eodem fere habent; inde Cudworthus (b) ait: „ respondemus incredibilem ejus bonitatem, qua per-
 „ motus fuit, ut alias quoque præter se natura-
 „ ras beatas, & felices esse cuperet, tanti o-
 „ peris ipsi incitamentum fuisse, quod dum
 „ ponimus, minime cum illis pugnamus, qui
 „ Deum gloriæ, & honoris sui causa natura-
 „ ram rerum fabricatum esse opinantur. —
 „ Neque tamen sanus quispiam dixerit, Deum
 „ ideo unice fabricatum esse hanc rerum uni-
 „ versitatem, ut potentia, ac sapientia suæ
 „ specimen ederet, eoque sese jactaret, fecit
 „ eam, ut bonitatem suam cum aliis commu-
 „ nicaret, quæ vere, ac proprie gloria ejus
 „ est. „ Consentit Moshemius. „ Non repu-
 „ gnant inter se, qui Deum ideo hanc mun-
 „ dum creasse statuunt, ut bonitatis suæ fru-
 „ ctus cum aliis communicaret, & qui glo-
 „ riam suam in fabricatione mundi spectasse
 „ perhibent; nam dum homines, & mundum
 „ Deus condidit, ut haberet, quibus benefa-
 „ ceret, simul gloriam suam stabilivit; dum-
 „ que gloriam suam in mundo declaravit, ho-
 „ minum simul saluti consuluit. „

(a) Com-
 ment.
 phil. de
 fine crea-
 tion.
 (b) Syst.
 intell. c.
 s. f. 5.
 §. 20.

Alnot.
 in loc.
 cit.

certis li-
 mitibus
 constri-
 cta.

LXXIV. Manifestatio divinarum perfectio-
 num, quam Deus sibi pro fine in creatione
 mun-

mundi constituit, nequit esse omnium possibilium maxima. Cum perfectiones divinæ infinitæ sint, necesse est, ut careant gradu ultimo (ont. §. 72.), ac proinde quocumque gradu ipsarum assignato, vel mente concepto alius semper, & alius sine fine superest, qui assignari, aut mente concipi possit: igitur etiam eadem perfectiones divinæ semper magis, ac magis manifestari possunt, ita ut in hac manifestatione numquam ad gradum ultimum perveniri queat, sed posita quacumque manifestatione quantumcumque magna, & eccellente alia adhuc, quin aliæ in infinitum majores, & excellentiores possibiles supersint; atqui si ita: evidens est, manifestationem divinarum perfectionum omnium possibilium maximam absolute repugnare: ergo manifestatio divinarum perfectionum, quam Deus sibi pro fine in creatione mundi constituit, nequit esse omnium possibilium maxima.

COROLL. Igitur Deus per mundum a se conditum in determinato quodam gradu, ac certos intra limites perfectiones suas manifestari voluit.

SCHOL. I. Veritas hæc, qua una celebrata illa Leibnitii, VVolfique de mundo optimo opinatio, funditus evertitur, quod deinceps viderimus, ipsi quoque imaginationi quodam modo sisti potest. Fingamus extensionem realem infinitam existere, eamque a nobis alteri cuiuspiam exhibendam esse; fierine poterit, ut tota, quanta est, umquam repræsentetur? nonne quantumcumque magna illius portio fuerit exhibitæ, aliud tamen semper, & aliud exhibendum restabit? anne possibilis erit manifestatio hujus extensæ maximæ? quod autem extensæ ejusmodi, quod per aliquam solum intellectus-fictionem concipimus, eveniret, id reapse verum est, cum agitur de perfectionibus divinis.

nis, quæ nullos Intensionis suæ limites admittunt. Profecto manifestare maxime perfectionem infinitam est eandem exhaustire, quod notioni infiniti repugnat. Luce igitur meridiana clarius est infinitos esse modos, nullumque inter ipsos absolute maximum, quibus Deus perfectiones suas per res creatas patefacere possit: quare Deus non potuit eligere aliquam manifestationem, nisi ita, ut infinitas alias & nobiliores, & inferiores relinqueret; unde omnem ipsi procreandarum rerum potentiam adiungunt, qui cum ad eligendam manifestationem maximam adstringunt. Cur autem Deus hanc potius, quam aliam determinaverit, a suprema ipsius libertate pendebat, nec quisquam rationes perferutari attentabit, nisi qui, ut Genuensis loquitur, putet tantum sciri posse, quantum queri. Sed jam nonnulla dubia contra superiorem assertionem expendamus.

Occurritur
dubiis.

SCHOL. 2. Ajunt r.) Si Deus in procreatione mundi manifestationem suarum perfectionum pro fine constituisset, tum Deus ipse esset aliqua ratione finis entium creatorum; atqui hoc videtur absolum; inter Deum enim, & entia creata nulla est proportio.

R. c. M. n. m.; additam vero rationem d. inter Deum, & entia creata nulla est proportio *ratione perfectionis*, c. *ratione connexionis* n. Deus utique, ut manifestandus, & glorificandus, est finis omnium entium creatorum; jam enim supra (§. 68. sch.) docui, finem Dei rectissime quoque finem mundi dici. Deinde tametsi entia creata, si quoad perfectiones suas spectentur, infinite ab interminata Dei perfectione distent, nullamque cum ipso hoc sub respectu proportionem habeant, connectuntur tamen cum Deo velut quivis effectus cum sua causa, & vel hoc ipso apta efficiuntur ad patefaciendas ipsius perfectiones, quemadmodum quodvis artefactum peritiam sui artificis,

cis, a quo toto genere distat, commendare solet.

2.) Deum putant ambitiosum fore, propriique *Ennead.*
commodi nimis studiosum, „ absurdum dictu *l. 9. c. 4.*
„ est, ait Plotinus, Deum mundum progeniis *p. 202.*
„ se, ut honoraretur, eorumque hæc, est o-
„ pinio, qui sculptorum nostrorum affectus ad
„ superos transferunt. „

3.) Deus non spectavit gloriam suam in conden-
do universo ob indigentiam aliquam, aut ma-
jorem inde perfectionem aut felicitatem conse-
quendam, quod hominum est; sed præstitit id
sapientiæ suæ, aliisque infinitis perfectionibus
consentaneæ; cum enim ipse sit bonum infinitum,
oportebat, ut se præ omnibus bonis finit-
is amaret, omniaque reliqua ad se referret,
quo, ut omnium est principium, ita quoque
omnium finis sit. Apposite Moshemius in Cud-
vvorthum: „ quicumque Deum gloriæ suæ
„ causâ mundum creasse sciscunt, non tam *Syst. in-*
„ vani sunt, & inepti, ut Deum sibi persuas- *tell. c. 5.*
„ deant studio laudum, & gloriæ ferri, eo- *f. 5. 9.*
„ que accensum, & inflammatum hoc opus. *20. n. 2.*
„ molitum esse. Ita quidem intellexit Baylius
sententiam eorum, sed in vitis id fecit om-
„ nibus sapientibus, quorum nulli ejusmodi a-
„ liquid in mentem venit. „

3.) Si Deus, ait Darjesius, ex fine manifestandi *Philos.*
suas perfectiones mundum condidit, tum id fe- *Neben-*
cit ex ratione subjectiva, id est, finem crea- *stunden*
tionis in se ipso posuit; atqui inde sequere- *2. Sam-*
tur Deum eguisse mundo vel ad conservandas, *mlung.*
vel ad augendas suas perfectiones, quod a ve- *2. Ab-*
ro alienum est. Deinde manifestationem per- *hand-*
fectionum, quæ nec ad conservandas, nec ad *lung.*
augendas ipsius perfectiones conducere, non *6. 12.*
esse possibilem, hæc conatur ratione probare:
omnis manifestatio perfectionum necessario Deo
adfert aliquam utilitatem; nam manifestatio
perfectionum est quædam actio; quævis actio
quid-

quidpiam efficit, quod absque ea non esset, idque ipsum, saltem præsente in casu, bonum sit, necesse est: igitur actio diviua in essentia rei aliquid boni operari debet, quod sine ea actione non existeret.

¶ Pace clarissimi viri dixerò ratiocinationem hanc a paralogismo non abesse. Ratio subjectiva, ex qua Deus mundum creavit, non ita in ipso est, ut sit perfectio quædam interna obvinenda; sed est repræsentatio finis quoad substantiam optimi in ipsius intellectu, quem ob suam bonitatem, aliasque perfectiones naturales necessario actionibus suis, quas vocant ad *extra*, præfigere debet. Atque hinc pater, manifestationem hanc nec ad augendas, nec ad conservandas perfectiones internas quidpiam conferre: sed ab his ipsis exigi sub hypothesi, quod Deus aliquid pro suo liberrimo arbitrio procreare velit. Unde ulterius consequitur ejusmodi perfectionum manifestationem omnino possibilem esse, nec quidquam veræ utilitatis aut commodi inde in Deum redundare, sed potius in res creatas, quæ manifestando divinas perfectiones suam beatitatem consequuntur; nisi Deo utile dicere velimus, quod agat modo infinitis suis perfectionibus congruo. Cum deinde manifestationem vocat actionem Dei, aperte confundit ideam manifestationis, quæ finis est, cum idea creationis, quæ ea demum actio est, qua finis ille obtinetur; manifestatio certe perfectionum, seu gloria externa non est actio Dei; sed eam Deus consequitur per actionem suam, qua res creatas, quæ ipsum glorificent, existentes efficit. Denique non video, quomodo ex eo, quod actio Dei in rei essentia boni quidpiam operetur, sequatur manifestationem perfectionum non esse Dei creantis finem primum, atque ultimum; operatur utique actio Dei bonum, cum rebus existentiam, aliasque perfectiones reales

tribuit, & necessaria ad beatitudinem consequendam subsidia subministrat; at vero id minime obstat, quo minus Deus in his bonis conferendis suarum perfectionum manifestationem ut ultimum finem respiciat, præsertim cum hæc ex rerum creaturarum beatitudine singulari ratione enascatur.

4.) Deus etiam sapienter egisset, etsi nullum communem finem toti mundo præstitisset; satis enim fecisset suæ sapientiæ cuiusvis entis hujus mundi particularem aliquem finem præfigendo.

5.) Potuit certe Deus cuiusvis enti in hoc mundo particularem quempiam finem præstitueret, hac tamen lege, ut hos omnes fini alicui communi tamquam ultimo subordinaret; unicus enim est, ut ostendi, qui divinam bonitatem, sapientiam, aliasque perfectiones decet, isque in perfectionum manifestatione consistit. Atque id reapse præstitisse Deum ex ea per causas tum finales, tum efficientes connexionem, quæ in mundo obtinet, colligimus. Ceterum sapienter hic monet Boehmius: „ si umquam „ dubium suboritur; cogita Deum finem ali- „ quem particularem non intendere nisi ut „ medium ad ultimum; adeoque tantum ejus, „ non plus, intendere, quantum huc requiri- „ tur, nec adeo fine suo particulari ex parte „ excidere, quando non tantum obtinet, quan- „ tum obtineri posse videtur. „

*Theol.
nat. f.
I. c. 4. §.
205. sch.*

CAPUT II.

De Mundo suo in genere Perfecto.

Quid
mundus
in gene-
re suo
perfe-
ctus?

LXXV. *Mundus in genere suo perfectus est, cujus omnia entia tam simultanea, quam successiva ad finem a Conditoris suo præstitutum obtinendum quam optime conspirant (conf. ont. §. 93. sch. n. 5.), atque adeo, qui perfectiones divinas tantum manifestat, quantum ipsas ab illo manifestari Deus vult.*

COROLL. *Mundus igitur suo in genere perfectus est comparate ad suum finem optimus ita, ut sub eo respectu melior dari nequeat.*

Deus e-
legit
media
aptissi-
ma,

LXXVI. *Cum Deus eligit medium ad consequendum finem sibi præstitutum, eligit aptissimum. Nisi enim medium aptissimum eligeret, vel non posset, vel non sciret, vel non vellet id præstare; sed primum repugnat omnipotentiae; alterum perfectissimæ intelligentiæ; ultimum infinitæ sapientiæ; ergo cum Deus eligit medium ad consequendum finem sibi præstitutum, eligit aptissimum.*

& hunc
mun-
dum ut
medium
elegit:

LXXVII. *Deus hunc mundum elegit ut medium ad consequendum finem sibi præstitutum. Cum Deus in procreatione mundi finem sibi præstituerit (§. 71.), per ipsam hanc procreationem finem hunc obtinere voluit (ont. §. 158.): igitur mundus procreatus rationem continet, ut Deus finem suum obtineat, si-ve, ut finis Dei ad existentiam perveniat; sed quod ejusmodi est, medium vocatur (ont. §. 162.): ergo mundus hic est medium ad consequendum finem a Deo sibi præstitutum. Sed præterea quoque Deus hunc mundum pro-*

procreavit (§. 24.), & quidem præ aliis infinitis possibilibus (§. 7. sch.), quod electionem aliquam complectitur: igitur Deus hunc mundum elegit ut medium ad consequendum finem sibi præstitutum.

LXXVIII. *Mundus hic est medium aptissimum ad consequendum finem a Deo sibi præstitutum.* Cum Deus eligit medium ad consequendum finem sibi præstitutum, eligit aptissimum (§. 76.); sed Deus hunc mundum elegit ut medium ad consequendum finem sibi præstitutum (§. præc.): ergo mundus hic est medium aptissimum ad consequendum finem a Deo sibi præstitutum.

quare aptissimus est ad finem

LXXIX. *Mundus hic suo in genere perfectus est.* Cum mundus hic sit medium aptissimum ad finem consequendum (§. præc.), necesse est, ut Deus per hunc mundum optime suum finem assequatur: igitur etiam necesse est, ut hic mundus tantum manifestet perfectiones divinas, quantum ipsas ab illo manifestari Deus voluit; atqui hoc est suo in genere perfectum esse (§. 75.): ergo mundus hic suo in genere perfectus est.

& suo in genere perfectus.

SCHOL. I. Argumentatio hæc est a priori, & omnino invicta; ducitur enim ab infinita Conditoris scientia, sapientia, & potentia, quæ omnia in Deo inesse nulla potest ratione dubitari. Qui ad experientiam recurrunt, mundique perfectionem a posteriori demonstrare volunt, operam perdunt; ad absolutam siquidem id genus demonstrationem necesse foret, ut omnia entia tam successiva, quam simultanea, ex quibus hic mundus coalescit, singulatim pervestigentur; ut eorum connexio intime pervideatur; ut denique, quæ ratione singula ad finem communem obtinendum tendant, distincte determinetur: quis autem hominum id præstare valeat? Non equidem infi-

cias

Com-
ment.
phil. de
fin crea.
§. 1. c. 2.
§. 18.
segg.

cias ibo, divinas in creatis omnibus perfectio-
nes relucere: quemvis ex paullo accuratiore
corporum mundanorum contemplatione in co-
gnitionem Creatoris independentis, æterni,
potentissimi, sapientissimi, providentissimique
deduci; hæc enim facili prorsus ratiosinio ex
rerum creatarum intuitu colliguntur, quemad-
modum uberius demonstravit Krebsius. At ve-
ro inde nondum evidenter conficitur mundum
suo in genere perfectum esse; hoc enim dun-
taxat spectato manifestum non est, per eum-
dem perfectiones divinas illo in gradu, quem
Deus constituit, patefieri. Ut vero ab expe-
rientia perfectio mundi demonstrari nequit,
ita eadem simili argumento nequidquam impu-
gnatur; cum enim imperfectio in parte ad to-
tius perfectionem conferre (ont. §. 92. sch.),
& vicissim, quod inde fluit, major partis per-
fectio perfectioni totius officere possit, frustra
sunt omnes ii, qui perfectionem, aut imperfe-
ctionem partium apparentem ad totum mun-
dum transferre volunt: neque igitur audiendi
sunt, neque, demonstrata a priori mundi per-
fectione, objectionibus ab experientia petitis
respondere teneremur (§. 235. sch. l. 6. log.).
Ne tamen quidpiam omisisse videar, adducam
breviter ea, quæ a profanis hominibus, divi-
næque providentiæ hostibus vulgo proferri
solent.

Satisfit ad-
ver-
sariis. SCHOL. 2. Ajunt 1.) Si mundus hic esset in
suo genere perfectus, esset is etiam omnium
optimus; sed istud non admittitur; ut in se-
quente capite patebit: ergo mundus hic non
est suo in genere perfectus. Deinde quid ve-
tat, quod minus singula entia hujus mundi
perfectiora sint? Ex perfectioribus autem enti-
tibus perfectior utique, & fini suo accommo-
dator mundus consurgeret.

2. d. M. Si mundus hic esset suo in genere per-
fectus, esset is etiam *comparate ad hunc finem*
opti-

optimus, *c. M. absolute optimus, n. M. & sic d. m. n. con.* Mundum in genere suo perfectum comparate ad suum finem optimum esse dixi (§. 75. cor.), quod ut plenius intelligas, hæc habe: Deus stante hoc fine, quem ipse ex liberrimo arbitrio determinavit, non potuit alium mundum nec perfectiorem, nec imperfectiorem eligere; in neutro enim casu sapienter egisset: sapientia quippe exigit, ut mundus aptissimus ad finem præstitutum eligatur, qualis non fuisset hoc nostro aut perfectior, aut imperfectior. Atque in hoc sensu hic mundus est omnium optimus; nullus enim ex omni genere, & specie mundorum aptius huic fini responderet: individua autem perfectæ similia, quæ quidem infinita possible sunt, cum principium indiscernibilium Leibnizii non subsistat (ont. §. 76.), æqualis sunt perfectionis, adeoque æqualiter ad hunc finem accommodata. Non est autem hic mundus absolute, & in se, abstrahendo nimirum a fine, vel posito fine absolute optimo, omnium possible optimus, ut deinceps apparebit. Similiter non potuit Deus stante hoc fine singula seorsum entia perfectiora efficere; nam istud determinatæ totius mundi perfectioni derogaret, cum ea dependeat ab optima singulorum conspiratione ad finem communem, quæ in hac hypothese necessario mutaretur, nisi ponas per mutuam compensationem ultimo tandem eandem conspirationem prodire; id quod eodem redit. Neque vero etiam ex majori singulorum entium perfectione continuo sequitur maiorem quoque in toto perfectionem fore; fieri siquidem potest, ut entia, etsi in se perfectiora, minus tamen apte ad finem obtinendum conspirent.

- 2.) Mundum non esse perfectum satis ostendunt entia monstruosa, & imperfecta; animalcula item vilissima, & exilissima, quæ ideo super-
- Storchenau Metaph, L. II. F sua

flua sunt; tum & infecta nociva, ac venenata, quæ passim in eo deprehenduntur.

2. Generatim: perfectio mundi, ut jam dictum est, non consistit in perfectionibus particularium entium; sed in eorum connexionem, & enascente inde tendentia ad finem toti præfixum. Quod nominatim ad monstra attinet, dicendum ipsorum imperfectionem esse solum apparentem, eamque ad constituendam totius mundi perfectionem concurrere, quemadmodum imperfectiones oculi conducunt ad perfectionem totius corporis (ont. §. 91. sch.). Certe nisi id ita esset, nequaquam a divina sapientia fuissent electa. „ Præclare Leibnitius: „ concludendum est, ipsa monstra in ordine „ totius comprehensa esse, licetque cogitare, „ non tantum melius fuisse, ut permittantur, „ quam ut communes naturæ leges perturbentur; sed etiam ipsa legibus, ac universali „ Dei voluntati consentanea esse, etsi nos hanc „ harmoniam mente assequi, & distincte explicare nequeamus. „ Legatur quoque Malebranchius. Similiter deinde infecta non sunt vilia, nisi nostra fortassis opinione, eaque valde distorta; concurrunt enim cum reliquis ad communem finem obtinendum: ipsa etiam corpusculi minimi conformatio Conditoris sui potentiam, ac sapientiam quam maxime illustrat. Unde neque inutilia, aut superflua jure dici possunt; præter communem enim particulares quoque fines propositos habent, usumque maximum, tametsi nobis potissimum incognitum, in hoc universo præstant, dum aliis nutrimentum, aliis medicamentum præbent, aut efficiunt, ut ex ipsorum comparatione ceterorum ordo mirabilius elucescat.

3.) Alius mundus est possibilis, qui perfectius assequeretur finem sibi præstitutum: ergo nosster hic mundus non optime congruit cum suo fine. *ant. p.* Possibilis est talis mundus, qualis

*Essai de
Théodic.
§. 241.*

*De in-
quir. ve-
rit. Illu-
str. ad l.
2. p. 45.*

lis fuit ante peccatum. Adæ perdurante statu integritatis, & iustitiæ originalis; jam vero talis utique mundus & perfectior esset, quam noster, & prorsus eundem finem habere posset, sicut reapse tum habuit.

N. ant. Admitto imprimis plures esse mundos possibiles perfectiores, quos Deus condere potuisset, si voluisset perfectiorem finem, altiore nimirum gloriæ suæ externæ gradum, eligere. At nullum potuit mundum procreare, qui hunc præsentem finem melius fuisset affectus. Deinde mundus etiam perfectior suo fieri melius non congrueret, quam noster suo congruat; dici enim debet congruentiam fore eandem mundi perfectioris cum suo fine perfectiore, & mundi imperfectioris, si ita loquar licet, cum suo fine imperfectiore, ubique videlicet optimam. Ad id, quod additur, primum *transmissione* quadam opus est; non enim constat, an talis mundus vere perfectior futurus esset; cum argumentum ex perfectione entium particularium ad universalem totius perfectionem aut valeat, nisi omnia simul entia, & eorum naturæ, mutuaque connexio intime perspiciatur. Fieri certe potest, ut connexio entium, in qua mala intexta sunt, magis altera, quæ ab his immunis est, ad finem communem conspirent; quemadmodum horologium ex imperfectioribus in se partibus compositum potest accuratius horas designare, suoque in genere, & comparate ad suum finem perfectius esse, quam aliud quodpiam, quod ex nobilioribus partibus constatur; immo ut horologio toti sua constet perfectio, necesse est, ut singulæ illius partes non sint ejusdem generis, formæ, ac perfectionis. Itaque etiam, ut tota entium connexio, quæ mundum constituit, sua gaudeat perfectione, non modo necesse non est, ut singula seorsum eam æqualis sint perfectionis, sed multo magis re-

quiritur, ut sint diversæ. Tum mundus ille, qui ante lapsum Adæ existit, non fuit alius a nostro hoc, de quo agimus, mundo; fuit enim hujus pars quædam, atque inde ad eundem finem tetendit, cum finis sit toti mundo præfixus. Quod si autem ponamus, nunc quoque talem mundum a nostro distinctum condi, necesse foret, ut Deus illi alium finem, id est, alium gradum in suarum perfectionum manifestatione præstitueret, ad quem nempe obtinendum omnia illius entia tenderent.

4.) Multa in hoc mundo perpetrantur peccata, eaque non cedunt ad gloriam Dei, sed potius ad ipsius contemptum; igitur non omnia in hoc mundo illustrent gloriam divinam, neque mundus perfectus dici meretur.

d. ant. peccata, si spectentur *relate ad malitiam, & intentionem hominis libertate sua abutentis*, non tendunt ad gloriam Dei, *e.*

ant. peccata, si spectentur, *ut sunt actus physici hominis agentis*, vel *ut connexa cum aliis ad communem finem tendentibus*, vel *ut a Deo permissa* non tendunt ad gloriam Dei,

n. ant. & conf. Tametsi peccata, prout a malitia hominum, libertate, præcipuo bene merendi instrumento, abutentium procedunt, potius ad obscurandam Conditoris gloriam tendant, hominemque a consecutione finis sui abducant, multis tamen aliis modis ad illustrandas perfectiones divinas inserviunt.

Imprimis nempe peccata, cum sint actus physici a libera hominis vi profecti, homini a Deo vim activam, ac pretiosissimum libertatis donum concessum fuisse manifestant, quo simul divinam potentiam, libertatem, ac bonitatem commendant. Deinde ut sunt in hac rerum serie, & connexionem posita, una cum reliquis in medium illud optimum, quod Deus ad consequendum finem sibi propositum sapientissime elegit, constituunt; quæ in re singulari qua-

qua-

quadam ratione divina elucet sapientia, dum mala hæc ad optimos fines diriguntur; eaque ipsa obtinentur, quæ homines perversa sua voluntate impedire conabantur; attende ad exemplum Josephi Ægyptiaci, Christi Judæorum scelere occisi, veritatemque rei ipsis oculis intueberis. Denique peccata, cum tolerantur, divinam in nos bonitatem, & patientiam; cum remittuntur, misericordiam, & mansuetudinem; cum vindicantur, summam potestatem, & justitiam luce clarius patefaciunt. Cum igitur mundum perfectum dicimus, non volumus, nullum in eo inesse nævum, nullam maculam; sed nexum hunc rerum omnium, in quo peccata quoque continentur, aptissimum esse ad perfectiones divinas intra eos limites, quos ipse statuit, manifestandas contendimus. Mundus, *qui* habet mala, perfectus est, non *quia* habet mala; sed *quia* hæc boni, & mali permixtio ad obtinendum finem ab auctore suo constitutum optime deservit. Neque vero etiam inde consequens est, ut Deus *positive*, peccata velle debeat: etsi enim iis quoque tamquam mediis ad suos fines utatur, sufficit tamen, ut ea *permissive* velit, id est, non impedire decernat, cum alioquin ab hominum malicia libere ponenda certo prævideat. (conf. ont. §. 163. sch. 1.)

CAPUT III.

De Mundo omnium Possibilium Optimo.

Quid
mundus
opti-
mus?

LXXX. *Mundus optimus* is est, qui omnes mundos possibiles perfectione superat, quique adeo divinas perfectiones maxime manifestat, ita videlicet, ut ipsæ magis manifestari absolute nequeant.

SCHOL. Definitionem hanc ad mentem eorum, qui mundum optimum defendunt, exactam esse nemo ignorare potest, nisi qui in ipsorum scriptis prorsus peregrinus sit. Leibnitius, qui opinionem hanc jam olim veteribus notam, at fere emortuam suscitavit, ita de ea disserit:

*Princ.
phil. 5.
55. seqq.*

„ quemadmodum vero infinita sunt possibilia
 „ universa in ideis Dei, & eorum non nisi
 „ unum existere potest, ita necesse est dari
 „ rationem sufficientem electionis divinæ, quæ
 „ Deum ad unum potius, quam ad alterum
 „ determinet. Atque hæc ratio reperiri ne-
 „ quit, nisi in gradibus perfectionis, quam
 „ hi mundi continent; cum quodvis possibile
 „ habeat jus prætendendi existentiam pro ra-
 „ tione perfectionis, quam involvit, atque id
 „ ipsum causa est melioris, quod Deus vi sa-
 „ pientię cognoscit, & vi potentię produ-
 „ cit. „ Similia quoque passim in Theodicæa
 „ profert. Leibnitium magno agmine sequuntur
 „ non illi modo, qui ejus familiæ ascripti sunt,
 „ sed & alii quoque, qui ceteroquin in multis
 „ ab ipso dissident, specioso divinas perfectio-
 „ nes vindicandi titulo, ut ego quidem reor,
 „ delusi; nam revera, ut paullo post apparebit,
 „ opinio hæc infinitam Dei bonitatem, omni-
 „ scientiam, ac supremam libertatem, quam præ-
 „ cipue

cipue commendare videtur, funditus evertit :
 Præterire hoc loco Baumeisterum nequeo, qui
 quantumvis Leibnitii, VVolfsique dogmata sua
 fecerit, mundumque hunc optimum esse aperte
 statuerit, nihilo tamen minus hanc sententiam *Theol.*
 ita explicat, ut non majorem mundo perfe- *nat. r. 4.*
 ctionem, quam nos capite præcedente, tribuif- *§. 834.*
 se videri possit, ait enim: „ si te offenderint *Ibid. §.*
 „ vocabula; imperfectius, & perfectius, dic : *332. sch.*
 „ Deus semper eligit, vult, & decernit id,
 „ quod finibus suis, quod sapientiæ, & glo-
 „ riæ suæ est convenientissimum. „ Item : *Ibid. §.*
 „ cum itaque vi hujus theorematis Deus ex *334. sch.*
 „ pluribus possibilibus mundis elegerit illum
 „ mundum, qui finibus suis est convenientis-
 „ simus, sive optimus &c. &c. „ Quis hic
 non videt, optimam solum mundi hujus cum
 suo fine convenientiam denotari, ob quam is
 suo in genere perfectus esse dicitur (§. 75.);
 quare callidius, quam sincerius egisse vir cele-
 berrimus censeretur potest; cum enim in reliquis
 cum omnibus mundi absolute optimi defensori-
 bus prorsus consentiat, merito suspicari licet;
 ipsum tacite, & sine probatione posuisse, fi-
 nem huic mundo præstitutum esse absolute o-
 ptimum, seu maximam divinarum perfectionum
 manifestationem, id, quod a veritate alienum
 esse jam videbimus.

LXXXI. *Mundus hic non est omnium possi-* *Mundus*
bilium optimus. Mundus optimus infinitas Dei *non est*
 perfectiones maxime, id est, in supremo gra- *absolute*
 du manifestat (§. præc.); sed mundus hic in *opti-*
 determinato quodam gradu, & intra certos *mus,*
 limites perfectiones divinas manifestat (§. 74.
 cor.): ergo mundus hic non est omnium pos-
 sibilium optimus.

SCHOL. Certe ut supra dictum est, hoc ipso,
 quod perfectiones, quæ manifestari debent,

infinite sint, etiam manifestationes majores, & majores in infinitum possibiles sunt, quæ omnes rursus alios fines perfectiores constituunt aliis mundis, qui propterea possibiles esse rite arguuntur, præfigendos; nam ex possibili multiplicitate, & varietate finium evidenter consequitur possibilitas mundorum perfectione discrepantium: igitur manifestatio certis limicibus coarctata non est finis omnium possibilium optimus, seu perfectissimus. Jam verò mundus, qui non habet finem absolute perfectissimum, nec ipse omnium possibilium perfectissimus esse potest; mundus enim fini perfectiori respondens foret utique isto perfectior (ont. §. 93. sch. n. 1.). Profecto ceteris paribus, id est si utrinque optima sit ad finem suum tendentia, perfectio entis æstimanda est ex perfectiori, & nobiliori fine: ita horologium, quod præter horas, & minuta, astrorum quoque cursum indicat, in perfectione plurimum antecellit alteri, in quo horæ duntaxat denotantur. Cum igitur mundus noster intra certos solum limites perfectiones divinas manifestet, eum neque finem perfectissimum habere, neque omnium possibilium optimum esse manifestum est. Atque istud solum quidem ad refellendam de mundo optimo sententiam omnino sufficit; quia tamen adversarii, ducis sui exemplo, potissimum hoc in argumento principium rationis sufficientis in auxilium vocant, in eo præterea mihi elaborandum esse video, ut clare ostendam, in illo principio, quamquam verissimo, & alias a me stabilito, nihil prorsus præsidii ad hanc doctrinam confirmandam ipsis suppetere: id porro effectuum me confido ubi demonstravero hac principii applicatione omnem Dei libertatem tolli, qua sublata ipsa entis perfectissimi natura periret. Videatur interea dissertatio Frederici Reinhardi cum aliis pro præmio con-

cur.

*Le syst.
de Mr.
Pope
sur la
perfect.
du mon.
&c.*

currentibus jussu Academiæ Berolinensis edita.

LXXXII. *Si major perfectio mundi possibilis fuit ratio sufficiens, ut Deus hunc mundum conderet, non potuit is alium præ isto condere.* Posita hac ratio suff. Deus non potuit alium mundum præ isto condere;
Si major perfectio mundi possibilis fuit ratio sufficiens, ut Deus hunc mundum conderet, tum pro hujus solum, & pro nullius alterius creatione adfuit ratio sufficiens; sed Deus eum solum mundum condere potest, pro quo adest ratio sufficiens, & eum condere non potest, pro quo nulla adest ratio sufficiens: ergo si major perfectio mundi possibilis fuit ratio sufficiens, ut Deus hunc mundum conderet, non potuit is alium præ isto condere.

SCHOL. In demonstrando hoc theoremate non est magno mihi opere elaborandum; ipsam enim Leibnitianorum, quibuscum mihi nunc negotium est, doctrinam complectitur: quare, quæ hic attuli, in ipsorum sensu intelligenda sunt. Confer verba Leibnitii (§. 80. sch.).

LXXXIII. *Si major perfectio mundi possibilis fuit ratio sufficiens, ut Deus hunc mundum conderet, non potuit is hunc mundum non condere.* neque istum non condere;
Si Major perfectio mundi possibilis fuit ratio sufficiens, ut Deus hunc mundum conderet, tum pro creatione tantum hujus mundi, non autem pro non-creatione adfuit ratio sufficiens, & quidem ab æterno: major quippe perfectio mundi possibilis est æterna; ab æterno a Deo cognita, fuitque semper ratio sufficiens pro condendo mundo, nunquam pro non condendo, ac istud ante omnem arbitrariam Dei determinationem ad aliquem mundum condendum; sed Deus id tantum efficere potest, pro quo adest ratio sufficiens, & id efficere non potest, pro quo

non adest ratio sufficiens : ergo si major perfectio mundi possibilis fuit ratio sufficiens, ut Deus hunc mundum conderet, non potuit is hunc mundum non condere.

unde in
conden- LXXXIV. Si major perfectio mundi possibi-
do mun- lis fuit ratio sufficiens, ut Deus hunc mundum
do non conderet, nullo is pacto liber fuit in condendo
fuit li- mundo. Si major perfectio mundi possibilis
ber. fuit ratio sufficiens, ut Deus hunc mundum
conderet, tum Deus non potuit alium mun-
dum præ isto condere (§. 82.), neque istum
non condere (§. præc.) ; sed huc omnis om-
nino libertas reducitur, ut ex se patet, &
alio loco uberius demonstrabitur : ergo si ma-
ior perfectio mundi possibilis fuit ratio suffi-
ciens, ut Deus hunc mundum conderet, nul-
lo pacto liber fuit in condendo mundo.

SCHOL. I. Sane, si hæc principii rationis suf-
ficientis applicatio obtineat, ne fingi quidem
potest ulla libertatis species ; nam, fieri non
,, potest, ut arguit Boscovichius, ut Deus ra-
,, tiones omnes, quæ adesse poterant pro hoc
,, individuo rerum ordine creando, non vi-
,, deret : fieri non potuit, ut eæ, quæ ade-
,, rant, non adessent : fieri non potuit, ut
,, eæ, quæ præponderarunt, non præponde-
,, rarent, suam enim naturam mutare non
,, possunt : fieri non potuit, ut Deus præpon-
,, derantiam non sequeretur. Igitur etiam ex
,, contradictionis principio innixo divinæ na-
,, turæ præditæ sapientia, & determinatione
,, ad optimum eligendum, & naturæ ratio-
,, num, quas videre potuit, & debuit, erui-
,, tur fieri non potuisse, ut hic ipse ordo so-
,, lus non existeret, qui idcirco omnino ne-
,, cessarius fuit. Et ridicula sane est eorum
,, possibilitas, quæ existere non poterant, ni-
,, si crearentur ; creari non poterant, nisi ra-
,, tio sufficiens Deum ad creationem moveret,

„ nec ipsa ratio sufficiens ulla esse poterat
 „ præter illam, quam ipse Deus ob oculos
 „ habuit, cum mundum hunc crearet. Verbo
 „ denique Deus vi sapientiæ suæ debet illud
 „ discrimen omnium rerum cognoscere, cum
 „ nulla res possit æquare alteram, & vi bo-
 „ nitatis debet eligere melius: ergo non da-
 „ tur libera in Deo electio, cur hanc præ il-
 „ la creet, sed necessitas. „ Similia invenies §. 556.
 quoque in appendice de Deo, & anima ejus
 theoriæ philosophiæ naturalis subjecta. Hinc
 demum clarissime patet, quo jure supra (§.
 32. sch.) pronunciaverim, ex hac Leibnitii o-
 pinione fatum quoddam Stoico simillimum pro-
 fluere; ut adeo vir doctissimus causam Dei,
 quam una ex parte contra Baylium egregie
 tuitus est, altera ex parte prodiderit. Sed ta-
 men sunt nonnulla, quæ non sine veritatis
 specie in ejus defensionem proferuntur: hæc
 jam examinanda sunt.

SCHOL. 2. 1. Auctor additamentorum ad me- Solvun-
 taphysicam P. Sagner Placentiæ recusam anno tur du-
 1767. ita pro mundo optimo pugnat. „ Id bia.
 „ unum superest, inquiramus, utrum finis, ad
 „ quem hic mundus a Deo ordinatus est, sit Theol.
 „ omnium præstantissimus, ad quos mundi nat. §.
 „ possibles possunt ordinari. — Præstantius 54. ad-
 „ nequit divini bonitas, atque perfectio per dit. 144.
 „ quemcumque possibilem mundum manifesta- not. 2.
 „ ri, quam si manifestetur, quantum eandem not. 3.
 „ manifestari possibile est per creaturas. Cer-
 „ tum est divini perfectionis representatio-
 „ nem, quæ fieri potest per mundos, aut
 „ creaturas quaslibet possibles, non posse ta-
 „ lem, aut tantam esse, ut ad æqualitatem
 „ pertingat; — hinc tamen minus recte quis
 „ inferret; nullum esse limitem, ultra quem
 „ possibilis non sit perfectior representatio
 „ per creaturas; immo cum nulla esse possit
 „ representatio ad æqualitatem, quaslibet pos-

- „ sibilis limites quosdam habeat, necesse est.
 „ Cum igitur inter ea, quæ habent limites,
 „ nihil vetet unum esse omnibus præstantius,
 „ nihil pariter obstat, unam esse inter omnes
 „ repræsentationes divinæ perfectionis possibili-
 „ les per creaturas, quæ sit ceteris omnibus
 „ præstantior, & excellentior. „
- *. Inter multa egregie dicta duo sunt, quæ cum veritate minime consentiunt. Primum: ex eo, quod nulla possibilis perfectionum divinarum repræsentatio ad æqualitatem cum iisdem peringat, rectissime inferitur, nullam esse repræsentationem adeo perfectam, ut ea perfectior amplius possibilis non sit (S. 74.); nam gradibus perfectionum gradus repræsentationis respondent, unde sicut in illis non datur ultimus, ita neque in hac. Finge duos gradus perfectionis alicujus divinæ repræsentari: quid obstat, ut non etiam tres, quatuor, quinque, & sic porro absque fine repræsententur? erit autem repræsentatio quinque graduum perfectior præcedentibus, & hac rursus aliæ perfectiores in infinitum possibiles erunt: quare in re nulla certe apparet repugnantia, aut si qua sit, comprobare eandem, non asserere solum oportuisset. Alterum: inter ea, quæ habent limites, potest quidem esse unum omnibus præstantius, si ea sint numero finita, & rursus colligi possit; non item si ea sint infinita numero, seu potius finita in infinitum, nec unquam revera per modum unius collectionis accipi queant: illud contingit in rebus existentibus, quæ semper numerum determinatum constituunt; ac si sermo sit de possibilibus, res aliter se habet; nam possibilia sunt infinita, atque sine numero, in quibus sicut nunquam pervenitur ad ultimum, ita etiam maximum deprehendi nequit. Plurimum igitur obstat, ipsa nempe ratio infiniti, ne una sit inter omnes repræsentationes divinæ perfectionis
 pos.

possibiles per creaturas, quæ sit ceteris omnibus præstantior, & excellentior.

2.) „Nec vero metuendum, continuat lauda- *1b. no. 4*
 „tus auctor, ne limites divinæ figantur om-
 „nipotentia, si inter omnes divinæ perfe-
 „ctionis repræsentationes possibiles per crea-
 „turas una dicatur omnium præstantissima, &
 „excellantissima: nam si nulli figuntur limi-
 „tes divinæ omnipotentia ab adversariis, cum
 „negant produci a Deo posse mundum, qui
 „sit omnium possibilium perfectissimus; cur
 „divinæ omnipotentia limites figentur dicen-
 „do, produci a Deo posse mundum inter
 „omnes perfectissimum, qui scilicet divinam
 „perfectionem repræsentet modo inter om-
 „nes modos per creaturas possibiles perfectis-
 „simo? Infinitos esse mundos, & gradus re-
 „præsentationis possibiles per creaturas, non
 „evincit, dato quolibet possibilem esse alium
 „perfectiorem; possunt enim esse infiniti in-
 „fra unum inter omnes possibiles perfectissi-
 „mum, qui licet finitus in se sit, potest ta-
 „men quoslibet alios possibiles pariter in se
 „finitos perfectione superare: neque detrahi-
 „tur divinæ omnipotentia, si dicamus, nul-
 „lum effectum produci ab illa posse, qui fini-
 „tus in se non sit. Quare nisi demonstretur,
 „possibilem esse effectum finito quolibet per-
 „fectiorem, frustra quis obtrudet figi limites
 „divinæ omnipotentia ab iis, qui inter om-
 „nes possibiles effectus finitos unum esse ce-
 „teris omnibus perfectiorem asserunt, ultra
 „quem, licet in se finitum, non sit possibi-
 „lis alius perfectior.

3.) Plurima hic quoque latent, quæ a falso non
 minus distant. Imprimis, cum negamus posse
 a Deo mundum omnium possibilium perfectis-
 simum produci, hac inducimur ratione: quia
 mundus ille repugnat, & contradictionem in-
 voluit, quod ab infinitate, ob quam perfectio-

nes divinæ numquam maxime manifestari possunt, demonstramus; unde tam parum omnipotentiae divinæ limites figimus, quam parum illi eidem quidpiam detrahunt, qui docent circulum quadratum a Deo procreari non posse. Ille contra non omnipotentiae modo, verum & omnibus reliquis Dei perfectionibus limites figit, cum dicit dari posse perfectionum divinarum repræsentationem excellentissimam; inde enim manifeste sequeretur, nihil amplius in perfectionibus divinis repræsentandum restare, atque adeo in ipsis ad limitem perventum esse. Ad notionem præterea omnipotentiae non solum pertinet posse semper aliud, & aliud procreare, verum etiam posse semper aliud perfectius in eodem genere efficere, cum neutrum ullam in se repugnantiam contineat, ipsa autem ad omnia possibilia sese porrigat. Deinde solidissime omnino evincitur dato quovis mundo, & repræsentationis gradu alium perfectiorem possibilem esse vel inde solum, quod infiniti mundi, & gradus repræsentationis possibiles sint; si enim ita sit, nec ad ultimum mundum, nec ad ultimum vel maximum gradum in repræsentatione unquam perveniri poterit: quid autem hoc est monstrare, non posse dari gradum maximum repræsentationis perfectionum divinarum, & posse dari repræsentationem divinarum perfectionum maximam? *At possunt esse infiniti infra unum inter omnes possibiles perfectissimum, qui licet finitus in se sit, potest tamen quoslibet alios possibiles pariter in se finitos perfectione superare: ludere id est, non philosophari; unus ille infinitos alios perfectione superabit, & ipse tamen a nullo superabitur? accipe exemplum: intellectus infiniti sunt possibiles, quorum alius alio perfectior sit; poteritne omnibus istis infinitis unus aliquis perfectissimus, sed tamen finitus, velut præsidere? nonne finitus.*

nitus cum sit, habebit defectum ulterioris realitatis, ac proinde poterit alter eo major, & perfectior concipi (ont. §. 217.) ? quid igitur ? perfectissimus erit, & tamen alius ipso perfectior possibilis ? *Infiniei imperfectiores infra unum perfectissimum, sed tamen finitum* : quæro : iste perfectissimus pertineatne ad collectionem infinitam imperfectiorum, vel non ? si illud : terminabit sane collectionem infinitam ; erit ergo collectio infinita terminis clausa ; si hoc : nulla inter ipsum, & alios infinitos, qui imperfectiores dicuntur, comparatio institui poterit ; cur non igitur potius dicamus unum hunc perfectissimum esse possibilem, reliquos omnes impossibiles ? Denique postulat, ut sibi demonstretur possibilem esse effectum quovis finito perfectiorem ; nec moror, sic arguo : quivis effectus finitus non habet omnia actu, quæ habere potest, & quovis effectui finito alter major in eodem genere concipi potest (ont. §. 217.), sed illo effectui, qui non habet omnia actu, quæ habere potest, & quo alter major in eodem genere concipi potest, perfectior effectus possibilis est : ergo quovis effectui finito alius perfectior possibilis est. Omitto reliqua, nec utar telo, lib. 20. 64 quod ipse subministrat, cum subinde profiteatur ; „ possibilem esse mundum, qui divinam „ aliquam peculiarem perfectionem evidentius „ repræsentet, & sit sub huiusmodi respectu „ isto perfectior. „ Hæc sufficiunt, ut appareat, quam inique egerit vir eruditus, cum in celeberrimum ætatis nostræ philosophum Boscovichium adeo acerbè invecus, & multoties cavillatus fuit.

- 3.) Aut Deus, ajunt, non scivit, aut non potuit, aut non voluit mundum optimum condere ; atqui nihil horum congruit cum perfectionibus divinis : ergo Deus mundum optimum condidit.

- *. Cum inter possibilia non detur absolute optimum, neque possibilis sit summus gradus in manifestatione divinarum perfectionum, Deus nec scivit, nec potuit, nec voluit mundum optimum condere. Sed dabo aliquid; esto, sciverit Deus mundum, qui omnium possibilia sit optimus; an continuo etiam producere eum potuit? cognoscit Deus profecto omnia possibilia: anne ideo omnia simul efficere potest? certe non; exhauriretur enim infinita potentia. Esto etiam, potuerit Deus mundum optimum procreare; num ideo etiam velle debuit? an libertate suprema, summo suo in omnia dominio ipsi uti non liceat? non debuit is velle, quidpiam extra se producere: igitur neque debuit velle optimum efficere; sed sicut illi liberum fuit manifestare, vel non manifestare suas perfectiones, ita quoque ipsi liberum fuit, easdem in hoc, vel illo gradu manifestare. At Deus semper optimum sequitur; ita sane, si intelligas illud, quod fini libere determinato est convenientissimum; sequitur item optimum, quatenus semper summa ratione agit, & ex summæ sapientiæ præscripto media ad finem aptissima eligit; nec tamen ideo producit effectus absolute perfectissimos; hi enim impossibiles sunt. Neque obest, quod Deus agat modo perfectissimo; modus enim operandi ipsi internus est, sicut modus cognoscendi, quæ autem in ipso sunt, infinita sunt: contra objecta operationis, uti & cognitionis, extra Deum existunt: quare perfectissima esse nec debent, nec possunt.
- 4.) Mundus hic est perfecte conformatus ideæ divinæ; sed idea divina est absolute perfectissima; igitur & mundus.
2. d. M. Mundus hic est perfecte conformatus ideæ divinæ *objective* spectatæ, c. M. *subjectiva* spectatæ, n. M. & sic d. m. n. *conf.* Idea Dei *subjective*, id est in se, seu comparative

rate ad subjectum, cui inest, spectata est perfectionis infinitæ; ipsa enim ab intellectu divino, ac proinde a Deo intelligente revera non differt: quis autem mundo hanc perfectionem tribuat? Evidens igitur est, ideam divinam hac ratione ab adversariis hoc loco intelligi non posse, neque ei mundum hunc conformatum esse. Quod si idea divina accipitur *objective*, id est, comparate ad objecta, quæ ab ipsa repræsentantur, tantæ ea perfectionis est, quantæ est objectum repræsentatum, atque ideo numquam perfectissima, nisi cum objectum perfectissimum, ipsum videlicet, Deum repræsentat. Neque vero inde in Deum quæpiam redundat imperfectio: hæc quippe se tenet ex parte objecti, non vero in idea inest, quæ objectum, ut in se est, repræsentare debet. Atque sic omnino verissimum est, mundum esse perfecte conformatum ideæ divinæ; talis enim est, tantæque perfectionis, qualis, & quantæ perfectionis a Deo æternum fuit cognitus; at istud adversariis minime prædest; nam inde nequaquam colligitur mundum hunc esse omnium possibilium perfectissimum, cum idea divina, quidquid cognosci potest, seu magis sit, seu minus perfectum, ob intellectus divini infinitatem representet, quod ipse Leibnitijs non diffitetur, cum ait infinita universa possibilia in ideis Dei fuisse (S. 80. schol.).

- 5.) Bonitatem divinam exigere putant mundum optimum, quemadmodum ea quoque postulat finem optimum. Si opponas perituram libertatem, ajunt, libertatem ad electionem minoris boni non esse perfectionem, ideoque Deo alioquin tribuendam non esse, ut illi ob eandem rationem libertatem ad eligendum malum morale non adscribimus. Certe, addunt, sicut electio mali moralis pugnat cum sanctitate Dei, ita electio minoris boni opponitur sapientiæ di,

divinæ; quemadmodum enim Cajus in tabernaculo constitutus inter libros, quorum ipsi optio datur, minus bonum eligendo insipienter ageret, ita idem de Deo affirmandum foret, si inter mundos possibiles, quos omnes distincte cognovit, minus perfectum elegisset.

¶ Multa hic accumulatur, quibus seorsum respondendo. Imprimis infinita bonitas non exigit, ut Deus aliquid procreet; potest enim optimus, & beatissimus esse absque omni ente a se distincto: ergo eadem pariter non postulat, ut, cum aliquid efficere vult, efficiat optimum. Quid quod hæc bonitas Deum adstringeret ad aliquid impossibile, cum maxima perfectionum infinitarum manifestatio, & in pure possibilibus optimum repugnet, ut jam sæpius dictum est? At postulat Dei bonitas finem optimum; ita sane: sed solum finem *quoad substantiam*, non etiam *quoad intensiorem*, seu *gradum optimum*, idque rursus tantum ex hypothese, quod Deus mundum aliquem procreare liberrime constituerit. Nimirum infinita bonitas exigit, ut omnibus aliis bonis finitis præferatur, magisque ametur; quare Deus nihil condere potest, nisi propter se ipsum; nihil producere nisi ita, ut sibi gloriam suam pro fine primario, ac ultimo præstituat. Atque hic est finis *quoad substantiam* optimus, solusque divinæ bonitati, reliquisque perfectionibus consentaneus. At propterea necesse non est, ut Deus in hoc fine etiam intensiorem maximam, seu supremam manifestationis suarum perfectionum gradum, tamen illum possibilem esse daremus, eligat; nam sicut Deus salva sua bonitate omnem creationem, ac proinde etiam electionem finis omittere potuisset; ita etiam facto, jam libere mundum aliquem condendi decreto liberrimam potestatem gradum quemcumque in fine *quoad substantiam* optimo determinandi retinet.

De

Deinde libertas ad electionem mundi minus boni Deo sine injuria negari omnino nequit, neque comparatio est cum libertate, quæ fingitur ad eligendum malum morale; cum enim malum morale pugnet cum sanctitate, ceterisque perfectionibus Dei moralibus, per se manifestum est, hanc libertatem in perfectionibus locum non habere; Contra libertas altera & perfectio quædam est, & ideo Deo sine dubitatione tribuenda; certum namque est, aliquam libertatem, utpote veram realitatem, Deo adscribendam esse: jam vero si hæc non sit, quæ alia esse poterit? qua in re, queso, Deus liber erit? in intelligendo omnia cognoscibilia? ad id necessitatur ab infinitate intellectus sui: in amando se ipso? ad id necessario rapitur ab infinitate bonitatis suæ naturalis: in eligendo fine quoad substantiam optimo? id quoque ex hypothese, quod aliquid condere velit, postulant infinitæ ejus perfectiones: restat igitur, ut liber sit in determinando gradu finis in se optimi, & in procreandis rebus, idque non ita solum, ut libere possit condere aliquid, vel nihil; sed ita etiam, ut possit hoc præ illo condere; sunt quippe hæc inter se connexa, & ratio sufficiens, quæ exigeret, ut Deus optimum mundum condat, exigeret quoque, ut Deus mundum potius condat, quam non condat (§. 83.). Nihil dicam de lege omnium philosophorum, ac theologorum consensione comprobata, quæ, quidquid in rebus creatis perfectum est, ab omni imperfectione repurgatum Deo tribui jubet; est autem perfectio libertas quædam in nobis perfectio quoad utramque sui partem, quatenus nimirum est facultas ponendi, vel non ponendi actum, & quatenus est facultas ponendi hunc potius, quam alium actum: imperfectio, quæ in illa inhæret, in eo consistit, quod hæc potentia ad malum se quoque extendat. Quare rejecta hac

Ime

imperfectione, sine defectu realitas ipsa in Deo inesse putanda est (conf. ont. §. 227. sch.). Denique libertas hæc nulli perfectioni morali opponitur; falsum enim est, quod Baumeisterus, & alii asserunt, electionem minoris boni in dicto sensu acceptam pugnare cum infinita Dei sapientia: hæc enim solum postulat, ut finis quoad substantiam optimus, & media ad eum maxime accommodata eligantur, quod utrumque stat cum electione mundi minus boni. Neque enim, cum mundum optimum negamus, ita intelligendi sumus, quasi doceremus Deum elegisse medium minus aptum ad finem suum consequendum, quod adversarii malevolentia, aut ignorantia ducti sæpe non satis discernunt. Atque inde patet, quid ad paritatem propositam respondendum sit: Cajus ponitur utique eruditionis causa librum emere velle; si igitur optimum, quem habere potest, non eligat, contra finem agit, neglectoque medio aptiori minus aptum arripit, quod insipientis est: Deus vero, cum mundum minus bonum condidit, eum tamen condidit, qui sit medium aptissimum ad consequendum finem præstitutum, quo sapientiæ suæ plenissime satisfecit. Quod si liber minus bonus inter alios optimos, & pretiosissimos fini, quem Cajus sibi præfixit, magis congruat, neque ille ob electionem vilioris insipientiæ argui poterit.

- §.) Determinatio Dei ad optimum mundum eligendum nequaquam libertati divinæ obest; imprimis enim determinatio Dei ad eligendum finem quoad substantiam optimum libertati non officit: ergo pariter. Deinde ad summum tantum inde sequitur necessitas consequens ex hypothesis nempe, quod se libere determinaverit ad aliquem mundum condendum; vel moralis: neutra autem libertatem tollit. Denique addit Baumeisterus: „quasi vero electio optimi non staret cum libertate. Cajo offerun-

„sur

„ tur plures libri diversi pretii. Eligit illum
 „ quem optimum judicat. Num putas, liber-
 „ tatem ita Caji, dum eligit optimum, cade-
 „ re? „

2. Ad primum disparitas est. Tamen si Deus ex hypothese, quod velit aliquem mundum condere, debeat se ipsum, seu gloriam suam eternam pro fine constituere, est illi tamen *an-*
tecedenter liberum aliquem mundum condere, vel non; & *consequenter* hunc, vel illum gradum gloriæ externæ determinare. Sed si Deus ex natura sua foret determinatus ad mundum optimum eligendum, nec antecedens ipsi relinqueretur libertas, qua sese ad condendum mundum, vel non condendum determinare posset, ut jam dictum est (§. 23.). A vero igitur prorsus alienum est, etsi id Leibnitiani nolint, quod parum curandum est; nec enim quaeritur, quid dicant, sed quid suæ sententiæ congruenter dicere debeant; alienum inquam a vero est, ex determinatione Dei ad optimum solam necessitatem consequentem profluere; sed hæc necessitas omnem omnino determinationem liberam antecedit, ut ipsa cognitio perfectionis maximæ in mundo possibili. Certe si hæc perfectio maxima fuit ratio sufficiens, ut Deus hunc mundum præ omni alio conderet, eadem quoque fuit ratio sufficiens, ut mundum potius conderet, quam non conderet; quam enim aliam statuent? Sic arguo: vel Deus ad condendum potius, quam non condendum eguit ratione sufficiente a liberrimo suo arbitrio distincta, vel non? si hoc: tum neque ad condendum hunc præ alio simili ratione opus habuit; si illud: ea ratio sufficiens distincta præter perfectionem maximam mundi possibili nulla esse potest: quid quid arripiant, se ipsos jugulant; si primum accipiant, valebit in ipsos hæc argumentatio: Deus non eguit ratione sufficiente externa, ut
 mun-

mundum potius condatur, quam non condatur: ergo etiam non eguit tali ratione, ut hunc potius præ alio condatur. Si ad alterum confugiant; ita ratiocinabor: posita hac ratione sufficiente non fuit Deo liberum, ut alium mundum præ isto condatur: ergo etiam non fuit ipsi liberum, ut mundum non condatur. En necessitatem antecedentem. Quam male autem ii suæ causæ consulant, qui ad necessitatem moralem confugiunt, patet jam ex (ont. §. 37. sch.): est nempe ea necessitas verbo quidem moralis, re autem ipsa, absoluta, antecedens, metaphysica; ita enim repugnat, ut Deus aliquid bonitati, sapientiæ, aut sanctitati contrarium admittat.

Baumeistero denique occurrens dicendo: electionem optimi stare cum libertate, si eligens se ipsum ad eam determinet; non item, si ille a bonitate objectiva determinetur. Cajus libere eligit librum optimum, cum ita comparatus est, ut etiam deteriores eligere possit; at si cognita bonitate nequeat illum non eligere, actum erit cum libertate. Applicemus hæc. Deus ex mente laudati Philosophi cognovit ab æterno, & quidem necessario perfectionem maximam unius inter omnes mundos possibiles; hæc cognita perfectio maxima fuit ratio sufficiens electionis divinæ: igitur ratio sufficiens electionis divinæ ab æterno, & necessario ante omnem liberam Dei determinationem posita fuit; sed posita ratione sufficiente vi principii contradictionis ponitur rationatum (ont. §. 22.), quod nec ipse inficiari potest: dicat ergo nobis, ubi, quando, & qualis libera determinatio in Deo fuerit, & quo modo cum hac optimi electione libertas divina componi queat? dicet, Cajum quoque a bonitate objectiva libri, tamquam ratione sufficiente, determinari ad eam electionem, nec tamen libertate expoliari. At id ipsum est, in quo quæ-

suo

stio vertitur; Caji quoque libertatem, si ita se res haberet, perituram in psychologia demonstrabo.

7. Si Deus mundus minus perfectum præ perfectiori condidisset, hujus actionis nulla foret ratio sufficiens; egisset proinde Deus sine ratione sufficiente, quod cum ipsius perfectionibus non consentit. Certe, si Deus pro libero suo beneplacito posset hoc, vel illud eligere, similis foret artifici humano, qui in elaborando suo opere non tam rationem sequitur, quam genio indulget. Quid quod omne bonum possibile pro gradibus suæ perfectionis jus habet prætendendi, ut ait Leibnitius, a Deo existentiam? Deinde intelligi nequit, qui fieri possit, ut Deus minus bonum præ majori magis amet.

8. Ratio sufficiens electionis divinæ ex parte possibilium omnino quæri non potest, si salvam velimus supremam Dei libertatem, ut paullo ante demonstratum est. Quin si accurate loquamur, nullam prorsus rationem objectivam Deus sequitur, neque ipsa mediorum aptitudo ad finem consequendum est illi vero sensu ratio motiva, cur ea eligat. Nequit nempe Deus ulla bonitate finita, quæ comparate ad infinitam prorsus evanescit, moveri; unde non eligit media ad finem aptissima, quia aptissima sunt, sed *qua* apta sunt, quæque ut talia infinita scientia prænoscit, atque id *ideo*, quia summa ratio, & sapientia præcipit, ut eligantur media, quæ ad finem obtinendum aptissima esse prævidentur. Sola igitur ratio summa, ac sapientia potest Deo esse *ratio motiva* ad aliquid eligendum; aptitudo vero mediorum ad summum dici debet *conditio*, sine qua electio non fieret; cum absente hac aptitudine ratio, & sapientia eam electionem non suaderet (conf. ont. §. 145. sch. 1.). Aliud quidem apud nos homines obtinet, qui finiri cum

cum finis, bonitate quoque finita moveri, & allici possumus: quare nos non modo eligimus bonum repræsentatum, *quod* bonum est, verum etiam *quia* bonum est, vel saltem tale esse apparet. Sed numquid ideo actio divina ratione sufficiente caruit? nequaquam: adfuit ea ratio sufficiens, quæ in actionibus liberis sola esse potest, quemadmodum alias dicam; ejus nimirum voluntas, quæ cum infinita ipsius ratione, & sapientia non congruere non potest. Neque tamen propterea genio indulgisse putandus est; licet enim ex liberrimo arbitrio agat, licet rationem sufficientem externam, & in possibilibus fundatam non respiciat, agit tamen semper ex, & cum summa ratione, modoque perfectissimo, & ipsum libertatis exercitium infinitæ in illo perfectionis est. Quod ad artificem humanum opus suum non ea, qua posset, industria elaborantem attinet; merito id illi vitio dabitur, si vel obligationi, qua erga alios stringitur, vel fini suo, quem obtinere cupit, non satisfaciat: quod si horum nihil adfuerit, neque is jure vituperari poterit, si opus, quod, & prout placuerit, efficiat. Jam vero Deus nulla aliquid producendi obligatione devinciri potest, atque etiam tum, cum minus bonum præ majori procreat, medium fini libere constituto convenientissimum eligit.

Jam vero illud, quod possibile secundum gradus perfectionis suæ a Deo existentiam postulet, quale est? unde imprimis jus istud? quid est possibilitas, nisi non repugnantia prædicatorum, & oriunda indeabilitas entis ab existendum? ergone ideo ens, quia ad existendum habile est, jus habeat a Deo postulandi, ut efficiatur? deinde, demus hanc inesse in possibilibus prætensionem; quis Deum eidem subjecit? tenebiturne ens infinitum, undeque independens postulationi huic morem gerere?

tere? annon, si ita foret, res creatæ non tam Deo, quam sibi ipsis, suæque majori perfectioni existentiam in acceptis referre deberent? Absit, ut vilem adeo de suprema Majestate conceptum philosophus mente foveat. Ad id demum, quod ultimo adjicitur, ajo, distinguendum esse amorem *liberalis beneficentia* ab amore *æstimationis*; hic veras in objecto perfectiones respicit; ille a liberali amanti animo, sine respectu ad objecti merita, & sine omni præterea benefaciendi obligatione proficiscitur. Jam vero cum Deus mundum minus perfectum præ perfectiori elegit, ex sola liberalitate beneficium existentia eidem contulit, quod neque huic, neque ulli alteri præstare tenebatur. Non tamen propterea minus bonum magis æstimavit; cognovit enim optime, quæ, & quales perfectiones possibles in quovis mundo possibili insint, quo sensu solum æstimatorum vel creandarum, vel creatarum in Deum cadit.





SECTIO III.

D E


EFFECTIBUS NATURALIBUS, ET SUPERNATURALIBUS.

§. LXXXV.

Quod
sectionis
argu-
men-
tum?



Enio adl notilissimam Cosmologiæ partem, quæ philosopho orthodoxo in primis curis esse debet; ipsa enim castissimæ religionis fundamenta propius attinguntur. Ut autem & dilucide, & distribute res omnis proponatur, differam primum de natura, ejusque legibus; tum de effectibus supernaturalibus generatim, ac nominatim de miraculis; denique criteria, quibus effectus miraculosus ab mirabili, sed naturali, certitudine morali maxima, discerni queat; suppeditabo. Habes igitur sectionis hujus argumentum.



CAPUT I.

De Natura, ejusque Legibus.

LXXXVI. *Natura, quæis, generatim notat* Quid & principium mutationum entis internum: *Natura* proinde *universa* est principium mutationum in mundo eidem internum. Cum porro omnes mutationes, quæ in entibus mundanis eveniunt, per eorundem agendi, patiendique potentiam possibiles sint, per vim autem actu existant, rite colligimus, naturam cujusvis entis in vi ejus, agendi, patiendique potentia juncta; ac naturam universam in collectione omnium virium, omnibus agendi, patiendique potentiis, quæ in omnibus entibus creatis insunt, junctarum constitui.

COROLL. 1. Cum vis substantiis solum competere possit, palam est, vires omnium substantiarum creatarum, etiam spiritualium, simul sumtas naturam universam absolvere.

COROLL. 2. *Natura* differt ab essentia, ut notat VVolfius; hæc enim interna entis possibilitate absolvitur: illa vim infert existentiaæ adhaerentem.

SCHOL. 1. Sermo mihi est de natura entium creatorum; Deum enim *natura auctorem* compellere soleo: neque placent barbara illa vocabula, quibus nonnulli absque ulla necessitate utuntur, dum Deum *naturam naturantem*; naturam vero mundi *naturatam* vocant. Quod ad veteres attinet, longum foret discrepantes eorum opiniones enarrare; quædam solum in medium proferam. Plurimi naturam, tamquam

Quæ veterum opiniones?

idolum quoddam, Deo in res creatas operanti
 ei ad latus posuerunt, eam substantiam esse ab
 omnibus aliis distinctam, perque totum orbem
 diffusam docentes, a quibus *Principii hylarchici*,
Archaei mundi, aut *Entelechia* cognomen-
 tum obtinuit. Ad hanc sententiam accesserunt
 illi quoque, qui cum Platone mundum ingens
 esse animal opinati sunt, a cujus anima per
 totum diffusa generationes rerum omnium pro-
 ficiscerentur, atque hanc doctrinam commu-
 nem fere fuisse philosophis omnibus, ex Plu-
 tarcho discimus: „ Omnes reliqui, inquit il-
 „ le, mundum animatum esse, & a providen-
 „ tia gubernari statuunt; Leucippus vero, &
 „ Democritus, & Epicurus, & qui præter
 „ hos inane, ac atomos introducunt, & ani-
 „ mæ expertem mundum faciunt, neque pro-
 „ videntia; sed natura quadam bruta admini-
 „ strari ajunt. „ Verum in natura hujus a-
 nimæ definienda in varias rursus partes abie-
 runt; nonnulli, quos inter primum locum
 Stoici tenent, Deum ipsum hanc mundi ani-
 mam esse absurde commenti sunt: „ Stoici,
 „ ait Lactantius, naturam dividunt in duas
 „ partes, unam, quæ efficiat; alteram, quæ
 „ se ad faciendum tractabilem præstet. In illa
 „ prima esse vim faciendi: in hac materiam;
 „ nec alterum sine altero esse posse. Ita isti
 „ uno naturæ nomine res diversissimas com-
 „ prehenderunt, Deum, & mundum, artifi-
 „ cem, & opus; dicuntque alterum sine alte-
 „ ro nihil posse, tamquam natura sit Deus
 „ mundo permistus; nam interdum sic confun-
 „ dunt, ut sit Deus ipsa mens mundi, &
 „ mundus corpus Dei. „ Idem fere Moshe-
 mius in Cudvorthum (a) ex definitione *τὸ
 πᾶν*, quam Zeno Stoicorum Princeps apud
 Laetium (b) attulit, clare colligi opinatur:
 Stoicos nimirum nullum posuisse inter ratio-
 nem,

De leg.
 l. 12.
 Item in
 Symposio.

De plac.
 phil. l. 2.
 c. 3.

Div.
 inst. l.
 7. c. 3.

(a) Syst.
 intell.
 c. 3. §.
 28. n. 2.
 (b) De
 vit. phil.
 l. 7. segm.
 148.

nem, & vim genitricem discrimen : sed utramque velut virtutes, & perfectiones unius, ejusdemque Dei, seu naturæ illius, quam per totam universitatem intentam esse putaverant, considerasse, ipsum vero Deum modo Jovem, modo Fatum, modo Mentem, modo Naturam appellitasse, quod ipsum Laertius quoque confirmat. Impium hoc Stoicorum dogma subinde etiam Varroni placuit ; ita enim loquitur apud S. Augustinum : „ Deum se arbitrari esse „ se animam mundi, quem Græci *κοσμον* vocant ; & hunc ipsum mundum esse Deum ; „ sed sicut hominem sapientem, cum sit ex „ corpore, & animo tamen ab animo dici sapientem, ita mundum Deum dici ab animo, cum „ sit animo, & corpore. „ Immo, quod mireris, neque Origenes ab hac opinione alienus fuisse videtur : „ sicut corpus nostrum unum ex multis membris aptatum est, & ab una anima continetur, ita & universum mundum velut animal quoddam immane opinandum putato, quod quasi ab una anima virtute Dei, „ ac ratione teneatur. „ Verum quam absurda hæc sit opinatio, cuivis per se manifestum est : ut non nihil dicam ; si Deus anima mundi sit, mundusque ipsius corpus, necesse quoque erit ; ut Deus ab mundo, quemadmodum anima nostra a corpore, ad perceptiones determinetur. Et nonne ex hac sententia consequens est, ut Deus quoque, vel pars ipsius animam nostram constituat, quod ipsum ii inficiati non sunt ? Quid igitur ? divina substantia discerpetur ? sed de hoc alias plura. Nunc ad eos venio, qui naturam, seu animam per totum universum diffusam eo fine propugnaverunt, ut supremum Numen tollerent. „ Straton Lampfacenus, ait Tullius, negat opera Deorum se uti ad fabricandum mundum : quæcumque sint, docent omnia effecta esse

It. segm. 137.

De civ. Dei l. 7. c. 6.

περί ἀποχ. 1. 2. c. 1.

29. ad. l. 4. c.

38.

Syst. in
tell. c. 3.
§. 15.

„ natura . „ Hæc Stratonis natura , interpre-
te Cudvortho , „ est vis quædam , & inte-
rior vita in singulis materiæ particulis con-
clusa , cujus ope semetipsam quælibet arte ,
ac consilio fingere , in easque formas , qui-
bus apta est natura , & idonea vertere po-
test , etsi quid faciat , ipsamet ignoret ,
nec , quid velit facere , secum constituat . „
Huic opinioni addictos Hylozoitas ipse com-
pellat .

Quæ
Cudv-
vorthi
de natu-
ra opi-
natio ?

SCHOL. 2. Sed ipsius quoque viri doctissimi ad-
mirabilis prorsus , ac singularis de natura sen-
tentia examinanda venit ; commovit me opi-
nionis novitas , ut eam in medium proferrem ,
atque confutare etiam . Ne autem in longum
excurrat oratio , primum ipsius prope verbis
proprietas naturæ , ut ait , genitricis enume-
rabo ; tum rationes , quibus ad eam stabilien-
dam impulsus est , adduceam ; denique ea pro-
feram argumenta , quibus in illa impugnanda
Moshemius usus est , quæque me iudice rem-
conficiunt .

Syst. in-
tell. c. 3.
differt.
de nat.
gen. §. 5.

Est igitur Cudvortho *natura genitrix* instru-
mentum Deo subjectum , quo divina providen-
tia tamquam ministro utitur in ea muneris sui
parte administranda , quæ ad materiæ disposi-
tionem , temperationem , & gubernationem per-
tinet . Superior quædam providentia adjungi
debet , quæ perperam ab ea admista sæpe nu-
mero corrigat , quæque nonnumquam actioni-
bus ejus , & consiliis intercedat . Ars est na-
turam animans ; omni arte humana præstan-
tior , numquam consilium capit , aut delibera-
rat , nihil tamen suscipit , cujus poenitere pos-
sit . Licet ordine & ratione agat , ac ad cer-
tos omnia usus dirigat , ipsa tamen metam , &
consilium nescit sui operis , neque causam ,
cur sic agat , perspectam habet . Agit propter
finem , attamen consilii , rationis , & intelli-
gen-

§§. 5. 8.
9. 10.

§§. 12. 13
15. 18.

gentiæ non est particeps; non habet conscientiam eorum, quæ agit, perceptionem tamen aliquam eidem tribuere ipse videtur. Agit fataliter, immo fatum est. Habet infinitum vitæ genus, nec a vitæ, quam vegetativam vocant, differt; est corporis expers; toti denique huic globo ex aqua, & terra conflato una præest hæc fœdrix vitæ, seu naturæ, quæ certo modo cunctis plantis, herbis, ac arboribus conjuncta est, easque omnes pro naturæ seminis cuiuslibet fingit & fabricatur; quæ pariter metallis, ceteraque corpora, quæ plus habent artis, quam ut a fortuito materiæ motu produci queant, conficit, & disponit. Denique ait Aristoteli repugnandum non esse, qui naturam esse certam mentis animalium partem, aut potentiam ignobiliorem in eorum animis habitantem putavit.

Rationes ipsi hæc sunt. 1.) Qui talem naturam genitricem negant, alterutrum horum coguntur profiteri: vel omnia fortuito, & temere cadere, & formari; vel ipsum Deum suis veluti manibus cuiuslibet animanti corpus fingere, neque majoribus tantum, & præstantioribus; sed cuivis etiam muscæ, & pulci, aut si quid hisce vilius est, quod Deum nimis curis oneraret. 2.) Plurima in rerum natura sunt, quæ vim legum mechanicarum superant, qualis est facultas respirandi in animalibus. 3.) Omnia sensim & gradatim generantur, quæ tarditas vanæ, & inanis pompæ speciem haberet, si causa rerum omnium efficiens esset infinite potens. 4.) Plures sunt errores in operibus naturæ; si nempe materiæ minus idonea sit, aut consilio fabricantis repugnet, quod fieri neutiquam posset, si Deus per se omnia efficeret.

Moshemius contra sic arguit: „Naturarum genitricium tutores hoc nomine imprimis seu

In loc.

cit. 9. 5.

n. (11.)

„ tentiam suam commendant, quod ea Deum
 „ perpetuo, molestissimoque labore levet, om-
 „ nemque præterea culpam vitiorum, & de-
 „ formitatum, quibus natura rerum passim la-
 „ borat, ab æterna illa, & sapientissima uni-
 „ versitatis causa removeat. Indigne ferunt
 „ ab illis, qui ab ipso Deo procurari credunt
 „ omnia, infinitam negotiorum multitudinem,
 „ & incredibilem molestiarum numerum supre-
 „ mo Numini imponi: nec Cartesio parcunt,
 „ quod conservari, a Deo leges motus in
 „ materia dixerit: quod quidem esse censent,
 „ ac si Deum numquam feriri, aut otiosum
 „ esse profiteretur. Verum ipsi, dum Deum
 „ semper vigilantem inducunt, ne natura ge-
 „ nitrix in vitia incurrat graviora; dum na-
 „ turam hanc judicio, & facultate rectum a
 „ pravo secernendi præditam esse negant;
 „ dum moderari Deum actiones ejus censent;
 „ dum corrigere Deum, & emendare, quæ
 „ forsitan admisit hæc natura, asseverant, ut
 „ alia taceam: num minus in Deum nego-
 „ tii, minusque molestiæ conferunt, atque
 „ illi? — — — Eterunt, nullus dubito, qui
 „ multo & simplicius, & rationi convenien-
 „ tius censeant, Deum cogitare ipsum omnia
 „ perficientem, quam naturam ipsi adjungere
 „ nec sapientem, nec potentem, sed rerum,
 „ & rationum vehementer ignaram, cujus il-
 „ le actus perpetuo moderari debeat: præfer-
 „ tim si Deum infinite potentem esse recor-
 „ dentur, cui commotio, & distributio mate-
 „ riæ plus creare nequeat molestiæ, quam
 „ procreatio ex nihilo exhibuit. Isne Domi-
 „ nus beatior est, qui, cum ipse valeat po-
 „ tentia negotia sua administrandi, nullum
 „ adhibet administrum, an vero ille, qui ser-
 „ vulos adsciscit sibi parum cautos, & pru-
 „ dentes, quorum imperitiæ, ac temeritati
 „ sem-

„ semper occurrendum est? — — — Ad de-
 „ formitates, & vitia, si modo his uti fas
 „ est vocabulis, quod attinet, quæ passim in
 „ natura rerum cernuntur, etiamsi naturam
 „ procreatricem Deo adjungas, multi tamen
 „ de his sibi satis esse factum negabunt. Ete-
 „ nim si Deus semper videt, quid agat hæc
 „ natura; si actiones ejus moderatur; si ca-
 „ vet, ne desciscat a norma; si denique cor-
 „ rigit opera ejus; nonne rerum omnium,
 „ quas ea peragit, causa, & ratio ad ipsum
 „ Deum postremo referenda erit? isne Domi-
 „ nus, qui servum numquam ex oculis dimit-
 „ tit, modumque ponit laboribus ejus; reus
 „ esse non videbitur vitiorum, quibus hic se-
 „ se adstringit? „

„ Quæ hic de natura dicuntur, vereor, ne qui- *ib. §. 10.*
 „ dam existiment, liberalius, & magnificen- *not. 2.*
 „ tius esse dicta, quam patiuntur; quæ supra
 „ §. 5., & infra de hac natura præcepit. A-
 „ lias naturam deligendi, & judicandi facul-
 „ tate carere, asseverat; hic perinde loquitur,
 „ ac si deliberato consilio quodvis opus ag-
 „ grederetur. Negat enim, ut reliqua taceam,
 „ suscipi ab ea aliquid, cujus poenitere queat.
 „ Alias Deum emendare nonnumquam, & cor-
 „ rigere admissos errores concedit. Hic vero
 „ significare videtur, nihil umquam vitiosi,
 „ aut cujus poenitere queat, naturam efficere.
 „ Mitto reliqua. „

„ Nisi me ratio fallit, tota hæc celeberrimi vi- *ib. §. 22.*
 „ ri de natura disputatio aliquid habet incon- *not. 4.*
 „ stantiæ; plerumque enim non aliter de ea
 „ disserit, quam de re per se constante, &
 „ extra hominem posita; hic vero naturam
 „ facultatem, & virtutem tantum esse in ani-
 „ mo residentem affirmat. „ Plura tute facile
 „ erues, quæ ad ejiciendam ex orbe id genus
 „ naturam serviant. Neque tamen hæc Cudvort

Ench.
Metaph.

Diff.
crit. t.
1. la vie
de Bay
le. pag.
86. nu.
1705.

thi opinio ita singularis fuit, ut non aliquos nacta fuerit sectatores; placuit certe nonnullis ipsius popularibus, ac præcipue Henrico Moro; placuit quoque Joanni Clerico: quocum ea de re acriter disputavit Baylius, hac fere ratione argumentatus: vel natura hæc genitrix est duntaxat instrumentum quoddam in manu Dei; vel ipsa revera organizationem corporum, & plantarum, similesque effectus efficit: si primum: otiosa est, neque in philosophia usum præstabit; si alterum: perit argumentum, quo ex mundi structura atheos refellimus; si enim natura omni ordinis cognitione destituta in suis tamen actionibus ordinem sequi potest, nulla erit necessaria connectio inter corporum organizationem, & ens aliquod intelligens. Sed jam longior fortasse, quam oportuerat, fui.

Quid leges, ordo, ac cursus naturæ?

LXXXVII. *Leges naturæ* sunt normæ illæ universales a supremo naturæ Auctore constitutæ, secundum quas vires substantiarum creatarum agunt; cum vero præterea constans sit quidam, ac invariabilis harum actionum modus, ordo inde quispiam enascitur, quem *natura ordinem* compellamus: ipsa demum immutabilis secundum hunc ordinem eventorum consecutio id est, quod *rursus natura* nomine venit.

COROLL. Ordo igitur, cursusque naturæ cum ejusdem legibus inviolabili nexu consociatur: quare intelligi nequit, quod VVolfius docet, etiam ablato naturæ ordine cursum ejus subsistere posse.

An existant?

SECT. I. Normas id genus universales, seu naturæ leges existare in dubium vocari nequit ab eo, qui paullo attentius constantes dierum, noctiumque vicissitudines, easdem variarum
an.

anni tempestatum successiones, immutabilem ab omni ævo astrorum motum, fixam in generationibus animalium, plantarumque rationem, perpetuam earundem in corporibus proprietatum, quæ jam olim detectæ sunt, constantiam contemplatur. Experientia certe docet, eadem ubique gravitatis, elasticitatis, co hæsionis, attractionis, repulsionisque phænomena obtinere. Quid, quod secus nulla posset esse in hominibus providentia, nullum consilium, nullæ scientiæ, aut artes, nulla certa instituendæ vitæ, aut curandorum corporum ratio: hæc enim omnia ex legum universalium constantia pendent; hac efficitur, ut calculi a nobis subducantur, futura prospici, certi effectus, ac certæ ex certis actionibus consecutiones expectari, & sic denique totius vitæ cursus suaviter institui queat. Est vero etiam hæc per constantes, & immutabiles leges totam rerum universitatem administrandi ratio vel maxime divinæ consentanea sapientiæ, atque ad infinitarum perfectionum patefactionem accomodatissima.

SCHOL. 2. Leges hæc partim, & fere præcipue a posteriori per constantem sensuum experientiam, partim etiam a priori per rationum deteguntur. Physici eas fere ad leges motus reducunt, quod omnes in mundo aspectabiles, mutationes per motum efficiuntur. Mihi vehementer placet Richteri opinio, qui tria legum naturalium genera constituit; *physicas*, quæ ad sola corpora, eorumque motus; *metaphysicas*, quæ ad mutuas corporum, spirituumque actiones; & *pneumaticas*, quæ ad solos spiritus, eorumque actiones, ac nexum inter se pertinent. Ab his distingui debent leges naturæ morales, de quibus hoc loco sermo non est.

29. phil.
de metab.
& spirit.
§. 17.

Leges
motus
non sunt
necessa-
rie.

LXXXVII. *Leges motuum, secundum quas omnes in mundo aspectabili mutationes natura efficit, non sunt absolute necessaria.* Præcipuæ motuum leges hæc fere sunt: quod cum substantia materialis ad habendam certam directionem, & celeritatem ab externo principio determinari debeat, hæc determinatio certam quampiam, ac constantem intervallo- rum, quibus substantiæ a se disjunctæ sunt, rationem sequatur; quod eadem determina- tio jam ad mutuum accessum, jam ad recessum tendat, & quæ ex his deinde profluunt, ut physici hodie docent; atqui leges has absolute necessarias esse, ac earum oppositum contradictionem involvere (ont. §. 96.) nulla omnino ratio suadet: quid enim? contra- dictorium sit, ut substantiæ materiales muta- ta illa intervallo- rum ratione aut citius, aut tardius moveantur, aut etiam accessum in recessum, & vicissim mutent? ut determinatio illa prorsus impediatur? ut vis effectum non consequatur? ut exempli causa grave non in linea recta, sed per curvam descendat, aut plane non descendat, sed in libero aere non aliunde sustentatum hæreat: hæc certe, & quæ similia sunt, in se non repugnant: re- stat igitur, ut leges motuum absolute neces- sariæ non sint.

COROLL. Leges igitur motuum contingentes (ont. §. 98. cor. 2.), ac proinde etiam mu- tabiles sunt (ontol. §. 116.); quod idem de ordine, cursuque naturæ, utpote connexis (§. præc.) affirmandum est.

SCHOL. Qui absolutam harum legum necessita- tem evincere vellet, eadem demonstrare in- cumberet, eas ex essentiis substantiarum crea- rum profluere; quis autem id serio affirmave- rit? sunt certe ipsarum essentia- rum prorsus indis-
fe.

ferentes, ut viribus suis secundum has vel illas leges agant, nec umquam Spinoza, aut quis alius ejusdem sectator contrarium evincet. Possunt ex iisdem libris in bibliotheca repositis diversissimi ordines confici, cur res mundanæ aptæ non sint ad alios, diversosque ordines constituendos? profecto ipsi nos eam habemus potestatem, ut corpora particularia varie trasponamus, conjugamus, aut separamus: nonne possumus viventium actiones, animalium, plantarumque generationes abrumpere; plantas evellere: semina fecundationi ineptæ reddere; insitiones surculorum in alterius speciei truncos facere; corporis lapsum supposito obstaculo impedire, aut in contrariam etiam partem movere; & alia id genus innumera, quæ sine opera nostra numquam evenirent? quid autem hæc omnia commonstrant; nonne contingentiam, ac mutabilitatem legum naturæ? nonne earundem lationem a libertimo Auctoris arbitrio pendere? Verum erit fortasse, qui dubitet, utrum hæc determinate leges, quas in theorematis demonstratione enumeravi, reapse in natura obtineant: id quidem minime officiet; quodcumque quis in physicis systema amplectatur, seu cum Cartesio, seu cum Nevvtono, aut Boscovichio sentiat, fateri nihilo minus cogetur, leges, quas ipse in natura agnoscat, contingentes, ac mutabiles esse. Sed jam satis; quæ a profanis obmoventur, sequente in capite commodius resolvam.

LXXXIX. *Secundum naturæ ordinem fit, Quid*
quidquid naturæ ordini convenit, eodemque *secun-*
salvo, ac illæso fieri potest, aut debet, ut *dum*
lapsus corporis non suffult: Secundum natura *aut con-*
cursum fit, quidquid in illis eventibus locum *tra na-*
habet, quorum consecutio cursum naturæ *turæ or-*
constituit; ut quotidianus ortus, & occasus *dinem,*
solis. *& cur-*
sum?

solis. Contra naturæ ordinem fit, quod ordinis naturæ adversatur, eoque salvo, ac illæso fieri nequit; ut corpus specificè gravius in aere hærens. Contra naturæ cursum fit, quidquid ad illos eventus non pertinet, quorum consecutio hunc cursum absolvit; ut eclipsis solis tempore plenilunii.

Quid effectus naturalis sit?

XC. *Effectus naturalis est, qui provenit a vi substantiæ creatæ secundum leges naturæ universales agente, qualis est combustio ligni in ignem injecti, aut lapsus corporis per lineam rectam.*

COROLL. 1. *Omnis effectus naturalis est secundum naturæ ordinem, atque cursum, & vicissim.*

COROLL. 2. *Spiritus creati quicumque ad substantias creatas referuntur: igitur si quos effectus viribus suis secundum universales naturæ leges agentibus producunt, ii in naturalibus habendi sunt (conf. §. 86. cor. 1.).*

SCHOL. *Loquor hic de effectu naturali, prout is opponitur supernaturali, de quo statim dicam. Alia est particio effectus in naturalem, & artificiosum; quæ huc non pertinet; uterque enim viribus naturæ perficitur, hoc solum discrimine: quod hic ab ingenio hominis artis legibus imbuto directionem accipit, ac ad certum finem destinatur: ille non.*

CAPUT II.

De Effectibus Supernaturalibus, ac nominatim de Miraculis.

XCI. *Effectus supernaturalis est, qui non* Quid effectus
provenit a vi substantiæ creatæ secundum u- superna-
niversales naturæ leges agente; ut subitanea turalis.
morbi depulsio, suscitatio mortui, creatio ali-
cujus substantiæ.

COROLL. 1. *Effectus supernaturalis vel absolute non provenit a vi substantiæ creatæ; vel si ab hac vi proveniat; ea non agit secundum universales naturæ leges.*

COROLL. 2. *Omnis effectus supernaturalis est contra naturæ ordinem atque cursum, & vicissim.*

XCII. *Omnis effectus supernaturalis est* & quod
supra naturam, ut ex terminis patet, contin- duplex.
git vero vel prater, vel contra naturam. Ef-
fectus praternaturalis dicitur, cum in univer-
sa natura, ejusque legibus duntaxat nulla est
ratio, ut is eveniat; ut rosam crescere sine
semine. Contranaturalis autem, cum non
modo in tota natura ratio non est, ut eve-
niat, sed etiam ratio in ea continetur, ut non
eveniat; ut corruptio corporis humani in
igne.

SCHOL. *Non sum nescius, vocabula hæc interdum in alia significatione usurpari, atque ad effectus tantum naturales applicari: ita medici omnem statum corporis morbosum praternaturalem dicunt; alii motum lapidis in altum*
pro-

projecti *contranaturalem* vocant . Intelligitur nimirum in his terminorum acceptionibus natura particularis cujusdam corporis , ejusque singularis constitutio , cui , si quid contrarium , aut tale , quod eidem nec repugnat , nec necessario competere debet , eveniat , etsi cum universæ naturæ legibus optime congruat , *contranaturale* , aut *præternaturale* appellatur . Prioris exemplum est actio veneni in corpus animalis ab eo hausti : posterioris chalybs virtute magnetica imbuta , aut ferrum in rotulam elaboratum . Sed sensus hos improprios esse nemo non videt ; quare consultius est , ut illos effectus *violentos* ; hos *artificiosos* eorum , qui accuratius loquuntur , exemplo nuncupemus .

Quid
miracu-
lum ?

XCIII. *Miraculum* est effectus supernaturalis vel ob raritatem , & insolentiam , vel ratione temporis , & adjunctorum admirationem in spectatore excitans .

COROLL. 1. Omne miraculum est effectus supernaturalis ; at non vicissim ; unde effectus supernaturalis rite distribuitur in absolute supernaturalem , & miraculosum .

COROLL. 2. Quæ igitur generatim de effectu supernaturali dicta sunt , miraculis quoque conveniunt . Est nempe quodvis miraculum contra naturæ ordinem , & cursum ; item , supra naturam , ac nominatim vel præter , vel contra eandem .

Defini-
tio vin-
dicatur.

SCHOL. 1. Erunt , nullus dubito , qui definitionis hujus rationem postulabunt ; illi sic habeant , effectus supernaturales duplici ratione contingere novimus ; aliqui in iisdem adjunctis perpetuo eveniunt , ut adeo adjuncta hæc videantur esse leges quædam universales , quas sibi supremus naturæ Auctor in administrando hoc

hoc universo liberrime præstituit : ita semper creatur anima rationalis , cum in utero materno fetus eam saltem organizationem obtinet , ut actiones corporis vitales perfici possint ; ita cum corpore humano semper anima rationalis , cum belluino semper spiritus inferioris ordinis conjungitur ; ita positis iis conditionibus , quas Deus libere , & non quasi ex pacto quodam requirit , hominibus gratiæ supernaturales conferuntur . Alii effectus supernaturales nullis certis adjunctis , nullis constantibus , generalibus legibus alligantur ; sed modo , ac tempore prorsus insolito ex liberrimo summi Conditoris arbitrio secundum abscondita nobis divinæ sapientiæ consilia perficiuntur : ita ad verba Josue sol stetit ; ita , volente Moyse super Ægyptum , & moriente Salvatore super universam terram tenebræ inductæ sunt ; ita Lazarus a mortuis suscitatus , panes multiplicati , aqua in vinum versa est . Porro , si in notionem miraculi , quam vulgo homines habent , attentionem convertamus , facile perspicimus contineri in ea quidpiam , quod admirationem in nobis concitet , idque ipsum etymologia vocabuli luculente confirmat . Jam vero experientia certum est , a prioris generis effectibus nullo nos modo in admirationem rapi ; rapi vero ab iis , qui ad posterius genus pertinent ; igitur si ideæ omnibus communi consulendum sit , ut omnino est (conf. §. 87. sch. 1. fin. log.) , nequit quivis generatim effectus supernaturalis miraculi nomine venire , quemadmodum Leibnitius cum suis contendit .

At confundi miraculum cum mirabili , & ipsa monstra , ut ait Leibnitius , in miraculis habenda fore conqueruntur . Nequaquam : effectus *mirabilis* est effectus naturalis ad concitandam in spectatoribus admirationem aptus :

mi

*Résumé
de div.*

*piéc. 2.
1. 4. é-
crit. §.*

43.

miraculum vero ex natura sua ad effectus supernaturales pertinet. Deinde raritas, inquit, insolentia, admirabilitas sunt determinationes solum externæ, quæ internum effectuum discrimen efficere nequeunt. Sit sane; quid igitur? Ego sic existimo, necesse omnino esse, ut internum, ac essentialē discrimen inter effectum naturalem, & supernaturalem statuatur; id vero amplius non requiri, cum effectum supernaturalem in absolute supernaturalem, & miraculosum subdividimus; quemadmodum nec ipsi Leibnitiani internum discrimen attendunt, cum tres miraculi species constituunt, nimirum quoad substantiam, quoad modum, & restitutionis. Denique opponunt suscitationem mortui semper fore vere miraculosam tametsi frequentissime, immo quotidie eveniret. Ita quidem, modo non secundum certas, & constantes leges simul efficeretur: sola certe frequentia naturæ miraculi a me definiti non obstat; at si mortui suscitatio vel aliud quodcumque verum alias miraculum certas, ac universales leges sequeretur, ita ut positis iisdem loci, ac temporis adjunctis effectum consimilem certo prædicere possemus, tam parum sane eum in miraculis haberemus, quam parum nunc hoc nomen creationi animæ rationalis tribuimus. Hoc ipsum profecto intelligere videntur, qui cum Boehmio nobis largiuntur collationem gratiarum supernaturalium ad miracula proprie dicta referri non posse; verum viderint illi, quomodo secum ipsis consentiant. Sed mittamus ista, ne in logomachiam incidamus; in eo solum cardo rei vertitur, ut solidissimis rationibus evincamus, posse multa contra stabilitas naturæ universæ leges a Deo effici, ad quod nihil interest, seu omnes universæ effectus supernaturales, seu eos solum, qui cum admiratione con-

Cosm. c.
4. §. 570.
sch.

conjuncti sunt, miracula compelles. Quod antequam præstetur, aberrantes quorundam de natura miraculorum opiniones in examen vocandæ sunt.

SCHOL. 2. Benedictus Spinoza miraculum definit opus esse naturæ, cujus causam naturalem exemplo alterius rei solita explicare non possumus. Est illi nimirum miraculum effectus tantum naturalis; verum insolitus, cujusque, tamen si secundum generales naturæ leges necessario efficiatur, homines tamen causam detegere nequeunt. Hac in sententia essentialis miraculi character, qui in eo consistit, quod supernaturalis effectus sit, atque omne inter miraculum, & mirabile discrimen collitur, nec mirum: nititur enim falsa hypothese, leges naturæ nullo modo mutari posse: videatur Buddeus.

Quæ opinio Spinozæ, Tract. Theol. pol. c. 6.

De atheismo & superst.

c. 7. Hobbesii, Leviath. c. 37.

Ad absurdam hanc opinionem fere accedit Thomas Hobbesius; etsi enim ajat miraculum immediate Dei actionem esse, inscite tamen subjungit, naturales ejus causas comprehendendi a nobis nequaquam posse; quod argumento est ipsius opinione miraculum ab effectu naturali reapse, & in se non discerni. Atque de hoc dubitare nos minime patiuntur ea, quæ de Deo, ejusque natura homo impius alias effatit. Pestiferam hanc doctrinam refutavit Græppius in theologia recens controversa.

P. 2. c. 2. q. 6.

Bernardus Connorius ea spargit principia, quæ nullo modo inter se cohærent, nisi Spinozæ exemplo Deus cum naturâ misceatur; miracula ex naturæ, & motus legibus, vocatis in subsidium principiiis medicis, dijudicanda esse contendit, dumque multis modum, ac rationem, quæ comprehendere possimus, quomodo ea efficiantur, docere aggreditur, audeat incredibili impudentia miracula, quorum sacræ litteræ

Connorii, Evangel. medici. art. 5. & 6.

teræ meminerunt , ex causis pure naturalibus explicare .

Grevvii, *Cosmol. sacr. l. 4. c. 5.* Nehemias Grevvius per miraculum intelligit effectum insolitum , & rarum , proveniente a causis , seu vi naturali , at incognita , in quantum ea a Deo ad consecutionem determinati cujuscumque finis dirigitur , ut adeo ex ipsius mente miraculum non sit , nisi *opus naturale , insolitum , atque a Deo ad certum finem directum* . Sed hæc sententia a Spinoziana non multum abludit , ut per se manifestum est ; tollit enim internam miraculi naturam ; tollit quoque omne criterium , quo miraculum a mirabili discernatur ; quid namque vetat , ut circumscriptorum aliquis causæ latentis non ignarus effectum quempiam insolitum ita ad certum finem dirigat , ut ea directio a Deo provenire spectatoribus appareat ?

Lockii .
Tract. de miras.

Joannes Lockius opinatur miraculum *operationem esse quamdam in sensus incurrentem , quæ , cum spectatoris captum exsuperet , ipsiusque opinione cursui natura constituto contraria sit , ab eo pro divina habetur* . Peccat hæc sententia in eo , quod sublato interno , ac absoluto miraculi caractere totam ejus rationem comparate ad spectatoris captum definiat , quo semel admissio vix ullus in rebus naturalibus effectus tam vulgaris erit , qui non a rudiori aliquo in miraculis haberi possit . Quod si præterea dissertatiuncula illa attentius discutatur , facile quis in suspensionem venerit , ipsum occulte cum Spinoza hac in re colluisse ; fuerunt certe viri eruditi , qui contendebant , Lockium *virtutis superioris* nomine , quo adeo obscure usus est , non aliud , quam naturam , quæ Spinozæ Deus sit , intellexisse . Sed nolo ego quidquam iniquius statuere .

Huttevillij & Klarkij

Superest , ut duorum clarissimorum virorum Klarkii , & Houttevillii de miraculorum natura opi-

opinionem examinemus ; sunt enim & in iis quædam , quæ minus probari possunt . Ac Hottuevillius , quidem negat miracula contra naturæ leges evenire ; simulque in eo solum præcipuum ipsorum characterem constituit , quod effectus insoliti , nobisque incogniti sint , ac ad nobiliorem quemdam finem a Deo ordinentur . Si quæras unde , & quomodo insoliti hi effectus edantur ? Respondet : Deum initio generales quasdam leges sanxisse , secundum quas totum regeatur universum ; ac jam tum etiam causas naturales ita disposuisse , ut certo subinde tempore ejusmodi eventus extraordinarii contingere debeant . Verum multa sunt hac in doctrina , quæ jure carpi possunt ; nolim equidem odiosa uti comparatione exemplo Falsionii , qui contendit eam a perniciosa Spinosa definitione quam proxime abesse ; id certe cum omnibus superioribus commune habet , quod internum , & absolutum inter effectum naturalem , & miraculosum discrimen prorsus tollat , quod nulla omnino ratione sustineri potest ; hoc enim , ut communi hominum sensui repugnat , ita præterea falsissimo nititur principio : non posse a Deo leges naturæ mutari . Deinde non video , quid eam inter , ac Grevvii opinionem supra refutatam discriminis intercedat ; merito igitur a Valschio (a) vehementer exagitata fuit . Quod autem ad Klarkium (b) attinet ; docet vir doctissimus miraculum esse effectum consueti naturæ ordini contrarium a natura quadam intelligenti , qua viribus hominem superat , extra ordinem productum . Quod hac in definitione displicet , illud est : quod ea genis quæque seu bonis , seu malis potestatem naturalem vera miracula patrandi tribuat , quod defendi non posse infra ostendam . Klarkio adstipulatur Joannes Clericus in dissertatione de miraculis

De rel. christ. l. 1. c. 5.

Dissert. de mira.

(a) *Contra In-cr. vol. 2. l. 3. c. 16.*
(b) *Traité de l'existence & des attrib. de Dieu t. 3. ch. 19.*

culis tractatui de incredulitate præfixa , VViliam Fleetwoodus in dissertatione de miraculis , Tillotsonus , Stillingfleetus , alique complures Angliæ theologi ; eundem contra impugnayit Jacobus Serces singulari libro Amstelodami anno 1729. in lucem dato ; sed in aliud extremum delapsus vir illustris omnem plane potentiam mirabilia quædam efficiendi geniiis ademittit : quod , ut consequeretur , necessè erat , ut sacrarum litterarum effata , veterumque auctorum testimonia , in quibus mirabilium a falsis vatibus , aut editorum , aut edendorum mentio sit , in alienum sensum violente detorqueret , ac unice de fraudibus , dolis , ac præstigiis accipienda esse doceret : id quod cum Samuele VVerensfeldio , Alphonso Turretino , Arnaldo Noltenio , aliisque fidelissime præstitit , quo tamen successu paullo post dicendi locus erit . Quæ denique Humius (a) contra miracula disputavit , solide refutata invenies apud Georgium Campbellum (b) : mihi jam longiori esse non licet .

(a) *Specim. de mirac.*
(b) *Dissert. de mirac.*

Quid miraculum quoad substantiam & quoad modum ?

XCIV. Miraculum , cum sit effectus supernaturalis , non provenit a vi substantiæ creatæ secundum universales naturæ leges agente (§. 91.) : igitur miraculum superat omnes omnium creatarum substantiarum vires . Jam vero vel ita has vires superat , ut effectus in se spectatus absolute , & sub nullo respectu ab iis effici queat , ut creatio , seu annihilatio alicujus entis , suscitatio mortui . Quod tale est , miraculum quoad substantiam compellatur ; vel solum pro his adjunctis , & quoad modum effectationis eas vires excedit , & dicitur miraculum quoad modum , quale est subitanea morbi depulsio .

SCHOL.

SCHOL. Nemo sibi persuadeat miracula quoad modum inferioris in se ordinis esse, aut vi-
 lioris quodam modo conditionis: absit istud;
 sunt ea veri nominis miracula, & effectus ab
 absoluta Dei omnipotentia profecti, cui om-
 nia possibilia eodem, id est, nullo constant
 labore, nec facilius quidquam, aut difficilius
 factu concipi potest. Discrimen istud ideo
 solum statuimus, quod magnum in dijudican-
 dis miraculis usum præstat, ut deinceps appa-
 rebit. Certe si ad rationem veri miraculi re-
 quireretur, ut effectus absolute, ac sub omni
 respectu universæ naturæ vires exsuperet, mi-
 rabilis coturnicum in castra Hebræorum com-
 pulsio, murorum urbis Jerichuntinæ ruina, in-
 veteratorum morborum curationes a Christo
 effectæ, & complura alia, quæ omnium probor-
 um consensione adhuc in veris miraculis nu-
 merabantur, ex eorum numero expungenda
 forent.

XCV. *Miracula possibilia sunt.* Si leges mo-
 tuum, secundum quas omnes in mundo mu-
 tationes perficiuntur, contingentes, & mu-
 tabiles sunt, tum de interna miraculorum
 possibilitate nulla potest ratione dubitari; at-
 qui illud ita est (§. 88. cor.): igitur evidens
 est miracula veri nominis possibilia esse.

Miracu-
 lum est
 possibi-
 le.

SCHOL. I. Profecto si leges illæ, secundum
 quas vires substantiarum creaturarum aut possunt,
 aut debent agere, mutari queant, multa effici
 poterunt, quæ ab iis viribus secundum leges
 sibi præstitutas agentibus nequaquam prove-
 niunt. Poterunt exempli causa leges motus
 suspendi, & motus in corporum conflictu sine
 celeritatis imminutione communicari; poterunt
 impediri actiones naturaliter ex causarum crea-
 tarum viribus secuturæ, ut ignis tres pueros
 in

in fornace Babylonica non læsit; poterit nova series nova determinatione inchoari, & ea quidem ratione, qua creatæ vires nequeunt, ut subitanea morbi depulsione, aut mortui suscitacione; poterit aliud nondum existens procreari, aliud annihilari, vel quacumque deum ratione aliud in alterius locum substitui, ut per conversionem aquæ in vinum contingit; poterunt conjungi ea, vel disjungi, ad quæ conjungenda, aut disjungenda vires naturæ se non porrigunt, velut montis in alium locum translatione; poterunt denique alia quamplurima, modisque diversissimis effici, quæ vires omnium creatorum entium prorsus excedunt.

Respon-
detur
obje-
ctis.

SCHOL. 2. Quæ minuti philosophi contra objectant, ad hæc fere reducuntur. Ajunt.

1.) Leges naturæ fluunt ex essentiis substantiarum creatarum: igitur æque immutabiles sunt, ac ipsæ essentiæ.

2. Nequaquam; etsi enim vis substantiis interna, quin essentialis sit; ea tamen ex se non potius hanc, quam illam legem poscit, estque prorsus indifferens, ut hoc, vel illo modo agat; ita vis motrix substantiæ materialis ex natura sua non exigit, ut motum in hac potius, quam illa directione, per lineam potius rectam, quam curvam efficiat: quare liberum Deo relinquitur, ut ipse, quam placuerit, legem constituat. Deinde, quid obstat, quo minus Deus actiones harum virium aut augeat, aut minuat, aut prorsus impediat, quemadmodum nos ipsi lapsum corporis impedire possumus (conf. §. 88. cum sch.)? Errant igitur, qui universales naturæ leges in attributis entium mundanorum habent; attributorum quippe ratio sufficiens in ipsis entium essentiis continetur (ont. §. 56.), hæ vero leges a liberrima Dei voluntate proficiuntur. Veris-

simum

simum equidem est leges naturæ rerum essentiis conformatas esse; ipsisque earum rerum ordinem aptari; verum id non ita accipiendum est, quasi hæ naturæ leges ex rerum essentiis absoluta necessitate promanent, ordoque fatalis inde enascatur; sed quod iisdem non repugnent, & ordo constitutus ipsis consentaneus sit.

- 2.) Spinoza ita arguit: „Leges naturæ universales mera sunt decreta Dei, quæ ex necessitate, & perfectione naturæ divinæ sequuntur. — — — Quidquid fit, per Dei voluntatem, & decretum fit, hoc est, ut jam ostendimus, quidquid fit, secundum leges, ac regulas, quæ æternam necessitatem, & veritatem involvunt, fit. — — — Idem etiam ex hoc facile posset ostendi, quod potentia naturæ sit ipsa divina potentia, & virtus; divina autem potentia sit ipsissima Dei essentia. „

Tract.

theol.

pol. c. 6.

- ✱. Everso jam absurdissimo Spinozæ systemate (§. 41. sch.) ea, quæ hic impudenter effudit, nullam amplius robur habere queunt. Sed ut aliquid dicam: imprimis eadem confidentia, qua ipse in asserendo utitur, negamus hæc Dei decreta ex necessitate, & perfectione ipsius naturæ sequi: nulla certe inter infinitam Dei perfectionem, & has determinate leges connexio ostendi potest, neque ex aliis huic rerum universitati præstitutis imperfectio- nis quidpiam in Deum redundasset. Deinde imperite, ac callide æternitatem cum necessitate confundit, quasi vero omne, quod ab æterno futurum erat, & perpetuo suam veritatem determinatam habet, hoc ipso etiam necessario futurum sit. Denique tametsi Dei potentia sit realiter ipsa ejus essentia, non est tamen inde consequens, ut id, quod ab hac potentia efficitur, non sit contingens. Verum

potentiam naturæ ipsam esse Dei potentiam nemo admiserit, nisi qui ad eandem cum illi impietatem devenerit.

3.) Leges naturæ morales necessariae sunt, & absolute immutabiles; cur non igitur idem de legibus naturæ, quas physicas, seu mechanicas vocant, affirmetur?

* Ratio dispar in eo sita est: eas Deus necessario creaturæ rationali præstituisse debuit; non item has toti rerum universitati. Ad divinas nimirum perfectiones vehementer pertinebat, ut hominem, quem condidit, providere, & sapienter ad finem suum consequendum gubernaret, id quod non præstitisset, nisi præcepisset ea, quæ ad finem illum obtinendum necessaria sunt, & contra vetuisset ea, quæ hominem ab hoc fine avertunt, quo uno tota lex moralis continetur. At contra entia creata seu hoc, seu illo modo agant, seu his, seu aliis legibus gubernentur, ad finem suum pertingunt, perfectionesque divinas patefaciunt; unde nulla Dei perfectio has determinate leges physicas postulavit; quamvis ejus sapientia, ac providentia aliquas indeterminate exegerint: quare nihil etiam obstat, ut ne in casu quopiam particulari legum physicarum una aliqua mutetur.

4.) Si miracula sint possibile, sequitur imprimis Deum in decretis suis mutabilem esse, ut qui novum, & extraordinarium effectum in tempore decreverit; sequitur deinde etiam cum initio non sat provide, & caute egisse, & velut ob adjuncta non prævisa miraculum edere, quæ omnia pugnant cum infinita Dei perfectione.

* Etiam consecutiones has cum ratiocinandi legibus pugnare. Quod ad primum: eadem simplicissima, ac immutabili voluntate, qua Deus hanc rerum seriem ab omni æternitate decrevit,

vit, simul statuit hoc vel illo tempore, hoc vel illud miraculum patrare: quare nulla est in ipso novarum volitionum successio, ob quam interne mutaretur. Idem nimirum hic contingit, quod evenit, cum mundus ob æternum Dei decretum existere incepit, de quo supra dixi (S. 27. schol. n. 6.): opera mutat, inquit S. Augustinus, consilia non mutat. Mutaretur equidem Deus, si legem quampiam moralem immutaret; cum enim illam necessario tulerit, si nunc aliqua mutatio eveniret, censeretur ipse eam in tempore velle, quam ab æterno nec voluit, nec velle potuit, sicque contra suas perfectiones ageret: alia longe legum physicarum ratio est, quas cum Deus initio libere voluerit, potuit eas quoque cum restrictione quadam, & exceptione pro casibus quibusdam singularibus constituere. Physica nempe divinarum perfectionum manifestatio per diversas leges obtineri potest; moralis vero, quæ creaturarum liberarum propria est, per has solum leges morales. Quod ad alterum: Deus non ideo miracula edit, quod in hac rerum serie quædam male, aut improvide constituta sint, quæ emendatione aliqua, aut correctione egeant; absit a nobis temerarium hoc de divinis actionibus iudicium: habet illa fines alios Majestate sua dignissimos, cur nonnumquam effectum, quem per aliam ab æterno causarum naturalium dispositionem via prorsus ordinaria consequi potuisset, per miraculum obtineri velit, quin propterea sapientissimæ illius providentiæ quidpiam decedat. Immo hac ratione divina bonitas, potentia, rerum creaturarum cura, aliæque perfectiones multo maxime illustrantur: experientia certe docet, homines passim effectibus insolitis magis, quam iis, qui secundum naturæ cursum eveniunt, ad laudes

Vernün-
frige
Gedan-
ken von
Gott,
der
Welt,
und der
Seele des
Men-
schen. 55.
1039.
— 34.

Emile t.
3. p. 22.

potentissimi, benignissimique Conditoris prædicandas stimulari. Atque hinc patet in gravissimum errorem prolapsum fuisse VVolfium; virum cetera eruditissimum, cum contendit miraculum a divina quidem potentia, non autem a sapientia proficisci posse, ac mundum, in quo omnia naturaliter eveniant, verum esse sapientiae opus, multoque meliorem eo, in quo multa miracula parentur.

5.) Hæc de miraculorum possibilitate doctrina multis fraudibus, ac deceptionibus ansam præbet; notum est, quam multæ, & admodum noxiæ fabellæ tum olim inter idololatrias, tum nostra quoque ætate in vulgus sparsæ sint. Quid quod ignoramus, quatenus vires omnium substantiarum creatarum pertineant? omnes certe naturæ leges, totumque rerum ordinem nemo perspicit, quod tamen necesse foret, ut de veritate miraculi absolute pronuncietur, ut argutatur Rousseavius. Et fortassis existit ordo quidam naturæ diversus a præsentē, nobisque adhuc incognitus, qui sese progressu temporis evolvat, ita ut secundum eum effectus insoliti, quos in miraculis numeramus, necessario eveniant. Magis igitur e re fore concludunt, ut aut miraculorum possibilitas penitus tollatur, aut totum argumentum æterno silentio prætereatur.

6. Ad singula. Primum argumentum est huic simillimum: plurimæ olim fabulæ de Diis spargebantur: magis igitur consultum est existentiam Dei inficiari; o præclaram, dignamque philosopho argumentationem! Si quando hæc doctrina fraudibus, ac fabulis occasionem præbuit, id non ex ea *per se*, sed *per accidens*, ut ajunt, fluxisse certum est, quod veritati minime obest; sed malitiæ, aut ruditati hominum adscribi debet. Quis ignorat, sanctissimis quibusque rebus homines impios frequenter ab-
uti,

uti, an ex propterea abjiciendæ sunt? id solum inde sequitur, oportere, ut in ferendo de eventis insolitis iudicio cautissimi simus, neque cum plebe nimis credula omnia sine discrimine in miraculis habeamus: verum æque errant, qui nihil; quam, qui omnia credunt. Deinde ignoramus equidem, quousque vires totius naturæ se porrigant; scimus tamen eas finitas esse, ac proinde effectum, qui vim infinitam postulat, qualis est creatio, annihilatio, mortui suscitatio; ab iis proficisci non posse; scimus item perfrequency, quid vires creatæ in casu particulari, in his adjunctis, in quibus versamur, possint, aut non possint; scimus constantes esse motuum leges; ab iisdem causis eodem modo applicatis eundem semper effectum sequi, & quæ sunt ejusmodi. Id jam vero sufficit, ut absolutum sæpe de effectu insolito iudicium formetur; cum enim dentur miracula quoad modum, quæ in se totius naturæ vires non exsuperant, satis est, ut certitudine morali constet, hunc effectum in his adjunctis a vi creata effici non posse: non igitur necesse est, ut vires totius naturæ exploratas habeamus. Egregie hoc argumentum pertractat, ac Rousseavium refutat Bergierius (a). Ego autem ex Clerico (b) profanis istis minus suspecto quædam proferam, quibus objectioni plane satisfiat. „ Rerum quidem naturalium, ita ille, inadæquatam nobis esse ideam, aut an sit adæquata, scire nos non posse ultro fatemur. Attamen tanta non est ignorantia nostra, ut numquam quidquam præter naturæ ordinem esse affirmare possimus. Multa gentium, & sæculorum omnium experientia constant, qualia sunt, quæ modo diximus. Proprietates quidem omnes humanæ naturæ, & substantias, quibus homo constat, non satis esse notas pas-

(a) *Déiss.
me ré-
suté p.*

2. *Lettr.*
12. p. 212

(b) *Pne-
umat. f.*

3. c. 8.
n. 6.

„ sim ostendimus , nec eo secius ab homine
 „ decem millia pondo bajulari , & ignis ve-
 „ hementiam sine detrimento ferri non posse
 „ notum est . Si quis tantum pondus ferat ,
 „ aut illæsus in mediis ignibus diu maneat ,
 „ id præter naturæ esse ordinem omnibus li-
 „ quet . Si diceretur cometa ad solis nostri
 „ vorticem appulsus præter naturæ ordinem
 „ esse , posset hoc in dubium revocari , quia
 „ satis nobis non est notus cometarum motus ,
 „ ut , quid sit præter ordinem , quo moven-
 „ tur , certo definire queamus . Sed ubi de
 „ rebus sermo est , quas omnes homines sem-
 „ per eodem modo se habere experti sunt ,
 „ quid sit præter naturæ ordinem , pronuncia-
 „ re certo possumus , ut ex allatis exemplis
 „ intelligere est . „ Qui denique ad occultum
 naturæ ordinem confugiunt , ii viderint , in
 quas sese tenebras ultro abant . Si ignotus il-
 le ordo , quo argumento existare comprobabi-
 tur ? estne ille diversus a conspicuo hoc co-
 rarius mundi corporei ordine , an idem cum eo ?
 si idem : quomodo incognitus ? si diversus :
 an etiam oppositus ? at repugnat utique , ut
 eodem tempore in eodem mundo duo ordines
 inter se pugnantes obtineant ; si autem non op-
 positus , tum cum noto nobis ordine congruet ;
 quid igitur ? an nihilo minus effectus secundum
 illum eventientes huic repugnabunt ? an non
 potius huic quoque conformabuntur ? demum si
 ignotus ille ordo , qua ratione Prophetis , A-
 postolis , aliisque pietate conspicuis innotesce-
 re potuit ? innotuisse autem vel ex eo lucu-
 lente patet , quod ordinis hujus effectus præ-
 viderint , prædixerint , illique secundum illo-
 rum verba , aut preces constanter evenerint .

Solus
Deus est
vera
causa
miracu-
li.

XCVI. *Solus Deus est causa efficiens prin-
 cipalis miraculi .* Miraculum , utpote effectus
 su-

supernaturalis (§. 93.) vel absolute non provenit a vi substantiæ creatæ, vel ab ea quidem provenit, sed non ut agente secundum universales naturæ leges (§. 91. coroll. 1.); quidquid horum sit, sua constat propositioni veritas. In priori siquidem casu aperte consequens est, ut illud a vi substantiæ increatæ, quæ Deus est, proficiscatur: in posteriori autem substantia creata agit secundum legem quampiam extraordinariam pro singulari hoc casu præstitutam, ac proinde ad nulum, & specialem jussionem Dei, qui solus statutas a se leges mutare, novamque sancire potest; sed ejusmodi causa ministerialis est, & instrumentali æquiparatur; alteraque, ad cujus nutum actio exercetur, principalis audit (ont. §. 147. & sch. 1.): in utroque igitur casu solus Deus est causa efficiens principalis miraculi.

COROLL. 1. Miraculo igitur velut vivæ Dei voci auscultandum; neque fieri omnino potest, ut doctrina, in cujus confirmationem patrat, vera non sit.

COROLL. 2. Atque ideo infinitæ Dei bonitatis, veracitati, ac providentiæ repugnat, ut miraculum edatur iis in adjunctis, in quibus spectatores secundum omnes humanæ prudentiæ leges ad falsam doctrinam amplectendam inducerentur.

SCHOL. 1. Neque vero quis in dubium vocabit, opinor, mutationem universalium naturæ legum ad solum Deum pertinere; ille enim solus supremum in res creatas dominium obtinet, hocque usus dominio has leges constituit: quare, etsi ignoremus, cujus efficacitatis vires creatorum spirituum sint, id tamen certissime affirmare licet, ipsos generales naturæ leges perturbare, aut aliqua ratione immutare

non posse. Errant igitur, qui Clarkium fecu-
 ti genis quoque seu bonis, seu malis vera
 miracula patrandi potestatem tribuunt. „ Non
 „ animadvertit Clarkius, inquit Moshemius in
 „ Cudvorthum, incredibile omnino, & a
 „ ratione aversum videri, Deum, qui summa
 „ sapientia leges naturæ sanxit, & rogavit,
 „ inferioribus naturis tantum virium largitum
 „ esse, ut, si velint, legibus illis modum
 „ queant ponere. Certe nulli sapientiam, &
 „ providentiam suam probaturus esset rex ille,
 „ qui ministris suis facultatem daret, leges
 „ magna cura excitatas a se, ac roboratas pro
 „ lubitu vel abrogandi, vel impediendi. Ne-
 „ que causæ aliquid video, cur de supremo
 „ Numine aliter nobis existimandum sit.
 „ — — — Nulla res cum veritate, & reli-
 „ gione major sit, haud esse tantam inde li-
 „ quet malis genis potentiam a Deo datam,
 „ quantacumque ceteroquin ea in se sit, ut
 „ vel ad errorum confirmationem, vel ad ve-
 „ ritatis cælestis oppugnationem miracula pro
 „ lubitu, & arbitrato facere queant, — —
 „ Nimis remotum a divina sapientia, & be-
 „ nignitate videtur, ut dæmones, quibus o-
 „ dio sunt homines, & divina veritas, pote-
 „ state, quam acceptam a Deo habent, libere
 „ utantur ad consilia divina invertenda, ho-
 „ minesque in vitia & errores inducendos.
 „ Nemo, ut opinor, sapientem, & reipubli-
 „ cæ cupidum regem illum diceret, qui eo-
 „ dem tempore, quo ipse leges utilissimas ro-
 „ gat, hostes suos pateretur perniciosas cir-
 „ cumferre sententias, populoque viam ad exi-
 „ tium sternere, siquidem his conatibus resi-
 „ stere posset.

SCHOL. 2. At vero etsi omnino certum videatur, nullam esse spiritibus puris in universales naturæ leges potestatem; id tamen inter do-
 ctis.

Syst. in-
 tell. c. 5.
 §. 1. §. 85.

Quæ de
 viribus
 spiritu-
 um opi-
 niones?

ctissimos quoque viros acriter disceptatur, utrum iisdem omnis absolute vis deneganda sit, qua, utpote validiores, sagacioresque hominibus, multa efficere queant, quæ in se quidem naturæ legibus consentanea sint, nobis tamen iisdem adversa appareant, atque ideo speciem quamdam miraculi præ se ferant. Duæ sunt hac de re sententiæ; affirmantium una, negantium altera: ego utriusque partis momenta ea, qua fieri poterit, brevitate enumerabo: utra earum verior sit, lectoris esto arbitrium.

Ad priorem accesserunt Leibnitius (a), qui effectus a geniiis patratos *miracula respectiva*, ac inferioris ordinis compellavit, Martinus Delrio, & recentius auctor anonymus (b). Sed omnium acerrime eam propugnavit Cudworthus (c), cujus doctrinam magnis præconiis extulit Moshemius, atque compendiarie ita proposuit: „Negat vir doctissimus (Cudworthus) tantas esse malorum geniorum vires, ut vera possint edere miracula, id est, naturæ leges, quas Deus ipse posuit, vel tollere prorsus, vel etiam mutare: concedit autem fieri ab illis posse multa, quæ nobis videantur miracula, & hominum omnium facultates excedant. Neque est (subdit) inter philosophos, & theologos aliquis, qui hac de re dubitationem unquam commoverit; Distinguunt contra omnes inter *miracula*, & inter *mirabilia*; hæc esse sibi posse a geniiis affirmant: illa negant. Addit vir eximius: hac potestate non uti posse pro lubitu, & arbitrato inter homines cacodæmonem, præsertim cum res agitur veræ religionis: sed tum tantum, cum Deus id patiatur; permittere autem id Deum non aliter, quam cum aut explorare velit hominum erga se voluntatem, aut populos, qui lucem veritatis diu spreverant, & contem-

(a) *Essais de Théod.*

p. 3. §.

249.

Récueil de div. pié c.r.

1. écrit.

4. & 5.

§§. 44.

& 117.

(b) *Traité des miracles*

Paris 1763.

(c) *Syst. intell. c.*

5. f. 1. §§. 24. seqq.

Loc. cit. not. 1. ad §. 26.

serant, iustissimis pœnis afficere, & in er-
 rorum servitutem tradere. Atque superius
 quidem si facere velit, non finere supre-
 mum Numen, ut ad aliorum dogmatum
 confirmationem cacodæmon miracula (in-
 tellige, illa mirabilia) patret, quam eorum,
 quorum turpitudinem, & falsitatem simpli-
 cissimus quilibet statim perspicere valeat. Et
 vero, ut nonnulli arguant, spiritus ab omni
 corporis compage separatos multa in hoc
 mundo præstare posse vel inde efficacissime
 suaderi videtur; quod & vi agendi polleant,
 ut omnes reliquæ substantiæ creatæ, & crea-
 ti cum sint, ad eam rerum seriem, quæ to-
 tam hanc universitatem constituit, pertineant,
 quam ob rem certis quoque legibus a Condi-
 tore præstitutis in agendo adstricti videntur.
 Quæ quidem hypothesis si assumatur, facile
 intelligitur, quomodo naturaliter, & salvis
 naturæ legibus effectus prorsus mirabiles a spi-
 ritibus effici queant; quemadmodum nempe,
 cum ope antliæ aquam elevamus, aut lapidem
 sursum projicimus, lex generalis de gravium
 descensu non mutatur, cum alia æque gene-
 ralis, quæ corpora directionem vis fortioris
 sequi jubentur, exstet: ita cum spiritus secundum
 sibi legem præstitutam quidpiam agit, commu-
 nes naturæ leges, inter quas & illa locum ha-
 bet, minime lædit. Addunt deinde quamplu-
 rima tum ex veteri gentium historia, tum ex
 ipsis SS. litteris (a) testimonia, in quibus
 interpretandis contrariæ sententiæ patroni in-
 gentem violentiam adhibere coguntur, ut id,
 quod cupiunt, exculpant: difficillimum ni-
 mirum esse putant, ut omnia loca, in quibus
 vel ipsius cacodæmonis, vel ejus ministrorum
 miracula commemorantur, de fraudibus solum,
 dolis, & fallaciis inimicorum veritatis intelli-
 gantur. Proferunt quoque exemplum: Magi,
 ajunt,

(a) De-
 ut. c. 13.
 v. 5.
 Math. c.
 24. v. 4.
 2. Thes-
 sal. c. 2.
 v. 9. 10.
 11.

ajunt, *Ægyptiaci* (a) virgas in colubrum vertunt; quid ad hæc adversarii? Præparatos a magis jam antea fuisse illos colubros in-
 quunt. Ita Constantinus Franciscus de Cauz in suo eruditissimo de cultibus magicis ope-
 re (b): „ Quod miraculum (Moyſis) quum
 „ Pharao eludere vellet, vocavit *sapientes*, &
 „ *maleficos*, quibus quod jam Moyſis miracu-
 „ lum renunciatum fuit, facile fuit serpenti-
 „ bus (his namque venenum adimere populis
 „ orientalibus cognitissimum erat) se munire,
 „ & dexteritate manuum, objectisve quibus-
 „ dam larvis eadem simulare. Addit enim sa-
 „ cer textus, *fecerunt etiam ipsi per incanta-*
 „ *tiones Ægyptiacas, & arcana quadam SI-*
 „ *MILITER*. Quia hæc nihil de opera dæ-
 „ monis dicitur, quid vetat, secundum histo-
 „ riam ductum de imposturis, & præstigiis phi-
 „ losophorum, & theologorum gentilium ea
 „ accipere? „ Tum ad explicationem hanc
 corroborandam provocat ad viros omnium æ-
 reatum doctissimos & ad ipsum S. P. Benedi-
 ctum XIV. (c). Quod vero deinde dicantur
 in S. textu virgæ *verse fuisse in dracones*, id
 de substitutione commodè intelligi posse pu-
 tat, quemadmodum alias dicitur *luctus versus*
fuisse in gaudium (d). At interpretationem
 communi SS. PP. ac celebriorum scripturæ in-
 terpretum opinioni adversam esse contendunt
 alii, laudantque pro se Tertullianum (e), Ju-
 stinum M. (f), Ambrosium (g), Hiero-
 nimum (h), Gregorium Nissemum (i), Ru-
 pertum (k), Prosperum (l), Sedulium (m),
 Augustinum, Thomam, Eyratum, Tostatum,
 Bererium, Cornelium a Lapide, Josephum
 quoque Flavium (n); neque Benedictum XIV.
 quidpiam præsidii adferre: innuit ille quidem,
 ajunt, versionem eam pro substitutione accipi
 posse; at non clare exprimit, utrum hanc sub-

(a) E-
xod. c. 7.
v. 11.

(b) L. 1.
c. 5. §.
173.

(c) De
Canon.
SS. l. 4.
p. 1. c.
3. n. 4.
(d) 2.
Reg. 19.
(e) L. de
anim.
c. 57.

(f) 2. or-
th. respo.
ad q. 26.
(g) In c.
3. ad
Tim.

(h) 2. 2.
ad Al.
gasim.

(i) L. de
vit.
Moyſ.

(k) In
Exod.

(l) De
promiss.
p. 1. c. 15.

(m) Car-
mel. l. 4.
(n) Ant.
l. 2. c. 10.
Loc. cit.

n. 14.

substitutionem a Magis ipsis, an in eorum gratiam a demonibus factam fuisse putet; quin hoc ipsum intellexisse argumento est, quod laudato in capite ab initio ad numerum 17. usque hæc quæstio pertractetur; utrum malis angelis vis, ac potestas vera miracula patrandi competat? Quam Sanctissimus Pater ita definit, ut detracta vera miracula edendi potestate vim tamen mirabilia efficiendi dæmonibus tribuat: ita docet posse angelos etiam malos naturali sua virtute ignem ex superiori aeris regione demittere; posse item vehementissimos ventos concitare, quibus maxima hominibus damna inferantur. Sed redeamus ad magos Ægypti: demus ipsos serpentes aliquot præparasse antea, & in sinu absconditos tenuisse; quomodo aquam fluminis in sanguinem convertere? Quomodo item tantum ranarum numerum & brevissimum intra tempus colligere, & occultare, & tanta dexteritate, ut Pharaonis præsentis oculos laterent, in omnem circa regionem dispergere? Cur deinde non ea quoque ratione sciniphes educere potuerunt (a)? Cur denique cognita sua imbecillitate statim potentiam summi Numinis professi sunt: *digitus Dei est hic* (b)? Audiamus rursus celeberrimum Moshemium (c). „ Si astu egissent omnia Magi, Moyfes & sibi, & causæ, quam tuebatur, Dei haud „ melius consulere potuisset, quam si fraudulentis, & callidis hominibus istis speciem „ suam detraxisset, arcanaque eorum scelera, „ & flagitia Pharaoni, Ægyptiisque omnibus „ aperuisset. Ita omnis cecidisset hujus generis auctoritas; Ægyptus perspectis magorum „ fraudibus nec religionem amplius, nec rem „ publicam tam sceleratæ credidisset familiæ, „ novis denique, & sæpius repetitis miraculis „ ad flectendam Pharaonis mentem haud for-

„ tassis

Exod.

c. 7. v. 22

c. 8. v. 7.

(a). Ib.

v. 13.

(b) Ibid.

v. 19.

(c) In

Cuduv.

c. 5. f. 1.

§. 86. p.

371.

„tassis opus fuisset. Hoc ergo cum minime
 „Dei hic legatus fecerit, sed multitudine
 „miraculorum potius regis animum expugna-
 „verit, effici hinc posse putem, non tam
 „dolis, quam auxilio dæmonum armatos ad
 „certamen cum Moyse magos processisse. —
 „— Ipsa deinde magorum miracula non sunt
 „talía, ut leges naturæ evertant, aut commo-
 „de a genio quodam fieri nequant. — —
 „Adstiterunt meo iudicio dæmones quidam
 „his hominibus, & sublati repente baculis
 „serpentes, quorum ingens erat in Ægypto
 „copia, in medium projecerunt. „Prætereo
 „alia eruditissimi huius auctoris, quæ huc quam
 „maxime facerent: ut cum solidissime ostendit
 „verba Servatoris nostri: *surgent enim pseudo-*
 „*christi, & pseudopropheta, & dabunt signa*
 „*magna, & prodigia ita, ut in errorem indu-*
 „*cantur, si fieri potest, etiam electi*: unice de
 „fraudibus, & dolis intelligi non posse; neque
 „enim, quod præcipue urget, gratia, & ele-
 „ctio; sed ratio potius, & intellectus ad dete-
 „gendos dolos requiritur, quæ in reprobis quo-
 „que dari possunt. Tum & illud S. Pauli de
 „Antichristo loquentis: *cujus est adventus se-*
 „*cundum operationem satana in omni virtute,*
 „*& signis, & prodigiis mendacibus*, ubi verba
 „illa *secundum operationem Satana* κατ' ἐπεψείαν
 „*τε satana* oppositam interpretationem prorsus
 „excludunt. Similiter hæc duo evincit; primum
 „absurde, & periculose ad morbos tantum cor-
 „porum, eorumque curationes detorqueri, quæ
 „in libris novi fœderis de dæmonibus hominum
 „corpora obsidentibus, eorumque electione refe-
 „runtur. Alterum: eam opinionem rationibus
 „non destitui, nec falsitatis aperte argui posse,
 „quæ docet dæmones oraculorum quorundam
 „apud veteres auctores fuisse. Sed & istud in
 „causæ suæ patrociniū adducunt, qui vim ef-
 „ficien-

Loc. cit.
 p. 869.
 Math. 6.
 24. v. 24.

2. Thess.
 c. 2. v. 9.

l. cit. 5.
 83. not. 2.

Th. 5. 82.
 not. 5.

ficiendi mirabilia spiritibus indulgent, quod
 adversæ partis patroni in explicandis id genus
 eventibus ad præstigias, & illusiones dæmonis
 sapius recurrant. Nec ipse doctissimus Cau-
 zius ab ea responsione alienus videtur, cum
 ait: „ Separandæ omnino ab hac quæstione
 „ sunt tentationes & illusiones diaboli, de-
 „ tentationes in erroribus idololatricis, quin in-
 „ mo tempore adventus Christi, & post eum
 „ ad demonstrandum in omnes spiritus domi-
 „ natum a divino numine admittæ obfessiones
 „ dæmonicæ. „ Et rursus: „ Quid igitur
 „ de dæmonis potestate dicemus? Possumus
 „ admittere illusiones ab eo factas idolola-
 „ cum S. Athanasio. „ Jam vero hac ratio-
 „ ne satis stabiliri putant commercium quoddam
 dæmonis cum hominibus: quid enim? Quæ-
 runt, si dæmon tentet; si illudat; si in ido-
 lolatria homines detineat, an non vi sua na-
 turali quædam efficere poterit, quæ nobis mi-
 rabilia videantur? Istud vero qui admiserit
 nullas prorsus operationes, quas dicunt magi-
 cas, a dæmone nostra quoque ætate edi posse
 difficillime conficiet. Deinde quid illæ dæmo-
 num præstigiæ, ac illusiones sonant? Duplici
 illæ modo tantum intelligi possunt, ut docet
 Clericus; „ A quibusdam ita intelliguntur,
 „ quasi cacodæmones, quod nusquam est, qua-
 „ si esset, sensibus objiciant, ut domus v. g.
 „ ibi videatur esse, ubi nulla est. Sed ut hoc
 „ fiat, aut cerebrum spectantium movent, ut
 „ solet moveri, quando obversatur domus,
 „ aut in ære domus speciem quædam, quæ
 „ oculos spectantium percellat, exstruunt. —
 „ Præstigiæ ab aliis dicuntur artes quædam in-
 „ sola dexteritate, & celeritate sitæ, quales
 „ sunt agyrtarum, qui manuum dexteritate,
 „ & motu celerrimo portenta quædam vulgo
 „ edere videntur. „ Quidquid igitur præsti-
 gia-

*De cult.
 mag. l. 1.
 c. 5. §.
 180.*

Id. §. 186.

*Encum.
 l. 2. c. 4.
 no. 11.*

giarum nomine ipsis veniat, veram aliquam actionem, quam aperte negant, occulte dæmonibus attribuunt.

Venio ad alteram opinionem, quam eorum esse Moshemius ait, qui sapientia ceteris præstare sibi vult: hi omnia generatim, ac sine discrimine in vulgi commentis reponunt, quæcumque de miris geniorum operationibus in historiarum monumentis referuntur. Defendunt hanc sententiam præ reliquis Samuel V. Verenfelsius (a), Joann. Alphonsus Turretinus (b), Arnoldus Noltenius edita singulari dissertatione Francofurti ad Viadrum anno 1718. Jacobus Serces; tum Scipio Masseus (c), Ferdinandus Sterzingerus (d) Academiæ Boicæ Socius, Ardoino dell' Osa (e) vero nomine P. Jordanus Simon ordinis S. Augustini, & sæpius jam laudatus a me Cauzius, alique. Omnes hi in præcipui argumenti loco fraudes innumeras, quas hac in re contigisse certum est, fusa oratione persequuntur. Verum his illud opponi potest, quod Moshemius (f) de veterum oraculis in Cudvorthum adnotavit. „ Si „ vel sexcenta docuero oracula hominum cal- „ liditate, atque dolis esse edita, haud tamen „ id argumento esse poterit reliqua oracula „ ejusdem esse generis, nisi antea luculentis „ planum faciam rationibus, fieri nullo modo „ posse, ut dæmones vel per ministros suos, „ vel alio modo de rebus futuris homines eru- „ diant. „ Nec omnino credibile est dæmonem numquam se immiscuisse in supersticiosos, & magicos veterum ritus, cum tamen ipsum eorum cultum sibi vindicasse, & gentes in idololatria detinuisse Cauzius ipse cum aliis profiteatur. Addunt deinde impletionem desiderii hominis impii non posse esse rationem sufficientem, ut Deus permittat dæmonem quidpiam homini præstare; quin pugnare cum Dei

(a) Diss.
de m. v.

(b) Diss.
de veri.
rel. chris.

(c) Ars
mag. in
nib. rea-
dast.

(d) Be-
trugens-
de Zau-
hores.

(e) Nich-
sigkeit
der Heo-

xerey,
und
Zauber-
kunst.

(f) Syst.
intell. co-
s. f. 1. 9.
39. n. 50.

pro-

providentia, & bonitate videtur, ut ipse totum fere genus humanum fraudibus diabolicis ita decipi sinat. At non ejus desiderii implementationem, reponunt alii, esse ejus rei rationem sufficientem; sed Deum alios posse habere fines suis perfectionibus congruentissimos, cur interdum admittat, ut impio hominis desiderio per quoddam dæmonis servitium satisfiat; neque id infinitæ ejus bonitati officere, quemadmodum non officit, quod maximam generis humani partem detineri in idololatria a dæmone passus sit; immo si divinæ bonitati adversum non sit, admittere, ut homines per homines, ariolos nimirum, magos, & sacrificulos turpissimis modis decipiantur, & in absurdos plane errores inducantur, cur eidem repugnet, ut homines dæmonum præstigiis aliquando deludantur? Dedit nempe Conditor optimus hominibus rationem, quæ, ut ipsorum opinione dolis hominum detegendis par est; ita quoque ad geniorum malorum illusiones discernendas sufficere potest. Ajunt denique dæmonophobiam, quæ necessario ex hac doctrina profuit, obesse religioni, veramque in Deum fiduciam ex mortalium animis delere. Verum alii fiduciam hanc inde augmentum potius accipere contendunt; quemadmodum qui se a dæmone continue tentari posse norunt, non propterea spem, ac fiduciam in Deum abjiciunt; sed eo magis eam amplificant, quo magis inde egestatem suam, ac divini auxilii necessitatem agnoscunt. Quod si quis derelicto Deo ad dæmonum opem confugiat, id uni ejus impietati tribuendum erit, ut, qui contemptis divinis instinctibus tentationi consensum præbet, culpam sibi soli adscribat, necesse est. Sed de his fortasse satis: videatur quoque auctor, qui ignorari voluit.

Vorgänger
giger
Versuch
zu Er-
vuir.
kung ei-
nes Ver-
trangs
zuvi-
schen
den in
dem bis-
herigen
Hexen-
kriege
Kri-
ege ver-
wickel-
ten Ge-
lehrte.

CAPUT III.

De Criteriis veri Miraculi.

XCVII. *Criteria* miraculi eæ sunt notæ, ^{Quæ} seu characteres, per quos miraculum verum, ^{criteria} & proprie tale ab effectu solum mirabili, & ^{miracu-} speciem aliquam miraculi præ se ferentes certitudine morali discerni potest. Horum notitiam accuratam sibi comparet philosophus, necesse est, nisi cum rudi plebecula in plurimos errores præcipitari velit.

SCHOL. At vero hic opus, hic labor; etsi enim effectus miraculosus per id, quod supernaturalis sit, in abstracto facillime a quovis alio dignoscatur: difficillimum tamen est, in casu quovis individuo certum ea de re iudicium ferre. Habet hic vetus illud Epicharmi locum: *nervos esse sapientia nihil temere credere*. Quod ad has notas generatim attinet, ^{In Cud-} non sentio cum Moshemio, qui eas rudissimo- ^{uvor. c.} rum quorumque captui accommodatas esse o- ^{5. f. 1. 9.} ^{86. not. 1} portere contendit; præterquam enim quod insignis rerum physicarum peritia, quæ in vulgus non cadit, omnium consensione requiritur, rudes muneri suo satisfaciunt, si sese doctioram, ac suorum præsertim pastorum iudicio submittant.

XCVIII. Effectus mirabilis, de quo, num & quomodo in miraculis habendus sit, quæritur, potest tripliciter vel 1.) reapse non exstare, sed incertis solum vulgi-rumoribus confictus esse; vel 2.) provenire a causis materialibus, quarum vires naturali quidem, sed insolito, ac nobis igno-

ignoto modo in casu quodam singulari compositæ effectum mirum, & extraordinarium producant; vel 3.) effici a circumscriptore quodam occultis fraudibus, dolis, ac iis artibus, quæ a dexteritate manuum, agilitate corporis, aliisque similibus fallaciis pendent, utente; vel 4.) a veteratore dæmonum ope adjuto, seu ab ipsa naturali malorum geniorum vi, & efficacitate; vel 5.) ab homine pio auxilium ferente angelo bono, sive reapse a vi naturali boni genii secundum leges sibi a Deo præstitutas agente; vel denique 6.) a Deo ipso ut causa principali, seu cum, seu absque causa ministeriali, operante; & in hoc ultimo solum causa vera miraculi ratio adest (§. 96.): ut igitur de veritate miraculi moraliter certo pronuncietur, necesse est, ut diversa præsto sint indicia, per quæ illud primum a vulgi fabulis, tum ab effectu naturali, & causarum materialium, & fraudulentorum hominum, & spirituum quorumcumque eadem certitudine dijudicetur.

SCHOL. Argumenti dignitas postulat, ut hæc indicia fusiori oratione persequamur.

R. Eventum contigisse nisi usu sensuum, aut auctoritate constare non potest: quare cum ea de re questio instituitur, leges criticæ, quas de utroque in logica (p. 2. c. 5. 6. & p. 3. c. 4.) copiose suppeditavi, in subsidium vocandæ sunt. Hac ratione certi redimur, evenisse omnino ea facta, quæ de Moyse Hebræorum duce; Christo Salvatore nostro, ejusque Apostolis in sacris litteris referuntur; tum & ea, quæ a testibus cœvis, & oculatis SS. Augustino, Ambrosio, Hieronymo, aliisque narrantur; neque in dubium vocari possunt nisi ab eo, qui omnem fidem humanam abjecerit. Ex eodem vero capite explodimus

At-

Quomodo verum miraculum discernitur ab effectu fabuloso?

Acti Navii prodigium, qui inspectante Tarquinio, ac populo romano cotem novacula discidisse perhibetur: nullo enim idoneo teste nititur, ut vel ex ipsa Livii narratione patet, quin risum fuisse, & in fabulas relatum ex Tullio manifestum est. „ Nec pos-

sum, ita ille, Attii Navii, quem comme-

morabas, lituum contemnere. Sed qui ista

intellecta sunt, a philosophis debeo disce-

re, præsertim cum pluribus de rebus isti

divini mentiantur. „ Et rursus: „ Omit-

te igitur lituum Romuli, quem in maximo

incendio negas potuisse comburi: contemne-

cotem Attii Navii: nihil debet esse in phi-

losophia commentitiis fabellis loci. „ Ita

quoque fide minime digna censemus facta quæ-

dam prorsus stupenda, quæ Philostratus A-

pollonio Tyanæo tribuit. nam auctores æqua-

les de iis filuerunt, & Philostrati librum fa-

bulis, mendaciis, erroribus geographicis, con-

tradictionibus, & iis, quæ certis historiæ ro-

manæ monumentis contraria sunt, scatere de-

monstrarunt Eusebius Cæsarensis (a), Pho-

tius (b), Scaliger (c), Baronius (d), Hue-

tius (e).

.) Miraculum discerni debet ab effectu mirabi-

li, qui a viribus causarum materialium info-

lito modo concurrentibus interdum produci-

tur: ut cum mula Reate peperit, aut Thea-

ni Sidicini puer cum quatuor manibus, & to-

tidem pedibus natus est, qualia velut verifi-

sima prodigia laboriose olim Julius Obsequens

collegit. Hic vero opus est egregia rerum na-

turalium peritia, qua quia vulgus destituitur,

plurima in miraculis numerat, quæ talia ne-

quaquam sunt. Physicæ igitur diligentem na-

vent operam, causasque naturales, constan-

tes motuum leges, ac totius, qua cognosci

potest, naturæ ordinem perscrutentur, neces-

se

De nat.

D. l. 3.

c. 6.

De div.

l. 2. c. 38.

(a) L.

adv.

Hierocl.

(b) Bibl.

cod. 44.

(c) In

Euse-

biani.

(d) An-

nal. t. 1.

an. 78.

(e) De-

mon. E-

vangel.

prop. 9.

Ab effe-

ctu mi-

rabili, &

naturali

substan-

tiarum

mate-

rialium?

Prodig.

lib. im-

perf.

se est , quibus de miraculis sententiam ferre incumbit . Neque tamen , quod supra monui (§. 95. schol. 2. n. 5.) , omnia sine discrimine in dubium vocanda sunt ea solum de causa , quod omnes naturæ vires , earumque efficacia a nobis cognosci haud potest ; ut enim multa nos lateant , scimus certo non esse eam in saliva eum pulvere commixta vim ; ut oculos cæci nati continuo aperiat ; scimus certo eam inveteratorum morborum esse naturam , ut non subito , & uno prope momento , pronunciatis quibusdam vocabulis , formato crucis signo , aut solo vocis imperio prorsus tollantur , viresque amissæ redeant . Quare effectus non duntaxat secundum suum *esse physicum* considerandus est , quod studiose monet auctor anonymus (a) , & multis probat Hollmanus in commentatione philosophica de miraculis , & genuinis eorum Criteriis , cujus epitome actis lipsiensibus (b) inserta est ; sed ad id multo maxime animus adverti debet , utrum in his adjunctis , in quibus effectus producitur , vis quædam naturalis operetur , quæ si tum abesse deprehendatur , nihil obesse potest , quod vis ejusmodi ceteroquin ad eum effectum sufficiens in tota natura æstet . Atque istud quemadmodum in difficillimorum morborum curationibus a Christo Domino adhibitis certissime ; ita in illis , quibus sibi Apollonius tantam apud rudissimam plebeculam famam concitavit , minime obtinuit ; fuerat nempe circumscriptor ille egregia pro illorum temporum ratione scientiæ medicæ cognitione imbutus , quod studium sectæ pythagoricæ , in qua ipse nomen profitebatur , imprimis proprium fuisse Jamblychus testatum reliquit ; nec nullas ea in arte progressiones fecerat , cum maximam adolescentiæ partem in celebr.

(a) *Traité des
miracl.
p. 1. c. 3.
& 18.
(b) Ad
ann.
1728.
pag. 28.*

*Vit. Py-
thagora
c. 19.
& 34.*

berrimo ad Ægas Æsculapii fano transegit; ejus sacerdotibus familiarissime usus, quos medicæ admodum peritos fuisse vel ex eo colligi potest, quod omnis ejus idoli cultus, ac religio in diverforum morborum curationibus constiterit: vid. Arnobius (a), item Lucianus in Philopseude (b). Hoc porro adjumento instructus eas orientis regiones peragravit, in quibus ob ingentem medicorum penuriam in Diis numerabantur, qui corpore ægris aliqua ratione mederi scirent: quare mirum non est, Apollonium factis quibusdam curationibus tantam in rudibus, ac superstitionis animis commotionem effecisse, ut alter Æsculapius, vel Chiron haberetur. Magistrum hunc suum egregio secutus est Alexander quidam, quem similibus fraudibus ignorantem plebi illuisse auctor est Lucianus in Pseudomanti. Huc quoque pertinent morborum sanationes in Æsculapii templo ab ipso Deo, si mendacibus sacrificulis fides habenda foret, reapse ab illis ipsis per medicamenta naturalia occulte applicata procurata. Quemadmodum demonstravit Origenes adversus Celsum, & ex laudata Luciani Philopseude patet, cujus hæc sunt verba: „ Æsculapius, ejusque posterum salutaria phar- „ maca admoventes medebantur. „ Consultatur quoque Moshemius (c). Quamvis alias pretio quoque conduxerint, qui se Æsculapii opite sanatos publice mentirentur; quam ob rem Aristophanes (d) servulum, cui nomen Carion, has sacerdotum Æsculapii fraudes jocosè exagitantem in scenam induxit.

1.) Necessè quoque aliquando est, ut miraculum a consuetis circumscriptorum fraudibus, & dolosis artibus discernatur; quo quidem ipsa hæc, quæ nunc de Apollonio, Alexandro,

(a) *Cont. gen. L. I.*
(b) *Opp. t. 2. p. 333.*

Opp. t. I. p. 750.

L. 3. p. 124.

(c) *In Cuduv. c. 5. f. 1. §. 84.*
not. 2.

(d) *Pluto æt. 5. v. 555.*

Ab effectu naturali circumscriptoris

dro, & Æsculapii sacerdotibus commemorati, aliqua ratione pertinent; sed fuisse etiam alia, quæ huc proprie referuntur, ab Apollonio patrata dubitari vix potest; quod illud est, quo populo atheniensi imposuisset se in foro dæmoniacum ab infesto hoste, qui in ejus rei signum statuam in portu regio dejecerit, liberatum fuisse. Hujus generis quoque sunt miracula, quæ olim de Vespasiano, & Adriano Imperatoribus in vulgus sparsa sunt; ferebatur Vespasianus oris sputo cæcum, & impulsione pedis manu curatum curasse: ac dudum viri doctissimi Daniel Huetius (a), Baronius (b), Bellarminus (c), alique demonstrarunt, eas sanationes ab occultis Ægyptiorum sacerdotum Serapidis, inter quos Alexandriæ res acta est fraudibus profectas, morbosque eos ab hominibus pretio corruptis simulatos fuisse. Vespasianus nimirum elatus adulationibus Flavii Josephi, qui ipsum promissum divinis oraculis Messiam assentatorie proclamabat, & solii firmandi cupiditate adductus, id non alia meliori ratione apud populum superstitionibus, ac Serapidis præsertim cultui addictissimum se obtenturum speravit. Videatur Moshemius. Neque etiam prætereundum: duos præcipuos horum mirabilium scriptores Tacitum, & Suetonium in iis enarrandis inter se non consentire; quod enim alter de manu, hic de crure refert. „Alexandriæ, scribit Tacitus, quemquam cæcum monitum a Deo, Serapide ad Vespasianum venisse, & rogasse. — Alius manu æger eodem Deo auctore, ut pede, ac vestigio Cæsaris curaretur, orabat. „Suetonius contra: „plebe quidam luminibus orbatus: item „lius debili crure sedentem pro tribunali peroriter adierunt, orantes opem valetudinis, de-

(a) *De mon. Evan. cl. prop. 9. n. 6.*

(b) *Ad ann. 71. n. 6. & ann. 119. n. 2.*

(c) *De not. Ecc. c. 14.*

In Cudworth. c. 4. §. 15. not. 12.

Hist. l. 4.

Vita Vespasiani.

„ demonstratam a Serapide per quietem re-
 „ stitutum oculos , si inspiciisset : confirma-
 „ turum cras , si dignaretur calce contingere . „
 „ Inde vero patet , auctores hos nimium incertis vulgi rumoribus tribuisse , neque adeo ipsorum narrationes semper fide dignas esse . At jam quid in id genus eventibus dijudicandis subsidii adhibebimus ? Præter accuratissimum omnium adjunctorum examen vix quidpiam certi præscribi posse videtur ; nonnumquam fraudes sunt patentiores , quæ a quovis non plane obtusæ aciei ingenio detegi possunt ; alias magis occultantur ; sed & tum vigilans in singula attentio nebulas dissipabit . Quodsi tamen aliquando dubium remaneat , id facile tolletur , si sedulo observentur ea , quæ mox dicam .

- 4.) Ut miraculum a naturalibus malorum geniorum operationibus , quas ipsi Deo permitte-
 „ nte nonnumquam exercent , acute distinguatur , varii varia præcipiunt . S. Thomas ex
 „ S. Augustino docet miracula a dæmonum præstigiis differre potissimum efficacia , du-
 „ ratione , utilitate , modo , ac fine . Holl-
 „ manus in supra laudata commentatione jubet
 „ animum converti ad contemplanda adjuncta
 „ personæ , quæ effectum admiratione dignum
 „ producit ; tum ad susceptæ actionis prima-
 „ rium , ac ultimum finem . „ Supponere li-
 „ cet , ita ille : miracula omnia a quacum-
 „ „ que demum causâ ministeriali profiscian-
 „ „ tur , ita manifeste esse comparata , ut ju-
 „ „ dicio omnium , qui vires humanas intelli-
 „ „ gunt , easdem superent , ut adeo eadem
 „ „ non nisi alius cujusdam invisibilis causæ
 „ „ concursu fieri posse omnes facile judica-
 „ „ re queant ; duo autem modo hic sunt causæ
 „ „ farum genera , ad quæ duce revelatione re-
 „ „ ci-

Ab effe-
 ctu na-
 turali
 dæmo-
 num?

§. 21. 22.

„ cipere nos possumus , Deus , & qui illi
 „ inserviunt boni angeli , diabolus , & da-
 „ mones , ex quorum numero alterutrum cer-
 „ te ad miraculosi (vel mirabilis) effectus
 „ productionem concurrere oportet , cum ter-
 „ tium quid neque ratio , neque revelatio
 „ præter hos ipsos agnoscatur . Qualis autem
 „ causæ homo , qui effectum viribus suis ma-
 „ jorem producit , usus fuerit opera , Dei
 „ ne , an diaboli , id ex circumstantiis per-
 „ sonarum , ut & fine , & scopo actionis di-
 „ judicandum est . Etenim si homo sit , de
 „ cujus erga Deum pietate aperte constet ,
 „ hicque , quantum ex ejus actionibus reli-
 „ quis cognoscere licet , honeste , & pie vi-
 „ vat , atque a fraude , dolo , fallaciaque
 „ liber sit : de eo jam maxime est proba-
 „ bile , eum solius Dei ope adjutum esse
 „ tum illum producere . Si vero accedat , il-
 „ lum actionibus suis nihil amplificandam
 „ Dei gloriam , & promovendum ejusdem
 „ inter homines cultum querere , ipsum nec
 „ honorem proprium , nec divitias , fortu-
 „ nasque alias , aut alia tantum ejusmodi se-
 „ curari ; sed unice agere , ut homo magis ,
 „ magisque ad Deum agnoscendum , prædi-
 „ candum , colendumque adducatur ; eum
 „ etiam in finem , quidquid faciat , suscipe-
 „ re , ut doctrinam de Deo traditam ma-
 „ gis , magisque eo ipso confirmet : tum ve-
 „ ro quin talis ipsius Dei adjutus opera a-
 „ gat , nullum omnino amplius est dubium .
 „ imprimis autem sedulo hic attendendum
 „ est , num tales ejusmodi homo de Deo fo-
 „ veat doctrinas , quas jam ipsa sibi relicta
 „ ratio impias , atque profanas esse intelli-
 „ git ; an vero ea de eodem , ejusque volun-
 „ tate tradat , quibus in agnita veritate natu-
 „ rali magis , magisque confirmemur , dese-
 „ ctus

et, etiam rationis suppleantur, & perficiantur. Hæc Hollmannus; quæ denique doctrina eo redit: verum miraculum ab effectu demonum naturali certissime dignosci, si operans, operandi modus, finis, quibus addi potest, multitudo talium effectuum in accuratissimum examen vocentur. Sed sunt hæc paullo uberius enucleanda: Examinandus igitur est.

Operans; Duplex præsentē in casu questio oritur, una *juris*: utrum demon vi sufficiente ad effectum hunc mirabilem edendum polleat; altera *facti*: utrum reipsa demon illud effecerit. Priori penitus satisfacere nequimus, nisi tum, cum evidens est, veram legum naturæ universalium mutationem, quæ ad solum Deum pertinet (§. 96. schol. 1.), factam fuisse. Posteriores ut definiamus, in vitam, mores, aliasque hominis, qui effectum mirabilem patrasse videtur, qualitates oculorum, mentisque aciem intendimus, atque in his præter commemoratas ab Hollmano insignem quandam animi demissionem, quæ solæ pietatis fundamentum est, jure requirimus; fuit enim nullo non tempore proprius hic character omnibus illis, quos a Deo hoc dono condecoratos novimus, ut in Moysæ, Eliæ, Jeremia, aliisque patuit. Animi contra-elatio, ac superba præsumptio si dem miraculo detrahit. Postulat equidem aliorum quandoque bonum, ut dona sibi a benignissimo Numine concessa manifestentur; verum patefactionem eam verecundus quidam timor, ac modesta animi submissio comitetur, oportet: facta sua magnifice prædicare; se ipsam admirandum populo insolenter offerre; effectum miraculorum palam affectare; diem, horamque edendi prodigii cum ja-

statione designate, certa sunt indicia, quibus servus diaboli a Dei famulo, Apollonius a Christo dignoscitur. Hoc potissimum argumento usus est Origenes, cum adversus Celsum veritatem miraculorum Christi propugnavit; hocque utendum esse in demonstranda vanitate miraculorum, quibus superstitiosa antiquitas se extulit, docet Eusebius Cæsareensis.

*Dem. Evangel.
l. 3. c. 3.*

Operandi modus. Huc imprimis referuntur ipsa operis adjuncta, quæ si ridicula, puerilia, inhonesta, obscæna, & ad crudelitatem conformata sint, operationem dæmonis manifeste loquuntur; hæc enim omnia divinam majestatem haud quaquam decent: ita paganorum sacrificia, oracula, facataque prodigia fere semper cum turpissimis actibus consociabantur; ad crudelitatem pertinebant incisiones illæ sacrificulorum in proprio corpore novaculis effectæ, prolium per ignem translationes, ac immolationes humano sanguine scdare. Refertur deinde locus, in quo effectus patratur, in sano Æsculapii, aut Serapidis nequeunt nisi simulacra, aut præstigiola, & occulta dæmonum ope membrorum curationes adhiberi; ac in templo veri Dei, ad sepulchrum, aut imaginem alicujus sancti, sua hominibus obsequia malus genius deferre non solet. Referuntur denique subsidia, ac instrumenta, quorum ope effectus mirabilis obtinetur; in his præcipue videndum, an a Deo, vel natura eo ordinentur? an eorum usus lege seu ecclesiastica, seu civili jubeatur, vetetur, aut permittatur? an ad pietatem augendam, Deique cultum promovendum idonea sint?

Finitis. ad quem effectus mirabilis, qui in questione vertitur, natura sua tendit, vel saltem

rem spectatis omnibus adjunctis tendere, prudenter existimandus est. Hac in re extra controversiam ponitur, verum miraculum semper ultimo ad amplificandam Dei gloriam; proxime autem vel ad doctrinam quampiam confirmandam, vel ad demonstrandam alicujus sanctitatem, vel ad patefaciendam quamdam perfectionem divinam, vel ad beneficium homini conferendum, vel denique ad Dei cultum, & virtutis exercitium, in spectatoribus promovendum collineare. Si igitur quis effectum mirabilem ad propriam suam gloriam, ad utilitatem & commodum dirigat; si per illum lucrum temporarium quaerat; si illo ad morum corruptionem, ad fovendas doctrinas impias abutatur, sine mora ex miraculorum numero expungendus erit. Inde omnia veterum paganorum miracula vel solo hoc titulo rejicienda sunt, quod ad polytheismum, rationi naturali, atque repugnantem, & turpissimam idololatriæ superstitionem corroborandam collineaverint. Atque character hic, qui a doctrina sive illa, qua effector miraculi imbutus est, sive illa, ad quam confirmandam effectus miraculi speciem referens tendit, petitur, est hoc loco omnino præcipuus, quod miracula tum a Christo, tum ab Apostolis, eorumque successoribus perpetrata expendenti obscurum esse non potest. Ipse olim Dominus populo suo hanc regulam constituit: „Si surrexerit in
 „medio tui propheta, aut qui somnium vi- *Deut. c.*
 „disse se dicat, & prædixerit signum, atque *13. v. 1.*
 „portentum. Et evenierit, quod locutus est, *2. 3.*
 „& dixerit tibi: eamus, & sequamur Deos
 „alienos, quos ignoras, & serviamus eis:
 „non audias verba prophetæ illius, aut som-
 „niatoris. „

Quod si itaque doctrina ea aperte cum ratio-

*Pensées
philos.
pens. 42.*

ne, morum honestate, aut alia quapiam veritate per revelationem cognita pugnet, nulla potest miraculo fides haberi; ubi contra maximum veritati pondus accedit, si illa in se honesta sit, rationique congrua, etsi naturales hujus vires exsuperet; neque tum ob-erit, quod ea religioni in illa provincia, in qua miraculum patrat, dominantī opponatur, quemadmodum imperite, ut non dicam, impie aliqui contendunt. Sane si istud ita se haberet, numquam Idololatrarū miraculis eorum, qui veram ipsis religionem annuntiarent, ad christiana sacra amplectenda per-moveri debuissent, quod quam impie dictum sit, nemo non videt. At in vitium circuli nos incurrere ajunt nonnulli, ut qui per doctrinam miraculi veritatem, & per hanc illam demonstramus; his quidem respondere non est difficile. Doctrina confirmatur per miraculum, non vicissim; sed necesse utique est, ut doctrina antea ejus sit naturæ, quæ confirmationem a miraculis admittat, id est, ut possit esse vera; sique sit, tum miracula ipsam certo veram commonstrabunt. Non igitur requiritur, ut prius cognoscamus, aut ponamus doctrinam esse veram, quæ certi simus de veritate miraculi; requiritur tamen, ut prius nobis appareat possibile esse, ut doctrina vera sit, & nequeunt miracula ejus veritatem comprobare nisi præstabilita, & præcognita hac possibilitate: verbo ex possibilitate, vel probabilitate doctrinæ veritatem miraculi, & ex veritate miraculi veritatem doctrinæ idijudicamus. Sunt nempe doctrinæ quædam manifesto falsæ: ut polytheismus, & quæcumque sive rationi, si-ve revelationi clare opponuntur, quarum veritatem nulla umquam miracula comproba-bant: sunt quoque doctrinæ evidenter ve-

hæ, quæ se ipsas quodam modo demonstrant,
 quales multæ in jure naturæ reperiuntur :
 hæ miraculis non egent, neque ab ipsis ma-
 jorem evidentiam, nisi forte comparate ad ru-
 diiores, obtinere possunt; sunt denique do-
 ctrinæ ex natura sua indifferentes, ac vel so-
 lum possibiles, vel vero probabiles etiam;
 atque his miracula pondus addunt, nobisque
 certam illarum veritatem patefaciunt. Ita ino-
 ralis Christi doctrina nobis magna ex par-
 te evidens est, fuissetque talis, tametsi nul-
 la accessissent miracula; reliquæ ejus doctri-
 næ pars clare ad Dei gloriam, & ad consta-
 biliendam inter homines virtutem tendebat :
 quam ob rem non modo possibilis, sed &
 quam maxime probabilis apparebat; at ut
 summa haberetur de ejus veritate certitudo,
 miraculis confirmanda erat. Verum omnia
 Servatoris prodigia in irritum cecidissent, si
 vel una doctrinæ ab eo traditæ pars clare re-
 pugnans, aut quocumque modo aperte a ve-
 ritate aberrasset. Ita fere hunc nodum Clar-
 kius solvit.

*Traité
 de l'ex-
 ist. &
 des at-
 trib. de
 Dieu, t.
 3. c. 6.*

Multitudo; effectus nimirum mirabiles, qui fre-
 quentissime, & fere continenter eduntur, di-
 vine originis esse dubitari non potest; con-
 tinuam enim repetitionem eorum, quibus ho-
 mines etiam ex rationis præscripto judi-
 cium ferentes in errorem induci possent, ad-
 mittere cum infinita Dei bonitate, & provi-
 dentia minime congruit. Inde magi in Æ-
 gypto portenta sua præstigiola, quæ veris
 Moysis miraculis opposuerunt, diu continuare
 nequiverunt; ubi contra a Moyse, Christo,
 Apostolis, eorumque successoribus prodigia &
 plurima, & continenter, & longo tempore
 edita sunt. „ Sane, ut scribit Genuensis,
 „ numquam falsa miracula in falsæ doctrinæ
 „ probationem facta, & quidem conti-

5, nenter, ac perpetuo facta legas, ut in eo-
 rum suspicionem homines venire numquam
 6, potuerint. Providentiæ enim divinæ illud
 7, est, quod enunciat Cicero: commenta de-
 8, let dies. 9,

Ab effe-
 ctu na-
 turali
 angeli?

5.) Verum denique miraculum discernendum est
 ab effectu mirabili, quem bonus angelus viri-
 bus suis naturalibus, & secundum leges sibi a
 Conditore suo præstitutas agens aliquando
 producere potest. At vero id certo definire
 omnino difficillimum; ignoramus enim, quid
 vires angelorum naturales valeant, quid ferre
 recusent; ignoramus, quæ ipsis leges constitu-
 1æ sint. Id tamen dubio caret, non posse ip-
 sos vi sua naturali quidpiam contra generales
 naturæ universæ leges moliri, ac eas præci-
 pue, a quibus omnis hominum prudentia, con-
 siliumque pendet,


Quod ad miracula Christi Domini attinet, ea
 fuisse opera vere divina certi sumus propte-
 rea, quod ipse iis ad comprobendam suam di-
 vinitatem usus, & semet eadem efficere clare
 testatus est. Hæc porro difficultas non magno
 est opere curanda; si modo morali certitudi-
 ne constet, nihil cum malo genio negotii in-
 tercedere; angelus enim, seu vi sua naturali
 ut causa principalis, seu ex speciali Dei jus-
 sione ut causa ministerialis agat, nobis mi-
 nime imponet. Quare si quando simili in ca-
 su falsum formaretur iudicium, & effectus ab
 angelo naturaliter productus in miraculis habe-
 retur, nullum eo ex errore damnum, aut in-
 commodum vel contra cultum Dei, vel con-
 tra morum honestatem, sanamque doctrinam,
 vel contra externum reipublicæ sive sacræ, si-
 ve profanæ statum enasceretur. Atque inde
 ipsa Ecclesia, cum de aliquo in Sanctorum nu-
 merum referendo agitur, miracula, de qui-
 bus id genus unum oriri posset, tamen in lo-
 cum

cum legitimæ probationis admittit, quod
 S. P. Benedictus XIV. testatur. Sed satis de
 his. Porro quæ adhuc de mundo, ac effe- *De Ca-*
 ctis tam naturalibus, quam supernaturalibus *nov. S.S.*
 differui, eo pertinent, ut supremi omnium *l. 4. p. 1.*
 Conditoris gloria magis semper, ac magis am- *c. 6 n. 11*
 plificetur.



Finis Cosmologiæ.





CONSPECTUS COSMOLOGIÆ.

Prolegomenon in Cosmologiam .

Pag. 3

SECTIO I.

De Mundi Existentia.

CAPUT I.	<i>De Notione Mundi Generatim .</i>	5
CAPUT II.	<i>De Existentia , & Origine Mundi .</i>	10
CAPUT III.	<i>De Fato .</i>	41
CAPUT IV.	<i>De Corporibus , eorumque E- lementis .</i>	63
CAPUT V.	<i>De Compenetratione , & Re- plicatione Corporum .</i>	86

SECTIO II.

De Perfectione Mundi.

CAPUT I.	<i>De Fine Dei Mundum Cre- antis .</i>	110
CAPUT II.	<i>De Mundo suo in genere Per- fecto .</i>	118
CAPUT III.	<i>De Mundo omnium Possibilium Optimo .</i>	126

SE-

SECTIO III.

De Effectibus Naturalibus, & Supernaturalibus.

- CAPUT I. De Natura, ejusque Legibus. 147
- CAPUT II. De Effectibus Supernaturalibus, ac nominatim de Miraculis. 159
- CAPUT III. De Criteriis veri Miraculi. 185



NOI RIFORMATORI

Dello Studio di Padova.

A Vendo veduto per la Fede di Revisione ed Approvazione del P. F. *Filippo Rosa Lanzi* Inquisitor General del Santo Offizio di Venezia nel Libro Intitolato : *Institutionum Metaphysicarum Libri IV. Autore Sigismundi Storchmann in Academia Vindobonensi Publ. Ord. Tom. 2. &c. Samp.* non v'esser cosa alcuna contro la Santa Fede Cattolica, e parimente per Attestato del Segretario Nostro, niente contro Principi, e buoni costumi, concediamo Licenza a *Francesco Sansoni* Stampator di Venezia che possi essere stampato, osservando gli ordini in materia di Stampe, e presentando le solite Copie alle Pubbliche Librarie di Venezia, e di Padova.

Dat. li 31. Gennaro 1773. M. V.

(*Andrea Querini* Rif.

(*Girolamo Grimani* Rif.

(*Sebastian Foscarini* Cav. Rif.

Registrato in Libro a Carte 148. al num. 1207.

Davidde Marchesini Segr.

Adi 4. Febbraro 1773. M. V. Registrato nel Magistrato della Bestemmia.

Dionisio Querini Segr.







